

## **2 Samuele**

# **Mbuga ogoha gilibu ngarunaga nemandi ogo**

Mbuga ogome Samuelenaga mbuga mbira bi-  
agoha howa bi te lo wiaruni leaha mani binigo  
damene gilibu wini nga. Abale mbuga mbira  
biagobi Samuele mbuga mende ogobi mbiraore  
hangu winigo mani howa lone mo kira hene. Ani  
binidagoni irane mbuga mende ogo ibugua agali  
mbiraore Kini Debidi hangunaga te dewa gilibu  
nga.

Debidi ibuni kini heangi binirunaga bi te gilibu  
nga. Ngode Datagaliwabe ibu Kini Debidila  
mandagi haabo haga hene. Debidi ibuni  
kini hongohore howa Ngode Datagaliwabe  
gubalini halu ibunaga Isaraele wali agali  
bibahende gubalini hai haga hene. Ibugua  
Ngode Datagaliwabehondo mini bilinahe heagola  
ibunaga Isaraele wali agaliru bibahendeme ibu  
gubalini timbuni ho hene. Ani ha howa dege ibuni  
hangu mo turu holenenaga mana ko timbuni  
mbira biyagome ibuni pilene. Ani bu hearia  
Ngode Datagaliwabenaga bi mana latagi haga  
agali Nadanahanda ko biyago lamialu latagi  
hayagola Debidi ibuni ko biyago taga halu dara  
timbuni howa lapani halu lone mini beregedene.

Isaraele wali agalirunaga deni Debidi ibu agali  
mini lene timbuni mbira hene. Isaraele wali agali  
tiha genda mbira tagira ibirangi tinaga kini bayale  
Debidi henego mitangi bu dai biaga hene. Ani

howa mani tinaga kini agali bayale Debidi ale mbira ibilo manda bu haga hene. Debidihanda yu tiga hongohe bialu bu mini beregedo henego ibunaga wali agalirume manda biaihe hene.

**Bulu бага бува кuni gilibu ngago (1.1–4.12)**

Yudalirume Debidi ibu tinaga kini helo dabo helenego 5.1–24.5

Isaraealirume Debidi ibu tinaga kini helo dabo helenego

5.1–10.19

Debidi ibu wai bialu wayali haga binigo

11.1–12.25

Debidi ibu Urianaga one mini Bedeseba kayu binigo

12.26–20.26

Debidi iginirume ibu mo genda henego

21.1–24.25

Debidi ibu wahe howa bialu henego

*Kini Solo homaya layago Debidi ibu hale henego ogo*

<sup>1</sup> Debidibi ibunaga ami agalirubi ti Amalegealiru baba wai bialu henego dai buwa horo kiru Sigilaga tanoha pu hene. Ani pu heaha Kini Solo ibu halu nde wai halu mende Pilidialiru baba bialu hearia tigua Kini Solo waime bene homayago Debidi ibu hale nahe dege hene. <sup>2</sup> Ani hale nahe hearia horo tebonengi igiri daliahe Kini Solo heba wai bialu henego aria mbira Solo dara howa ibunaga agaru budu bagabi bialu dongoma dindiruru ibunaga hagianeni dugu hiralu Sigilaga tano anda ibini. Ibalu Debidi heagoria ibuwa Debidi geha bulu palialu kininaga mini yaraga

halu ani bini. <sup>3</sup> Ani biyagola Debidihanda igiri biagohondo lalu, Í agoha howa eberebe, lene.

Ani layagola igiri daliahe biagome ladai bialu lalu, I Isaraeali ami hearu heba wai hama wiagoḥa henego ai pora bialu ibida ibiru, lene.

<sup>4</sup> Ani layagola Debidihanda ibuhondo hale lalu, Wai bialu harimidagonaga te bibi maru hale holene hame ledogo langi, lene.

Ani layagola igiri daliahe biago ibugua ladai bialu lalu, Isaraele ami agali heneru ibida pi ai hayagola dewaore Pilidiali hearume minalu bai haya. Kini Solobi ibu igini Yonadanabi kirabali bayagola homaya, lene.

<sup>5</sup> Ani layagola Debidihanda ibuhondo hale lalu, Libu homaya lowa agua manda bialu larebe, lene.

<sup>6</sup> Ani hale hayagola igiri daliahe biago ibugua ladai bialu lalu, I Hari Giliboa heagoria howa handalu hewaria Solo ibugua ibunaga wai bigaga yandare yiago dindini hanga howa ogoriani maliaho hearia handaru. Ani handalu hewaria ibunaga waitigi agalirume nogo hosini biralubi hosime gili laga mini karisini heyu halubi abale hapara hayane handaru.\* <sup>7</sup> Hapara hayagola Solo ibugua beregedowa handa dai bialu hearia i erembirahayagi mama ibalu hewaria hondowa i olaya. Olayagola ina lalu, Ya agali haguane-o ladai biru. <sup>8</sup> Ani ladai birugola ibugua lalu, Í agohayagi howabe, layagola ina ladai bialu lalu, I Amalegeali ko, laru. <sup>9</sup> Ani larugola ibugua ihondo lalu, Inaga waitigi biarume i bayago ai áyu dege

---

\* 1:6: 1 Sml 31.1-6, 1 Bit 10.1-6

homo tongolo mule ngogonigo abale ibalu ina i homoliya ba, laya. <sup>10</sup> Ani layagola ina abale ibu heagoria puwa homelo bo tongolo milaru. Ani birudagoni irane ina manda bialu hewaria ibu yandare biagoria maliaho hayadago yu wahalu dindini ibira hayagua ibu homabehe heago hondowa ani biru. Ibu homayagola kini ibunaga tangi karuleagobi gi pagida karuleagobi uruni bibahende agali haguane inaga golo yahalu ibirugo ao ini ngero, lene.

<sup>11</sup> Bi ogoni layago hale howa Debidihanda ibunaga bu miniha genda timbuniore howa ibuninaga aga bu heago minu lerelene. Ani biyadagua Debidinaga ami hearu tiguabi nde ani dege bini.

<sup>12</sup> Solobi Yonadanabi Isaraele ami biarubi Anduane Homogonaga wali agali biaru bibahendeorebi waime bai hayagola tigua dara howa dugu bia dara ha bialu tomoru nane wahowa horo mbiru halu alendo hene. Waime dewaore bai hayagola tigua anidagua bini.

<sup>13</sup> Ani buwa Debidihanda igiri daliahe bi yalu ibini biagohondo lalu, I dindi aniali kebe, layagola igiri daliahe biagome ladai bialu lalu, I Amalegealigo ai bamba i aba ibu inane dindi wahalu ibuwa Isaraele dindiha ho tene heneyago kogoni, lene.

<sup>14</sup> Ani layagola Debidihanda lone hale halu lalu, Anidago ina agali Anduane Homogo ibunime dabaluhelene biagoni bolene gi nahe baridago agua biribe, lene. <sup>15</sup> Ani lowa Debidi ibunaga ami agali mbira heago ibu lowa lalu, Igiri ogo homelo ba, lene. Ani layagola ami biagome igiri daliahe biago ayu tibu wai biaga yu heagome dibayagola

homene. <sup>16</sup> Igiri biagonaga tingini wiago hondowa Debidihanda lalu, Inime bia ko haridagonaga pani naregoni. Inime latagi halu agali Anduane Homogohanda dabaluhelene biago baru larigome ini homedegoni, lene.

*Debidihanda Solo Yonadanalanaga dara howa dugu bialu iba gana lenego ogo*

<sup>17</sup> Debidihanda dara howa dugu bialu iba gana ogo Soloibunibi ibu igini Yonadanabi mitangi bialu lene. <sup>18</sup> Ani lowa Debidihanda Yuda wali agali bibahendeme iba gana ogoni lo manda bilo, Lo manda biaiore halimu, lalu hongo howa lamini. Iba gana ogoni mini Waime Benegonaga Dugubi laganego mbuga mbira mini Agali Tigabirunaga Mbuga laga ngagoha gilibu nga.\*

Debidihanda iba gana ogoni ogodagua lene.

<sup>19</sup> Ina Isaraele wali agalirunaga agali haguane hayaru hari nene wiaruha homayada.

Inanaga ami agali hongohe biaru homai hayada.

<sup>20</sup> Gede tanohabi Asagelono tanoha hariga pedarunaga howabi bi te ogoni lalu mbira latagi nahalimu.

Pilidia wali bedarume bi ogoni hale howa ti turu holigo nalalimu.

---

\* **1:18:** Agali mini bogabi manda timbuniwi hearume manda bu handalu hearia, Agali Tigabirunaga Mbuga ogoni bamba Isaraele wali agaliru tinaga wini bada laya. Ayu mbuga ogoni nawi. Mbuga ogoniha bi agi dege lo winibe tobene. Bi te mbira bamba Yosua ibugua Anduane Homogohondo bi layagola ni abale anda nape hayagoria luore haho wini mbira lo ngagobi bi ogoni mbuga ogoniha dege wini. Yosua 10.12-13 handabe.

Ngode Datagaliwabe mitangi nabiaga karunaga  
wane bedarume bi ogoni hale howa  
tinaga bu miniha dungulo holigo nalalimu.

21 Ami agali hongohe biarunaga tinginibi tinaga  
wai biaga humbibi

Hari Giliboa nene wiaruha bame wiaabo ka.  
Solonaga wai humbi biagobi welime baya hangu  
haj nahe ogoniha wiaabo ka.

Ani bidagonaga iba dalubi mbiraga pibirabi hari  
nene ogoniha lone naibilo hameledo.

Dindi ogoniha tomorubi bayale anda nahelo  
hameledo.

22 Yonadanaga dandame mbirale ko ba nabiaga  
gibiore wini.

Solonaga wai biaga ayu tibu bame nawiaga.  
Wai bialu ami agali waitigi dewaore balu home-  
laga.

Agalinaga darama dewaore ayu tibu ogoriani bu  
ka.

23 Solo Yonadanala libu agali bayaleore haga hene.

Libuni haru mandagi haabo haga henego  
libuni haru mandagi dege homaribida.

Ega bodo hariaweme ibunaga tomo naga ale  
ngagola minule abale yagalalu piagago  
emene nira dege lowa

libugua gerai hongo howa laga hene.

Libunaga hongo laiono gabua ale ndo hongo tim-  
buniore bolanguahe hene.

24 Isaraele wali bedamiru-o

Solohanda aga daramabi bayale tara wiago tí mo  
ngialu

ngolome wabini yári tara tara wiarubi tí yári bil-  
imulo mo ngiyagonaga  
ibu mitangi bialu dugu timbuniore bialu biral-  
imu.

25 Ami agali wai biaga hongohe biaru homai  
hayada.

Ti wai hamani homai hayadagoni.  
Yonadanabi homa dege bialu ibunaga tingini uyu  
hari nene ogoniha wiarua.

26 Inaga hamene Yonadana-o inaga dugu bia haro-  
goni.

Ina í gubalini haabo ho kogoni.

ínabi nde ì gubalini hagaore harigoni.  
Wandarime ihondo gubalini hagago dindiha lowa  
ínaore ì gubalini timbuni ho harigoni.

27 Ami agali wai biaga hongohe biaru homai  
hayada.

Tinaga wai biaga danda timu yandare yayarubi  
goba hai harua,  
lalu Debidihanda dugu bialu iba gana bi ogo-  
nidagua lene.

## 2

*Yuda wali agalime Debidi ibu kini helenego ogo*

<sup>1</sup> Mani Solo Yonadanala homeaha Debidihanda  
Anduane Homogohondo hale halu lalu, Ina Yuda  
dindiha tano ngaruni mbiragoha hole polene  
karulapedabe be nakarulapedabe, lene. Ani  
layagola Anduane Homogohanda ladai bialu lalu,  
Karulapego mbirani hole pu, lene. Debidihanda  
lone hale halu lalu, Ina tano agoria hole poabe,

layagola Anduane Homogo ibugua ladai bialu lalu, Heberono tanoha hole pu, lalu lamini.

<sup>2</sup> Ani laya handala Debidi ibu one Yaserili wali Ahinoamabi Kamelo tano wali Abigele berenegobi kirabali haru halu Heberono tanoha hole pene. Bamba wali Abigele ogoni ibu Nabala homayagonaga one berenego mani daloni Debidi ibu dabu bini.\* <sup>3</sup> Agali Debidi heba mandagi ibagabu haga hearubi uruni ti onerubi ti bibahende piai howa Heberono tanohabi dindi Heberono tano kaware wiaruhabi pu hai hene. <sup>4</sup> Ani pu heagola Yudali hearu ibuwa tigua Debidi tinaga kini helo dabalulu ira olibe lininaga weli Debidinaga hagianeni odo wini.\*

Ani biyagola Debidi ibu áyu dege kini howa hale halu hearia Yabese wali agali Gileada tanoha hearume Solo hora haya layago hale hene. <sup>5</sup> Ani hale howa Debidihanda Yabese wali agalihondo bi mbira lo pelalu howa lalu, Tígua mana bayalore walia halu tínaga Kini Solo horo harimidagonaga Anduane Homogohanda tí mo turu halu mo bayale helo hameledo laro. <sup>6</sup> Áyubi nde Anduane Homogo ibuni tí heba biamogo bialu mandagi haabo helo hameledo laro. Inabi nde tígua Solohondo mana bayale bu walia harimidagonaga tihondobi bayale dege bulebero. <sup>7</sup> Heneneore tínaga Kini Solo ibu homayagonigo áyu Yudali hearume i tínaga kini holiya dabo helaya. Ani biyago ai tíha gi holene mbira nawi howa hongo ho haabo halimu, lalu Debidihanda lene.

---

\* 2:2: 1 Sml 25.42-43    \* 2:4: 1 Sml 31.11-13



*Isaraeali hearume Isibosede tinaga kini helo dabo helenego ogo*

<sup>8</sup> Pilidiali hearume Solo bayangi howa Solonaga ami hearu haru haga haguane Nere igini Abane ibugua Solo igini Isibosede haru halu pene. Haru halu iba Yodana doma ede halu ederayagi Mahanaimi tano wiagoria anda pene. <sup>9</sup> Tano Mahanaimi ogoniha anda pu howa Abane ibugua Isibosede ibu dindi Gileadabi Asebi Yaserilibi Eberaiminagabi Beniyamininagabi Isaraele dindi bibahendehabi uruni bibahendenaga kini helo dabo helene. <sup>10</sup> Solo igini Isibosede ibu mali pira maria (40) hayagola tigua ibu Isaraele wali agalinaga kini helo dabo helayagola mali kirani hangu haru hene.

Ani henegoyu Yuda wali agali tigua Kini Debidi baba haabo heagola <sup>11</sup> ibugua Heberono dindini howa mali kariani ege waragaria haru hene.

*Isaraeleme Yuda baba wai binigo ogo*

<sup>12</sup> Abanebi Isibosedenaga ami agali biarubi ti bibahende Mahanaimi tano wahalu Gibeono tano pialu anda pene. <sup>13</sup> Ani anda ibu heagola Yoababi Debidinaga ami hearubi ti ibalu Gibeononi iba gorene mbira bereagoria kaware lola hene. Iba biagonaga ange mendehayagi Isibosedenaga ami agali biaru ti bereagola mendehayagi Debidinaga ami agali biaru heba wali mbira mini Seruia berenego igini Yoaba halu berene. <sup>14</sup> Ani bereagola Abanehanda Yoabahondo hale halu lalu, Inane hangu wai halu mbira bia handamabe. Inaga igiri daliahe o karu aria maru tale bialu ibilarogo inaga igiri daliahe maru tale bialu wai bilo ibila, lene. Ani layagola Yoabahanda ladai

bialu lalu, Karulapego ani bimiya, lene. <sup>15</sup> Ani lalu Beniyamini hameigini aria homberiali (12) Isibosedenaga ami heneru tigua Debidinaga ami agali homberiali (12) biaru baba wai bule tagira ibini. Ibu howa Debidinaga ami agali mbira mbirame Isibosedenaga ami agali mbira mbira baba wai bialu bagabaga bini. <sup>16</sup> Ani wai bialu hongo manda bigibigi bialu howa ami agali mbira mbirame mendeali mandani yuwa ayu tibume habianeha nogoba haga bini. Ani bialu agali pira kirani mariali (24) biaruni bibahende dindini ibira halu homai hene. Ani binigo manda buwa Gibeono dindi ogoni mini Ayu Tibu Dindi laga winigo nga.

<sup>17</sup> Horo ogoningi hameigini kira ogoni labome wai timbuni hiriribiore buwa Debidi aria hearume Isaraeleali Abane aria hearuni bo podahana halu ti wayali hene. <sup>18</sup> Wayali hayadangi Seruia igini tebira Yoababi Abisaibi Asahelebi henego uruni tini haru wai bialu hene. Asahele ibu agalime tali minalu babe nahe gerai purunulope halu nogo dea gabuame piagagobi polene mbira hene. <sup>19</sup> Ani howa ibu Abane piyadaguaore gerai lalu haruru pene. <sup>20</sup> Haruru ibiyagola Abanehanda handadai bialu hearia Asahelehanda ibu talima mama ibiyane hondowa ibugua lalu, Asahele ogoni fore eberebe, lene. Ani layagola Asahelehanda ladai bialu lalu, E i eberogoni, lene.

<sup>21</sup> Ani layagola Abane ibugua lalu, I talima naibi wahalu ami agali daliahe poraruni aria mbirago talima pialu ibunaga mbirale yidaru gingilo mo yalu dai bule pu, lene. Ani lamiyago lelowa Aba-

neore talima puabo hene. <sup>22</sup> Talima pialu hearia Abanehanda lone ibuhondo lalu, I porogoha talima naibi waha larugodago ai í bo waholiyanaga pebera harebe. Ina í homabelo bo waharuyagua nde í hamene Yoabala wanakui lola agua holiyadabe, lene. <sup>23</sup> Ani layagola Asahele ibugua donge halu talima pene. Pialu hearia Abane ibunaga yandare deneme Asahele talima ibiyagoha nogoba hadai biyagola yandareme ibunaga tinini nogoba hayagola yandare dene erembiraha bolatagi hene. Ani biyangiore Asahele ibu abale dindini ibira halu homo tongolo mini. Ami agali maru mani ibiyarume Asahele tongolo mini wiago hondowa ti o biagoria halope howa handayaho hene.

<sup>24</sup> Ani helalu Yoaba Abisaila libuni Abane piyadagua talima puabo halu alendo ne layagola ni tagira ibagagohayagi hari Ama nene wiagoria pene. Dindi ogoni Gibeono dindiha iba dalu naibaga mbira wiagoha polene hariga peagoria dindi Gia mbira winigoria anda pene. <sup>25</sup> Ani pialu hebigola agali Beniyamini hameigini hearume Abane heagoria dai bialu hari bare hambene wiagoria wai bule tidiyu hene. <sup>26</sup> Ani tidiyu howa Abane ibugua Yoabahondo oladai bialu lalu, Wai bialu haabo hamiyana talima ibiribe. Mana ogonidagua beramagola inaha genda timbuniore anda ibulebirago manda nabi kebe. Ina damene degedege howa darama mbiraore hangu yabulene kamagonidago ai inaga agali uruni wai wahadaba lalu angi lamuleberebe, lene.

<sup>27</sup> Bi ogoni hale howa Yoabahanda ladai bialu

lalu, Ngode Datagaliwabe haluhe kagonaga minini howa ina ihondo heneneore larogo. Ina bi o laregoni naledele inaga ami agali haru korunime tí talima ibalu kane dege yawi gao ledale ndobe, lene. <sup>28</sup> Ani lowa Yoaba ibugua ibunaga ami agalirume Isaraele amiru lone talima napelonaga mbelo biguli pu lene. Ani pu layagola tigua wai wahene.

<sup>29</sup> Wai wahaluh Abane haluh ibunaga ami agali biaruh tidi yalu Yodana dindi ulini tigabi wiadagua pene. Mbiraga hariga ogonidagua piaho wialuh Iba Yodana domade hene. Domade howa pu dege bialuh heane horombe hanuni Mahanaimi tano anda pene. <sup>30</sup> Abane haluh ibunaga ami agali biaruh ti peagola Yoabahanda ibunaga ami agali biaruh mo mogo buwa dagalene. Dagalowa handaluh hearia ami agali pira mbirani dira (19) bo wawai hayiyane hendene. Ani bialuh Asahelebi homayiyane hendene. <sup>31</sup> Ani bialuh Debidinaga ami agali uruni tiguabi nde Abane ibuhayagi hene Beniyamini hameigini biaruh aria handari tebirani pira waragara (360) bai hene. <sup>32</sup> Ani biyagola Yoaba haluh ibunaga ami agali biaruh tigua Asahelelaga tingini mo yalu Bedeleheme tanoha dai buwa ibu aba hora hene homali wiagoha dege hora hene. Hora haluh tigua mbiraga piaho wialuh gao layagola Heberono tano dai bialuh anda pene.

### 3

<sup>1</sup> Ogoningi howa ami agali Debidiha henela Kini Solohayagi henelame wai luore biaabo haluh hene. Ani bialuh howa Debidi aria hearuh tinaga hongo

hama iri iri bialu Solo aria hearu tinaga hongo ibira hama dalidali bini.

*Debidinaga igini waragaria heneru ogo*

<sup>2</sup> Debidi ibugua Heberono tanoha howa igiri waragaria hono wini. Iginu mbira wahenego mini Amanono hene. Amanono ibu aija Yaserili tano wali mini Ahinoama berenego ogoni igini hene. <sup>3</sup> Debidi igini mende mini Kileaba hene. Kileaba ibu aija Nabala mbira homenego one dalo Kamelo tano wali mini Abigele berenego igini hene. Debidi igini tebone Abasolomo henego ibu aija Gesua dindi Kini Talamai mbira henego wane mini Maga berenego igini hene. <sup>4</sup> Ibu igini mane Adoniya hene. Adoniya ibu aija mini Hagidi berenego igini hene. Ibu igini dauni mini Sebadia hene. Sebadia ibu aija mini Abidala berenego igini hene. <sup>5</sup> Debidi igini waragane mini Idereama hene. Idereama ibu aija mini Egela mbira berenego igini hene. Debidi igini uruni bibahende Heberono tanoha howa taba henene.

*Abane ibu Debidila ho mbiraore ho henego ogo*

<sup>6</sup> Ami agali Debidi aria baba Kini Solo aria baba wai bialu haabo hene. Ogoningi Solo ariahayagi Abane ibu agali mini lene timbuni howa bolangua ho hene.

<sup>7</sup> Ani heagola horo mbirungi Isibosedehanda lalu, Abane ina i aba Solo one dalo Aia wane Lisiba bereago í haridago aginaga haribe, lalu bi laede hene. <sup>8</sup> Ani laede hayagola Abane ibu keba timbuniore howa ibuhondo ladai bialu lalu, ina manda bu handalu keria i inaga biangodane hendedebe. Be ina manda bialu ina Yudali karu

biamogo bialu ko lo manda bu kebe. Ani ndoyago ina í aba Solo kini pigane hayangi howa ibubi ibu hamene damene bu kamirubi tínaga andaneha haabo harugo áyu kogoni. Ani howa Debidihanda í minalu bo waholilono ina baya hangu handayaho haabo harugoyu áyu ina wali bereagoha ihondo bi bame aginaga laba haribe. Ai bi ogoni bamedago. <sup>9-10</sup> Anduane Homogohanda Debidihondo bi mbira buleore lalu lowialu, í aba Solo bo dugu wahalu í dameneru mani Isaraelenaga kini naholebira, laya. Ai Debidi ibu kini ha aribia howa ibugua Isaraele dindihabi Yuda dindihabi bibahende handame ho holebira. Ani holebirago ai ina Anduane Homogohanda layadadagua Debidi ibu kini helonaga mo hongo halu biamogo nabi haruyagua ina heneneore larogo Ngode Datagaliwabeibunime j homoliya bo wahelo laro, lene. ✧ <sup>11</sup> Ani layagola Isibosede ibu Abanehondo gi timbuni howa ibugua bi mende labe nahe hene. <sup>12</sup> Horo ogoningi Debidi ibu Heberono tanoha heagola Abanehanda ibuhondo bi mbira lawia halu lalu, Dindi ogoria aiwa handayaho holebirabe laro. Ina íla habo nalolene bi mbira buleore lalu lo wibelo hamelo kogoni. Ani lo weregola Isaraele wali agali bibahende í andaneha hai helo ina biamogo buliya lalu lawia haro, lene.

<sup>13</sup> Anidagua layiyago hale howa Debidi ibugua Abanehondo ladai bialu lalu, Ina bi o laridagoni bayaledago. Ainde mbirale uruni buleore lalu habo nalolene bi ogoni mani lo wuliyana áyu ina bulene mbira ngago ala bibelo hamelo

---

✧ 3:9-10: 1 Sml 15.28

kogoni ogo. Solo wane Migala ala ini koria haru dai bibelo hameledo. Ina o bibe larogoni nabiriyagua i inaga wanakui nahondoleberoore laro, lene. <sup>14</sup> Ani lalu Debidihanda Isibosedehondobi bi lawia halu lalu, Ina Migala ibu i one berelo ibu wariabu agali handari mbira (100) wai bialu Pilidiali bo wahai harurunaga dongone podo mabu binigome hende hene i oneore birayagodago ibu haru dai bibe laro, lalu lawia hene.✧ <sup>15</sup> Bi ogonidagua lawia hayiyago hale halu Isibosedede ibugua agali marume Migala ibu Laisi igini Paladile one berearia damu pudaba lene. <sup>16</sup> Ani layagola agali biarume Migala Debidi andaga haru pole piyagola Paladile ibu dugu bima ibu one Migala piyadagua talima pialu Bahurimi tano wiagoria anda pene. Ani piyagola Abanehandanda ibuhondo lalu, Áyu ogoni andaga dai bia, lene. Ani laya handala bi hale halu ibu andaga dai bini.

<sup>17</sup> Ani biyagola howa Abane ibugua Isaraele dindiha agali haguane hearu hearia puwa tihondo lalu, Bambaore howa tígua Debidi tínaga kini helolene hamelo harimigoni. <sup>18</sup> Ai áyu tígua ibu kini helolene henge o ngagoni. Bamba Anduane Homogohanda bi mbira lo wialu lalu, Inime inaga biabe biahaga agali Debidinaga hongoni howa inaga Isaraele wali agali tínaga waitigi Pilidialirunaga giha howabi waitigi maru karunaga giha howabi gingila mialu haru dai bulebero, lenego. Bi ani lenedagoni mitangi bialu Debidi ibu kini helo áyu dabo helolene nga, lene.

---

✧ 3:14: 1 Sml 18:27

<sup>19</sup> Ani lowa Abane ibugua Beniyamini hameigini bu hearuhondo bi ogonidagua dege lamule pene. Bi lamiai halu Heberono puwa ibugua Beniyamini hameiginirubi Isaraele wali agalirubi tigua ogoale bule manda bu ka lalu Debidi lamule pene.

<sup>20</sup> Abane halu agali pira kira (20) bibahende bi yalu Debidi hearia Heberono tano anda ibiyagola Debidihanda ti mo turu halu tomo nelo dawa hene. <sup>21</sup> Emene biruwa Abanehanda Debidi lamialu lalu, Isaraele wali agali bibahende í andaneha hai hole lalu habo nalolene bi lo wilo damu poro. Ani lo wiragola ínime kini howa bulene hame laridagua Isaraele dindi bibahende handameho habelo, lene. Ani leagola Debidihanda ibunaga agali bu hearuhondo lamialu lalu, Abaneore mbira mo ko holamini nahalimu, lene. Ani layagola Abane ibu andaga dai bini.

### *Yoabahanda Abane bo wahenego ogo*

<sup>22</sup> Debidihanda Abanebi agali ibiyarubi andaga pudaba lo heagola Yoaba halu Debidinaga ami agali maru hearume ogoningsi dege waitigi mende hearu baba wai bialu howa dabudabu dewaore mo hilo yalu Heberono tanoha anda ibini. <sup>23</sup> Anda ibuwa Yoaba ibu hale halu hearia Abane ibu Kini Debidi hondo ibiniya layane hale hene. Kini Debidihanda Abane bolomini nabalimu laya layago hale howa <sup>24</sup> Yoaba ibu Kini Debidi hondole puwa ibuhondo lamialu lalu, Abane ibu í heria ibiyagola ína ibuhondo mbira bia nabi bame dai bia lariyago aginagabe. Ína mana ogonidagua biridago bayale ndo lehe birida. <sup>25</sup> Abanehanda bule ibiyago heneneore í manda bidegoni. Ibugua



í biamogo bule hetingi howa ína bule manda bu wiridaru handa í ibagabu hagararu hondo wia bule ibiyago manda nabi harida. Ogoni íni manda bibeheore kegoni, lene.

<sup>26</sup> Yoaba ibu Debidila bi lai halu tagira pene. Puwa ibugua agali maruhondo, Abane harigani pialu karia haru dai bule pudaba, lene. Ani laya handala pialu Abane ibu iba hambiaga uli wene mini Sira wiagoria pialu hearia tali minalu haru dai bini. Ani haru dai biyago Kini Debidi ibu hale nahe hene. <sup>27</sup> Abane ibu Heberono dai biyagola Yoabahanda Abanela ndi lole haru pubagi hetingi howa tanonaga pabe panga heagoria haru pene. Ani haru pubagi howa Yoabahanda wai biaga ayu tibu emeneme Abane tinini nogoba hayagola homene. Abale Abane ibugua Yoaba hamene Asahele bayagonaga pani Yoabahanda Abane ibuni homelo bene. <sup>28</sup> Abane bo wahaya layago hale howa Debidi ibugua lalu, Abane homayadagoni ina ndo bidogo Anduane Homogo ibu manda bu ka. Ko ogoni inaga wali agali bu karu tihabi para nahe. Ko ogoni Yoaba ibuni hanguha nga. <sup>29</sup> Ani ngago Anduane Homogoibunime Yoabaibunibi ibu one waneigini damenerubi ibu aguane mani holebirarubi bibahendehondo pani milo. Agali Yoaba ogoni ibu damene karu aria mbira mbira bibahendengi ge hamua bilobi dere hongohe dabi nahaga ale bilobi walime biabe biaga ngaru hangu bialu helobi tinaga waitigirume bo wahaga bilobi tomo noa noa lo haabo helobi Anduane Homogohanda Yoaba dameneru dabane mbira mbiranaga genda uruni mo migi bilo hameledo, lalu Debidihanda Yoaba damene ha halu ani lene.

<sup>30</sup> Yoaba Abisailame libu hamene Asahele Abane-handa amu Gibeono iba bereagoria wai birim-igoria bo wahenegonaga pani libugua Abane bo wahene.

*Abane hora henego ogo*

<sup>31</sup> Kini Debidihanda lalu, Yoaba damene bu kamiru bibahende Yoaba ibuni heba tigua Abane dara ho kama lowa walia halu tinaga aga bayale bidamiruni minu lerelo wahalu daraho howa aga biaga ngaru karulo halimu. Ani karulo howa Abanenaga dugu bia halimu, lene. Ani lalu Abane hora hole ibunaga tingini homaliha mo yalu piyadagua Debidi ibuni mama talima pialu hene. <sup>32</sup> Ani pialu tigua Heberono tanoha Abane hora halu kini ibuni ogoriani howa dugu hongohé biyagola wali agali bu hearu tibi nde dugu bia dege bini. <sup>33</sup> Ani bialu howa Kini Debididi ibugua Abanenaga dara howa dugu bialu ogodagua lene. Abane agali mini nawi lulu ale mbira homaradagua biyadagoni irane agomedabe.

<sup>34</sup> Ibunaga gi mbira minu daba nahe.

Ibunaga gebi minu paulalu daba nahe dege.

Agali pagebibime bamuore bo waharadagua biyada,

lalu Debidihanda dara howa dugu bialu bi ani lene.

Ani biyago hondowa wali agali bu hearume dara howa dugu lone bialu hene.

<sup>35</sup> Horo ogoningi howa Debidi ibu tomo mbira naneore heagola wali agali bu hearume ibuhondo, Tomo mbira narene, lalu hene. Ani layagola Debidihanda lalu, Ina tomo lenego

mbira nane kone alendo haragola nolebero. Ani nabiruyagua Anduane Homogohanda ini bo wahelo, lalu bi hongohe lowini. <sup>36</sup> Kinihanda bi ogonidagua layadago hale howa wali agaliru tinaga bu miniha turu halu dungulo hai hene. Kini ibugua o biyadagoninaga hangu ndo ibugua biagago bibahende bayale dege bialu heagola wali agali ti turu howa bu miniha dungulo haga hene. <sup>37</sup> Anigo Isaraele wali agali hearumebi Kini Debidi ibunaga wali agali bu hearumebi ti bibahendeme Kini Debidihanda biyadagoni hondowa Abane homelo bo wahayadagoni ibula haru mini mbiraore howa bene ndoyane hendene. <sup>38</sup> Kini ibugua ibunaga agali haguane hearuhondo lamialu lalu, Uru-o hale hadaba. Horo áyu ina Isaraele wali agalinaga agali haguane hongohe mbira biago homayagoni. <sup>39</sup> Ainde heneneore Ngode Datagaliwabe ibunime i kini holiya dabo helene kogonigoyu inime Seruia igini kirali ogoni labo libu agali hongo gibihe kago hondowa ina libu pani babe nahe kogoni. Libugua mana ko biyadagonaga pani Anduane Homogo ibunime miadai bilo laro, lalu Debidihanda lene.

## 4

### *Isibosede bo wahenego ogo*

<sup>1</sup> Isibosede ibu hale halu hearia Abane Heberono tanoha bo wahaya layago hale howa ibu gi timbuni ho hene. Isaraele wali agali bibahendebi mogolai ho hene. <sup>2</sup> Isibosedenaga ami agali kirali libu wai bu poragoha haguane howa agali maru haru haga hene. Libu mini

Bana Legabala Berodo tanoali Limono mbira henego igini hene. Agali ogolabo libu Beniyamini hameigini aria haradagua binidagoni irane Berodo tano ogoni Beniyamini hameigini dindihayagi mo tago hene wiagola ani hene. <sup>3</sup>Wali agali ala bamba Berodo ogoniha dindi aba henedaru tini ibida pialu Gidaimi tano pu henego ka.

<sup>4</sup>Kini Solo igini Yonadana biago ibu igini mbira mini Mebibosede henego ogoni ibu igiri emene mali duria hangu heangi ibu aguane Solobi ibu aba Yonadanabi kirabali bo wahene. Ani biyago hale howa agali Yaserili tanoha haga hearume Yonadana one waneiginiru berearia bi lawia halu lalu, Waitigime Yonadana bo wahaya, lene. Ani layiyago hale halu Yonadana damene wali mbira ibu Mebibosede handayaho biraga bereagome Mebibosede minu yalu ibida gerai pialu hearia pilowa Mebibosedenaga ge kuni habolene. Ani biyagola mani Mebibosede ibu wahe halu ge dugupehe haabo hene.✧

<sup>5</sup>Horo mbirungi horombe Isibosede ibuni andagaha erekui dogolo palearia Legabala ibu hamene Banala libu ibu andaga pene. <sup>6-7</sup>Libu anda ogoniha widiru yolo bule piaga wiagoha widi yolo bule petingi howa anda tamuha anda pene. Ani anda puwa handalu hebiria Isibosede ibu ibuni andaga tamuha dagiani palearia hendene. Ani hondowa libugua hendeore puwa wai biaga ayu tibu tubagi yini yiaagome Isibosedenaga tinini nogoba hayagola homene. Homayagola libugua

---

✧ 4:4: 2 Sml 9.3

ibunaga haguane pugu hanalu wali agali nahendeore ohalu tagira pene. Tagira puwa libu dindi tigabi Yodana dindi ulini wiagoria iba peadagua mbiraga hanguni puabo hene. <sup>8</sup> Ani pialu horo mendengi Heberono tano anda puwa libugua Isibosedenaga haguane pugu hanaribigo Kini Debidi berearia hanalu puwa mo walia hene. Mo walia halu lulu, Kini-o ogo de handa. Agali inaga waitigi i bo wahole taya bialu haga Kini Solo igini Isibosedenaga haguane pugu yidabagoni. Abale Solohanda i bo wahole taya bialu hayago ai Anduane Homogohanda Solo ibugua mana ko biyagonaga pani mialu ibu damene lenego bo wahai haya, lene.

<sup>9</sup> Ani layagola Debidihanda ladai bialu lulu, Anduane Homogo ibu haluhe kago ibugua i mo ko holene mbirale dewaore ngagoria howa i haru dai biaga ka. Ibu ogonibi biaga kago ina ibunaga minini howa libuhondo bi heneneore ogodagua laro. <sup>10</sup> I Sigilaga dindi wiagoria hewangi agali mbirame ibuwa ihondo Solo homaya lulu langini. Ibugua bi o layadagonime i turu holobabe toba howa langialu hearia i turu nahe haru. Turu nahe howa ina ami agali bu hearuhondo lamialu agali ogoni minu yania halu homelo bo wahadaba laru. Agali ogoni ibugua bi te ko i hewaria hale holiya lo yu ibiyadagonaga yolo ogoni miru. ✧  
<sup>11</sup> Anigo áyu agali mbira ibuha ko nawi mbira ibuni andagaha bame paleago homelo bo waharibida. Áyu libu agali koorene ko kabigoni. Libugua mandabu handalu kabiria ina libu yo

---

✧ 4:10: 2 Sml 1.1-16

pialu pelolobadalo manda bidabibe. Yo pialu napoleberabigo ndobe. Ina libugua mana koore biribidagonaga pani ngialu libu dindi ogoria nahalibulo biba helolebero, lene. <sup>12</sup> Ani lai halu Debidihanda ibunaga ami agali bu hearuhondo lalu, Legaba Banala homelo bo wahole haru pudaba, lene. Ani laya handala ami agali biaru tigua puwa ogolabonaga gi geru dibu gandulo wahaga buwa Heberonoha iba gorene bereagonaga angeni libunaga tingini mo derelaho ngelene. Ani bialu ami agali biaru tigua Isibosedenaga haguane bigo Heberono tanoha Abane hora hene homali heagoha dege mo hora hene.

## 5

*Debidi ibu Yudali Isaraealibi tinaga kini henego ogo*

*(1 Bi Te 11.1-9, 14.1-7)*

<sup>1</sup> Mani Isaraeali hearume Kini Debidi Heberono tanoha hearia hondo ibini. Ibuwa tigua Debidihondo lalu, Ina wali agali bibahende inaga damene hangu darama mbiraore kama.

<sup>2</sup> Abale Solo ibu kini heangibi ibu ani helalu dege ina inanaga ami agaliru haru halu wai bule piaga harigoni. Ani birigola Anduane Homogohanda bi lo wialu, Ina inaga wali agaliru haru habelo helarogola í Isaraele wali agalirunaga kini helolebero layagoni, lene. <sup>3</sup> Ani lowa Isaraele wali agalirunaga agali haguane hearu bibahende Heberono tanoni Kini Debidi heagoria ibu ngoai hene. Ibu ngoai heagola ibugua Anduane Homogonaga deni howa bi honghe mbira lowini. Ani lo wiyagola tigua Debidinaga

haguaneni ira olibe lininaga weli odo wuwa ibu Isaraele wali agalinaga kini helene. <sup>4-5</sup> Debiti ibuni mali pira tebira (30) heangi ibu kini pigane hene. Ibu kini howa Heberono dindini mali kariani ege waragara Yuda dindinaga kini hene. Ani bialu Yarusalemeni mali pira tebirani tebira (33) Yuda wali agalirubi Isaraele wali agalirubi bibahende handame howa haru hene. Lamaga howa ibugua mali pira mariani (40) kini howa haru hene.✧

<sup>6</sup> Horo mbirungi Debiti ibunaga ami agali hearubi tigua Yarusalemeha hearu baba wai bule pene. Yarusaleme Yabusuali hameiginirunaga dindi winigo ani wu howa Yabusuali hearume Kini Debitihanda tinaga tano nakarulolebira manda buwa tongoyungu bi lalu hene. Tigua lalu, Tí aleme inanaga dindi ngamagoha anda ibalu nakaruloleberemi. Agali de kohe karumebi kuduguhe karumebi urunibi hangume tí anda naibalimulo harigani hapai holebira, lene.✧

<sup>7</sup> Tigua bi anidagua layagoyu mani Debitihanda ibunaga ami biaru haru pialu wai buwa bo podalu tano hongohe biagoni miyagola Yabusuali biarume bi layadagoni habo lene. Tano ogoni mini Saiono winigo mani Debitihanda wai bialu karulayagola dindi ogoni mini Debitinaga Tano laga wini.

<sup>8</sup> Debitihanda tano ogoni karulenedangi anda pole howa ibunaga ami agali biaruhondo lalu, Tí kamirume ina Yabusualihondo handabe manga kodagua ho kamiyagua iname Yabusualirunaga

---

✧ 5:4-5: 1 Kin 2.11, 1 Bit 3.4, 29.27 ✧ 5:6: Yos 15.63, Hgn 1.21

tano ogoniore karulamiya. Ani karulamiya lo manda birimiyagua ai tini iba hambu puibu biaga dindi guabuwa hariga gonene wia do hene ngagoha anda puwa tanoha wali agali de kohebi kuduguhebi karu layiyago bibahende baba wai bialu bai hamiya, lene. Debidinaga bi layaruni manda buwa bi ogo, Anduane Homogonaga andaha de kohebi kuduguhebi karu anda polene nawi, lagane wini.

<sup>9</sup> Mani Debidihanda bo podalu tanoha anda puwa ibugua Saiono tano ogoni mini Debidinaga Tano wini. Ani wialu Debidi ibuni tano ogoniha hene. Ani howa Debidihanda ibunaga agali biaruhondo tano ogoninaga lene leneni anda bu mabu bidaba layagola tigua dindi ulini mbira winigoria dindi duguwa mogo bialu mo dondene wiagoria anda pigane bialu hene. <sup>10</sup> Anduane Homogo Hongo Haiheore Ngode Datagaliwabe kago ibugua horo bibahendengi Debidila haru mandagi hayagome Debidi ibu kininaga hongo holene mia tago haabo hama iraga halu hene.

<sup>11</sup> Taianaga Kini Hiramahanda ibunaga agali maru Debidi hearia ibilene. Ani ibilowa ibugua ira tamia bayale dibu yalu agali anda biaga mandabi maru ege tole podaga mandabi marubi, Tigua Kini Debidinaga anda timbuni mbira bule pudaba, lene. <sup>12</sup> Urunidagua biyago hondowa Kini Debidi ibugua manda bialu hearia Anduane Homogohanda i heneneore Isaraele wali agalinaga kini helenego kogoni lo manda bini. Ani manda buwa Debidi ibugua Anduane Homogohanda ibunaga Isaraele wali agalirubi biamogo bulenaga biabe hongohe timbuni ogoni biyadalo



manda bia dege bini. <sup>13</sup> Debidi ibu Heberono tano wahalu Yarusaleme hole piyangi howa ibugua wali maru dabu bialu waneigini dewa halu bini. Ibu one maru ala dabu biniru ti bira dege buwa uruni ti haru bibahende Yarusaleme mandagi pu berene. Ani pu biruwa ibu one urunime Yarusalemeni waneigini dewa dege taba henene. <sup>14</sup> Debidi igini Yarusalemeni taba henenedaruni tinaga mini uru Samua Sobaba Nadana Solomono <sup>15</sup> Ibahara Elisua Nebege Yabia <sup>16</sup> Elisama Eliada Elibelede imaru hene.

*Debidihanda Pilidiali bo podahana halu wayali henego ogo*  
(1 Bi Te 14.8-17)

<sup>17</sup> Pilidia wali agali hearume hale halu hearia Isaraele wali agalime Debidi tinaga kini heleda layago hale hene. Ani hale howa tigua tinaga ami agali hearume wai bialu Debidi minule pene. Ibu minule ibira layago hale howa Debidi ibu dalipe halu wai pabe hongohe heagoha hole abale anda pene. <sup>18</sup> Pilidia ami biaru abale ibalu Lebaimi dindi ulini wiagoria abale anda ibuwa mbirale bibahende wiaruni ti mo yai hene. <sup>19</sup> Ani anda ibu heagola Debidihanda Anduane Homogohondo hale halu lalu, Ina Pilidia uruni baba wai bule poabe. Wai bule piruyagua ina ti bai halu wayali holiya ina i biamogo buleberebe, lalu hale hene.

Ani hale hayagola Anduane Homogohanda ladai bialu lalu, Karulapego ina i wayali habelo waitigi uruni inaga giha mo ya holeberogo wai bule pu, lene. <sup>20</sup> Ani laya handala Debidi ibu Bala Perasimi dindini puwa Pilidiali biaru baba wai

bialu wayali hene. Wayali howa Debidihanda lalu, Anduane Homogohanda iba li hongohe poradagua bialu i waitigi hearu hanuni bo gialo yaga bima yupe hayagoni, lene. Anidagua binidagonaga dindi ogoni mini Anduanehanda Bo Gialo Yama Hanuni Yupe Haga laga wini. <sup>21</sup> Pilidia ami biaru ti ibida pialu tinaga dama mitangi bialu gime wabini yu heneyaru yu wahalu piyiyagola Debidi halu ibunaga ami biaru tigua mo yu dai bini.

<sup>22</sup> Ani bialu pu heagola Pilidia ami biaru lone dai buwa Lebaimi dindi ulini biagoria hene. <sup>23</sup> Ani heagola Debidi ibugua Anduane Homogohondo hale halu lalu, Ina agua buabe, lene. Ani layagola Anduane Homogohanda lalu, Tigua wai bule pudaba. Pialu howa ti kagoa abale pogolape halu napilimu. Ohalu tinaga erembira ngagohayagi puwa amu ira mini balasama bu karuha wai bule manda manda bu halimu. <sup>24</sup> Ani howa hale halu kamiria agali maru uyu ira biaru mane maneha tidiyu howa wai dagia balu haruane hale holeberemi. Ani balu haruane hale harimiyagua Pilidialiru baba wai bule ini ala bamba halu piarua lo manda bialu tigua wai bule gerai pialu wai bilimu, lene. <sup>25</sup> Ani laya handala Debidi ibu Anduane Homogohanda layadagua bialu puwa Isaraealeali ami biarume Pilidiali ami biaru mo ko howa balu bo podama pialu Geba tano bo podahana halu piaho wialu amuraore Gese tano puabo hene.

## 6

---

✧ 5:24: 2 Kin 7.6

*Habo Nalolene Bi lo winigonaga Mbogoyi  
Yarusaleme mo yalu ibinigo ogo*

*(1 Bi Te 13.1-14, 15.25-16.6,43)*

<sup>1</sup> Debidihanda wai biaga agali hongohe wai mandabi Isaraele dindiha hearu dabowa lone ibidaba lowa mo ngoai hene. Ami uruni daosini pira tebira (30,000) bibahende ibini. <sup>2</sup> Ani ibu heagola Debidihanda uruni bibahende haru halu Yuda dindinaga Bala tano wiagoria Anduane Homogonaga Habo Nalolene Bi lowinigo Mbogoyi biago mo yu dai bule pene. Mbogoyi ogoni Anduane Homogo Hongo Haiheore kagonaga mini laga wini. Mbogoyi ogoninaga daligahayagi dahuliyali handalehe kira wabu helowa ogoni Anduane Homogo ibuni handame ho howa biragane dagia ogoni laga wini.✧ <sup>3</sup> Anigo Debidibi ibunaga ami biarubi ti Bala tanoha anda pialu Abinadaba andaga hari hombeneni heagoria pialu Anduane Homogonaga Mbogoyi biago wiaria pene. Puwa tigua Mbogoyi biago nogo bulumaga kirame dabudabu yaga karisi gahenge mbira wiagoria gili lalu yalu pole mo paga hene. Mo paga halu harigani yalu pialu howa Abinadaba igini kirali Usa Ahiola libugua dabudabu yaga karisi biago tigatiga yalu pelo mo tiga bigi bima pene.✧ <sup>4</sup> Ahio ibu bamba halu karisi biago mani ibilo pene. <sup>5</sup> Debidibi Isaraele wali agali bibahende bi turu howa ngida balu iba gana lama karisi biago heba mandagi pialu Anduane Homogonaga mini yaraga hama pialu hene. Tigua pialu howa tabaga balu ngidabi balu ngilingele laga bilonaga mbi-rale tara tara wiarubi mo emabia haga bima pialu

✧ 6:2: Har 25.22 ✧ 6:3: 1 Sml 7.1-2

hene.

<sup>6</sup> Ani bima pialu widi iraneru lini hondo ibira ibira halu aeane puyabume yu pelonaga bo taulaga agali mbira Nagono henego ibu andaga wiagoria tagira pene. Dindi ogoriani nogo bulumaga biago labome Anduane Homogonaga Mbogoyi biago mo ema biyagola ibira habehe hene. Ani ibira hole biyagola Usahanda Mbogoyi biago abale yani hene. <sup>7</sup> Usahanda Anduane Homogonaga Habo Nalolene Bi lo winigonaga Mbogoyi biago bame mo yo hondowa yani hayagonaga Anduane Homogohanda keba howa Usa bayagola kaware ogoriani homene. <sup>8</sup> Ani biyagola Debidi ibugua Anduane Homogohanda ogoni biyago hondowa keba hene. Keba hayagola horo ogoningi howa dindi ogoni mini Perese Usa winigo nga.\*

<sup>9</sup> Debidi ibugua ogoningi Anduane Homogohondo gi howa lalu, Anduane Homogonaga Mbogoyi ogo ina ngelo hole aguaore bialu mo yalu poliyadabe, lene. <sup>10</sup> Ani lowa Debidi ibugua Anduane Homogonaga Mbogoyi biago ibunaga tano Yarusaleme nayupe wahalu hariga mendehe yu pubagi halu pene. Puwa tano mbira mini Gede winigo ogoniali mbira mini Obededomo henego ogoni ibunaga andaga ngelene. <sup>11</sup> Agali Obededomo biagonaga andagaha ngelo heane ege tebira pene. Ani ngelo heagola Anduane Homogohanda Obededomobi ibunaga waneigini damenerubi bibahende mo bayale hai hene.✧

---

\* 6:8: Perese Usa mini ogoni Huli bi lalu, Usanaga Pani Mini.

✧ 6:11: 1 Bit 26.4-5

<sup>12</sup> Mani howa Debidi ibu hale halu hearia Anduane Homogonaga Habo Nalolene Bi lo winigonaga Mbogoyi biago Obededomo andagaha nge-layagome ibu damene bibahende mo bayale hai haya layane hale hene. Ani hale halu Debidi ibu Obededomo andaga puwa Anduane Homogonaga Mbogoyi biago mo pialu Yarusalemeni yu dai bule pene. Anidagua yalu ibiyagola wali agalime turu timbuniore hene. <sup>13</sup> Turu timbuniore howa wali agalime Mbogoyi biago mo yalu pole pene. Mo yalu pole lowa ge waragara hangu ha amu halu ti pialu hearia Debidihanda, Emene hondo had-aba, lowa bulumaga wangabe mbirala bulumaga dalua haba tigi mendela Anduane Homogohondo loma binigo bo delene. <sup>14</sup> Debidi ibuni aga pele taraore mbira loma binigo mo miaga hearunaga wiago ibu mo bo buwa turu halu Anduane Homogonaga mini yaraga halu mali lialu tama bima pene. <sup>15</sup> Tigua ogonidagua bialu Anduane Homogonaga Habo Nalolene Bi lo winigonaga Mbogoyi biago Debidibi Isaraele wali agalibi tigua Yarusaleme mo yalu pene. Tigua turu timbuni howa galalu pilipe ale biguli lama pene.

<sup>16</sup> Tigua Mbogoyi biago Debidinaga tano biagoria yu anda ibiyagola Solo wane Migala ibu andaga windoha handatagi halu hearia ibu agalini Kini Debidi ibu pogola daga haga bialu tama buwa mali lima ibalu hearia hendene. Debidihanda anidagua biyago hondowa Migala ibugua turu nahe howa Debidihondo keba ho berene.

<sup>17</sup> Yalu puwa Debidihanda balai anda mbira ala bu manda mandabu helene gogoniha Andu-

ane Homogonaga Mbogoyi biago mo yalu puwa ngelene. Ani ngelowa tigua loma biniru irame dai helo bo delalu Anduane Homogola ho gimbu bulenaga loma biniru bo mialu bini. <sup>18</sup> Loma biniru delai howa Debidihanda wali agali bu hayaruhondo lalu, Anduane Homogo Hongo Haihe-ore kago ibugua tí mo bayale helo, lene. <sup>19</sup> Ani lalu wali agali uruni tomo nelo Debidi ibugua mberedi mbira mbira ta halu nogo bo dawarimigonaga mbirinibi gerebi lini maru do gembeho winirubi wali agali hearu mbira mbira ta halu nai helo miyagola ti nalu tini andaga pugu pugu bini.✧

<sup>20</sup> Ani bialu Debidi ibu ibuni andaga puwa ibu one waneiginiru Anduane Homogohanda ti mo bayale helo lowa bi lole anda pialu hearia ibu one Migala tagira ibuwa Debidihondo keba howa lai lade hene. Ibugua Debidi mege bialu lalu, Ainde Isaraele wali agalinaga kinime ibuni mini lene timbuni kogo lowa walia halu porabu daga daga bialu tama bima ibalu hea. Ani bialu ibunaga haru haga agali haguane hearunaga biabe biahaga wandari berearume kininaga tingini hendelonaga porabu daga hama ibalu hea. Agali lulu mini nawime biagadagua ina ani bialu hegoni, lene. <sup>21</sup> Ani layagola Debidihanda ladai bialu lalu, Anduane Homogohanda í abanaga henge wiago ì mia aribia howa Isaraele wali agali bibahende haru holiya helayagonaga ina turu halu ibunaga mini yaraga hama ibiru. Ina ibunaga mini yaraga halu ibu deni mali lone lialu tama bulebero. <sup>22</sup> Íninaga deni ñnaga mini mo naga-

---

✧ 6:19: 1 Bit 16.43

lone halu mo dindiha haabo holebero. Anigo ina wandari áyu lareruni tigua inaga mini daliga yaragaore holebira, lene.

<sup>23</sup> Kini Solo wane Debidi one Migala ogoni ibu waneigini mbira taba hana nabi biraabo halu homene.

## 7

*Anduane Homogonaga bi mana latagi haga Nadanahanda Debidihondo bi laminigo ogo (1 Bi Te 17.1-15)*

<sup>1</sup> Isaraele wali agalirunaga waitigi hearume ti baba wai nabilo Anduane Homogohanda baya hangu handayaho heagola Debidi ibu nde ibuni andagaha bayale berene. <sup>2</sup> Ani biruwa ibugua Anduane Homogonaga bi mana latagi haga Nadanahondo lalu, I andaga bayaleore ira tamia bayale binigoha bedogola Ngode Datagaliwabenaga Habo Nalolene Bi lo winigonaga Mbogoyi biago dege balai anda biagoha wiaruago ogoni tiga nabida, lene.

<sup>3</sup> Ani layagola Nadanahanda ladai bialu lalu, Anduane Homogo ibu íla mandagi haabo kago ina mbirale mbira bule manda bidedagua nde bibe laro, lene.

<sup>4</sup> Ani layagoyu horo ogoningi mbiraga Anduane Homogohanda Nadanahondo lalu, <sup>5</sup> Inaga biabe biahaga Debidi karia puwa inaga bi ogo ibuhondo lamibe. Debidi-o ina agali inaga anda i holiyanaga bia holene dabo heledogo i ndo ke. <sup>6</sup> I anda timbuniha nahaga kogoni. Bamba Isaraele wali agali Iyibi dindiha howa haru tagira pirugongi howabi maruha puíbu bialubi i balai andaha dege

haga biaga harugoni ko. <sup>7</sup> Ini Isaraele wali agali ti haru mandagi dindi dewani ibagabu haabo harimago howa tinaga agali haguane ina dabaluhelaruruni hondo lalu, Ira tamia bayale karume inaga anda mbira bia nahe kamigo agibe, lalu hale naharuligoni, lene.

<sup>8</sup> Anduane Homogohanda Nadanahondo laabo halu lalu, Inaga biabe biahaga Debidihondo au labe, Anduane Homogo Hongo Haiheore kago ibugua bi ogodagua ihondo larago hale habe. I bamba nogo sibi haru haga heria inime i dabaluhelaruruni Isaraele wali agali haru habelo agali haguane dabo helarugoni ke. <sup>9</sup> Dindi bibahende i ibaga bialu piriruniha ini iya haru mandagi ibagabu haabo haribagoni. Ani howa inime dege i waitigi ibiyaru wai bialu bo poda hana haga birugola i wayali harigoni. Ai inime i agali mini lene timbuni dindi maruha karubi dege habelo ina i mo yaraga holebero, laya labe. <sup>10-11</sup> Inaga Isaraele wali agali ti bayaleore halimulonaga dindi hobane bayale mbira tinaga mo wia ko. Bambaore agali ko bu hearume ti mo ko haabo hayadagua mani ti mo ko naholebira. Tinaga mamalirume dindi ogo pigane karulayangi howa bialu henego bima ibalu ina tinaga agali hagianeruhelarugoni dabo helaga birugolabi tinaga waitigime ti mo ko haabo haya, laya labe. Ani biyago ayu ina uruni ti mo batara harogola urunidagua nabi tinaga dindi ogobi lone mo ko naholebira. Ani kamigola ina i dameneru baya hanguore hai helarogola tigua inaga aguaneruhelarugoni dewaore helo hono wigi bulebira, laya lamibe, lalu Anduane Ho-



mogohanda Nadanahondo bi ogoni Debidihondo lamilo lamini.

<sup>12</sup> Anduane Homogo ibugua laabo lalu, Debidi-o í homaregola ínaga mamaliru hora hene-goha dege hora kangi í igini mbira kini ha aribia helo dabo helolebero. Ani berogola ibu kini hon-goheore mbiralime ibu bope lalu handape habe nahe holebira. ✧ <sup>13</sup> Kini ogoni ibugua wali agali ini koria kaware ibilonaga ínaga anda bulebira. Ani biragola ina maninaga ibu igini aguanerume dege kini haabo helolebero. <sup>14</sup> Ani helowa ibu aba ini kogola ibu í igini holebira. Ani howa ibugua mana lehe mbira biyagua abame ibu igini mana lagadagua ina ibu mana lalu bolebero. ✧ <sup>15</sup> Ala Solohanda mana lehe biyagola ina ibuhondo erembira mialu ibunaga henge wiago ina í mo ngirudagua mani í iginihondo ani nabi gubalini haho wiaabo helolebero.

<sup>16</sup> Ani helowa ínaga waneigini aguaneru lalu ereba nahe kini ha aribia haga bima puabo helolebero, laya lalu Debidi lamibe, lalu Anduane Homogohanda Nadanahondo lai hene. ✧

<sup>17</sup> Bi ogonidagua Anduane Homogohanda bi lamiyaruni Nadana ibugua hale howa Debidi lamiai hene.

*Debidihanda Anduane Homogohondo bi lenego ogo*

<sup>18</sup> Nadanahanda, Anduane Homogo ibugua bi anidagua laya, lalu lamiyagola Debidi ibugua hale lalu Balai Anda Anduane Homogo ibuni

---

✧ 7:12: Iba 89.3-4, 132.11, Yo 7.42, Ab 2.30 ✧ 7:14: Iba 89.26-27, 2 Ko 6.18, Hi 1.5 ✧ 7:16: Iba 89.36-37

heagoha pu biruwa lalu, Anduane Homogo Bibahende Haru Haame Ho Haga-o ína ihondo bayale dewaore birida. Ani bialu inibi inaga waneigini damene bu karubi ina bayale ndo hemaria anidagua biridagoni. <sup>19</sup> Anduane Homogo Bibahende Haru Haame Ho Haga-o ína ihondo bialu hariruni bibahende bayale dege biaabo harigo ai uruni emene degeyane mbirale bayale áyu uruni lone ngiatago harida. Anduane Homogo-o ína i dameneru mani íbu holebirarubi mo bayale holebero larigo ai i agali nagaloneore kogoni ndobe. Ani ha holiya dege ína ihondo mbirale bayale timbuni ihondo bule ngeru walia harida.

<sup>20</sup> Anduane Homogo Bibahende Haru Haame Ho Haga-o urunidagua biridagonaga ína ihondo bi agua loabe. I inaga biabe biahaga agali kogoni ini manda bide. <sup>21</sup> Ani manda buwa ína bi lo wirigonagabi inime bule hame ledegonagabi áyu ihondo inaga mana bayale biaga ngego i mo walia ho kegoni.

<sup>22</sup> Anduane Homogo Bibahende Haru Haame Ho Haga-o í duniniore kegoni. Í ale mende naheore lowa Ngode Datagaliwabe í hangu kegoni lalu ina mamalirume langigi biyane hale harima. <sup>23</sup> Ina Iyibi dindiha garabaya hemaria ína Isaraele wali agali bibahende garabaya golalu haru tagira ibuwa ininaga wali agali holomaya helarigoni. Ani helowa wali agali maru inaga wali agali ina kamarubi naheore. Ina dindini áyu kamagoria ibulumaya ína mbirale bayale tara tara nahendene ale wiarubi biai harigola ina inanaga dindi ogoria ibinigo kamagoni. Wali agali dindi

ogoriani ala hene hearu ina bo batagi hai halu tinaga dama mitangi bialu gime wabini wiaruni bo gialo wahai harigola dindi dabulu wiago ina mo ngirigola ibalu karulo harimago kamagoni. Anidagua birigome wali agali dindi bibahendeha karume í mini lene taraore ke lowa inaga mini yaraga halu ka.✧ <sup>24</sup> Anduane Homogo-o ina Isaraele wali agali kamaru ininagaore holomaya dabo helowa ina ani haabo holomaya helarigoni. Inibi nde inanaga Ngode Datagaliwabe haabo ho kegoni.

<sup>25</sup> Anduane Homogo Ngode Datagaliwabe-o áyu ina inaga dameneruhondobi inaga biabe biahaga inihondobi buleore lalu bi lo wiriruni biaaboore habelo hameledo. Ina bulebero lo wiridagua bibe laro. <sup>26</sup> Wali agali bu karume ina inahondo anidagua berego hondowa tigua inaga mini yaraga helo ani bibe laro. Ani hondowa tigua lalu, Anduane Homogo Hongo Haiheore kago ibu Isaraele wali agalinaga Ngode Datagaliwabe kagoni, lalu inaga mini yaraga holebira. Ani lalu kagola ina agali inaga aguane holebiraruha howa dege kini helo dabaga bialu haabo holebira.

<sup>27</sup> Anduane Homogo í Hongo Haiheore howa ina Isaraele wali agalinaga Ngode Datagaliwabe-o ina inaga biabe biahaga ihondo lalu, Inaga aguaneru bayale helonaga mo hongo holebero, lalu langirigonaga inaga biabe biahaga ini kogome ihondo gi nahe howa bi langerogoni.

<sup>28</sup> Anduane Homogo Bibahende Haru Haame Ho Haga-o ini hanguore Ngode Datagaliwabe

---

✧ 7:23: Man 4.34

kegoni. Ína mbirale mbira bule lalu lo werego biaore biaga kegoni. Ani biagaore kegome áyu howa ihondo heneneore mbirale mbira bule lalu bi lo wirigoni. <sup>29</sup> Ani bule lalu lo wiridagua bialu inaga dameneru ini andaneha howa bayale haabo helo helabe laro. Anduane Homogo Bibahende Haru Haame Ho Haga-o ina bi ogoni heneneore lo wirigome inaga turu howa biamogo buleneru inaga aguaneneruha wiaabo holebira, lalu Debidihanda Anduane Homogohondo bi anidagua lene.

## 8

*Debidi halu ibunaga amirume wai bialu wayali henego ogo*  
(1 Bi Te 18.1-17)

<sup>1</sup> Emene howa mani Debidi halu ibunaga ami agalirume Pilidialiru baba wai bini. Ani buwa tigua Pilidialiru bo poda hana hayagola Pilidialirume Isaraele dindi handayaho haga winigo wahalu pene. <sup>2</sup> Ani piyagola Debidi halu ibunaga ami agali biarume Moabaliru baba wai bialu urunibi bo poda hana hene. Bo poda hana howa Moabali uruni minu garabaya buwa ti bibahende dindini mo pale lene. Ani mo pale lowa tebira dege dege pale laga binidaru kira bo wahaga bialu tebonego helo yupe haga bini. Ani bialu Moabali yupe henedaruni ti Debidi andaneha howa ibu dagisi migi bialu helo helene.

<sup>3</sup> Ani helalu mani Debidi halu ibunaga ami agaliru tigua Siriaha dindi mbira mini Soba wiagoha kini mbira Lehobo igini mini Hadadese heagola wai bule pene. Ogongi Hadadese ibu

ibunaga amiru haru halu ibunaga dindi mbira Iba Yuberedisi poragohayagi waitigime karulo henego ogoni mo yu dai bule wai bu pene. Ani pu heagola Debidi halu ibunaga ami agali biaru harigani lola howa <sup>4</sup>ti wai bialu Debidi ibu wayali hene. Ani buwa Debidi ibugua Hadadesenaga ami agali dindi dindi piaga daosini dege pira kira (20,000) minu wialu nogo hosini biruwa wai bigaga agali daosini mbirani handari karia (1,700) minu wini. Ani bialu nogo hosime gili laga karisi handari mbira (100) mo wini. Ani buwa Debidi ibugua karisi uruni gili lalu pelonaga nogo hosi handari mbira (100) dege helalu hosi marunaga ge bo polaga biyagola ge hongo halu bayale pobe nahe hene.

<sup>5</sup> Ogoningi Siriali maru Damasagasa dindiha hearu tigua Kini Hadadese biamogo bialu wai bule pene. Ani piyagola Debidi halu ibunaga ami agali biarume wai bialu Sirianaga ami agali daosini dege pira kirani kira (22,000) bo wahai hene. <sup>6</sup> Ani bo wahai howa Debidihanda ibunaga ami agali maru Sirealime lone heyalu wai nabilo Siria dindi wiyadagoha mamage hai helene. Ani heleagola Siria wali agali ti Debidi andaneha howa tinibi ibu dagisi migi bialu hene. Dindi mbira mbiraha Debidi wai bule pugu biyagola Anduane Homogohanda ibu biamogo biyagola ibunaga waitigi bope halu ibuni wayali haabo hene. <sup>7</sup> Wai bialu howa Debidihanda Kini Hadadesenaga ami agali haguane hearume humbi ngolome wabini yu haga biniyaru mialu Yarusaleme yu pudaba laga bini. <sup>8</sup> Ani bialu Debidi ibugua ege tole boronosi dewaore Hadade-

senaga tano kira Beda tanola Berodai tanolaha wiaria mo yini.

<sup>9</sup> Ani bialu heagola Hamada dindinaga Kini Toi ibu hale halu hearia Debidihanda Kini Hadadesenaga ami agali bu hearu bibahende bope haya layago hale hene. <sup>10</sup> Ani hale howa Kini Toi ibugua Debidihanda o biyadagoni turu howa ibu igini Yorama Debidi hearia puwa í bayuwaore birida lama pu lene. Kini Hadadesehanda Kini Toi ibu bibahendengi bope haabo haga henego ai Debidihanda Hadadese bope hayadagonaga turu howa ani lene. Ani pu laya handala Yorama ibugua yári tara tara ngolomebi silibamebi boronosimebi wabini wiaru mo yaga binigo uruni Debidi mo turu halu bame migi bini. <sup>11</sup> Debidi ibugua mbirale uruni yamialu Anduane Homogonaga mo loma biaho wigi bini. Debidi ibugua dindi maruha wai bialu ngolo silibaru mo yalu dai bigi bini wiarubi loma biaho ngelaga dege bini. <sup>12</sup> Debidi ibugua ngolo siliba uruni minidaru Idomo dindiha howabi Moaba dindiha howabi Amono dindiha howabi Pilidia dindiha howabi Amalege dindiha howabi mo yu ibugu bini. Ani bialu Soba dindinaga Kini Hadadesenaga wiarubi mo ya dege bini.

<sup>13</sup> Ani bialu henego ai Debidi halu ibunaga ami agaliru tigua Idomoali hearu baba wai bule dindi mbira mini Dindi Ulini Ibi Wiaga laga wiagoria pene. Ani puwa tigua Idomoali ami dege daosini pira mbirani halira (18,000) bo wahai halu dai biyagola ogoningi Debidi ibu mini lene timbuniore ka laga hene. <sup>14</sup> Debidi ibugua ibunaga

---

✧ 8:13: Iba 60

ami agali maru dabalu Idomo dindiha handayaho helo helene. Ani heleagola Idomo wali agali ti Debidi andaneha hene. Dindi bibahendeha Debidi ibu baba wai bialu heagola Anduane Homogohanda Debidi ibugua ibunaga waitigi bo podahana haga bilo biamogo biaabo halu hene.

<sup>15</sup> Debidi ibugua Isaraele dindi bibahende handame ho howa ibunaga wali agaliru baba mana bayale tigabi bulene wiadagua dege bialu haga hene. <sup>16</sup> Ani bialu howa ibunaga ami agaliru haru bamba haga agali haguane wali mbira mini Seruia berenego igini Yoaba hene. Ahiludu igini Yahosabada ibu beba gili bia dagala biaga howa ibugua gabumanenaga mbugaru handayaho haga haguane mbira hene. <sup>17</sup> Ahidubu igini Sadogola Abaiada igini Ahimelegela libu Anduane Homogonaga loma binigo mo miaga agali hene. Seraia ibugua kininaga beba gili bia dagala biaga hene. <sup>18</sup> Ani bialu Yahoiada igini Benaia ibu nde ami agali maru Kini Debidi ibuni mamage haga Kerediali Peledealiru bu heago haru helo dabo helene. Debidi iginiru ti loma binigo mo miaga agali hene.

## 9

### *Debidihanda Mebibosedehondo bayale binigo ogo*

<sup>1</sup> Horo mbirungi Debidihanda agali bu hearuhondo hale halu lalu, Kini Solo aria waneiginibi mbira yu wahene kabe nahebe. Mbirali yu wahene heagua Yonadana ibugua

ihondo mana bayale bialu hayagonaga pani ina ibuhondo mana bayale biadai bulebero, lene.✠

<sup>2</sup> Odagoningi Solo damenenaga biabe biahaga agali mbira mini Siba henego maru hearume ibu lamialu, Kini hondole pu, lene. Ani laya handala ibu kini hearia ibiyagola kini ibugua ibuhondo lalu, Í Siba íbu kebe, lene. Ani layagola Sibahanda ladai bialu lalu, E agali haguane-o i agali ogoniore íbu kogoni, lene.

<sup>3</sup> Ani layagola kini ibugua Sibahondo lone hale halu lalu, Solo aria maru yu wahene áyu mbira kabe nahebe. Yu wahene mbira heagua ina ibuhondo mana bayale buliya hameledo. Bamba ina Ngode Datagaliwabhondo ogodaguaore bule lalu bi lo wirugodagua biaore bulebero, lene.✠

Ani layagola Sibahanda Debidihondo ladai bialu lalu, Yonadana igini mbira hangu kago ibu ge kohe ka, lene.

<sup>4</sup> Ani layagola kini ibugua hale halu lalu, Ibu agoha kabe, lene. Ani layagola Sibahanda kinihondo lalu, Ibu Lodeba tano wiagoria Amiele igini Magia andagaha ka, lalu lamini. <sup>5</sup> Ani layago hale howa kini ibugua lalu, Agali marume Yonadana igini ogoni haru ibule damu pudaba, lene.

<sup>6</sup> Agali ogoni mini Mebibosede ibu Yonadana igini Kini Solo aguane henego ibu Debidí bereagoria ibuwa ibugua Debidinaga mini yaraga halu ibu ge duli hanga howa bulu palialu denguime dindi ela hene. Ani biyagola Debidihanda ibuhondo lalu, Mebibosede-o horombe laro, lene. Ani layagola

---

✠ 9:1: 1 Sml 20.15-17 ✠ 9:3: 2 Sml 4.4



Mebibosedehanda ladai bialu lalu, Kini-o i inaga biabe biahaga agali kogoni, lene.

<sup>7</sup> Ani layagola Debidihanda ibuhondo lalu, Gi nahabe. Ina i aba Yonadana mitangi bialu ihondo mana bayale bule hame ledogo. Ai i mama Solonaga dindi ina wu heneru inihondo ngiadai biai holebero. Ani bialu inibi tomo i andagaha mandagi nalu habiya, lene.

<sup>8</sup> Ani layagola Mebibosedehandaibunaga ma podowa dengui dindini lone ela howa Debidinaga mini yaraga halu lalu, Kini-o agali nagaloneore i kogonidago irane aginaga mbirale bayale uruni ihondo buleberebe. I ko biango homo wahene ale ndobe, lene.

<sup>9</sup> Mebibosede tagira piyagola kini ibugua Siba olalu anda ibu lowa ibuhondo lalu, Inaga agali haguane Solo ibunaga dindi winiru bibahende bi ibu damenerunaga winirubi bibahendeore Solo ibuninaga aguane Mebibosede ibunihondo miadai bulebero. <sup>10</sup> Ani buleberogo ai inibi inaga igini bu karubi inaga biabe biahaga karubi tigua Solonaga dindi wiyadagoria tomo hangalimu. Hongowa boga bidagola Solo damenerunaga bu hanalu ibugu bilimu. Ani beregome Solo dameneru ti tomo nolene buru palia nabi karulape holebira. Ai Mebibosede ibuni dege tomo ini andagaha mandagi nalu haabo holeberaba, lene. Siba ibu iginiru nguira (15) halu ibunaga agali biabe biahagaru pira kira (20) hene.

<sup>11</sup> Ani layagola Sibahanda Debidihondo lalu, Kini-o ina bia lareruni bibahende biai holebero, lene. Mani howa Mebibosede ibu kini igini haradagua bialu horo bibahendengi ibu tomo kini

andagaha nalu haabo haga hene. <sup>12</sup> Mebibosede ibu igiri mbira henego ogoni ibu mini Miga hene. Ogoningi howa Siba ibu dameneru wali agalibi bibahende Mebibosede daluha biabe bialu hene. <sup>13</sup> Ani bialu heagola Mebibosede ibu ge kirabali ko kuduguhe howa ibuni tomo Kini Debidi andagaha mandagi nalu ibu Yarusalemeni haabo haga hene.

## 10

*Debidihanda Amonoali Sirialila bo poda hana henego ogo*

*(1 Bi Te 19.1-19)*

<sup>1</sup> Amononaga Kini Nahasa homayagola ibu igini Hanunuhanda ibu abanaga henge mialu Amono dindini kini ha aribia hene. <sup>2</sup> Ani heagola Debidihanda lalu, Hanunu aba Nahasa ibugua ihondo mana bayale bialu hagadagua inabi nde Hanunuhondo bayale dege bialu holebero, lene. Ani lowa Debidihanda agali maruhondo lalu, Hanunu karia puwa ibu aba homayadagonaga duguanda pialu daraba lole pudaba, lene.

Ani laya handala ti pialu Amono dindiha anda piyagola <sup>3</sup> Amonoali agali haguane bu hearume Hanunuhondo lamialu lalu, Ina mandabu handalu keria Debidihanda agali o pu layadaruni heneneore í aba dara haluibunaga mini yaraga hole pudaba lene ibiyadalo manda bidebe. Anidagua ndooreyago. Maniibunaga ami agaliru haru halu ibuwa ina baba wai bulenaga áyu agali urunime inanaga dindi ngamago abidabe diri hondo wule pudaba lenego ibu ka, lene.

<sup>4</sup> Ani layago hale howa Kini Hanunu ibugua agali Debidihanda bi yalu pudaba lene biaru

minu yania howa tinaga angari hearu mende-  
hayagi podo wahalu mendehe helene. Ani bialu  
agali uruninaga aga luni biagimbu biaruni poda  
tubagi howa here panahe heagola tini dalu dai  
bilene. <sup>5</sup> Anigo agali biaru ti nde taga timbuni  
howa tini dalu dai bibe nahe hene. Anidagua  
biya layago Debidi ibu hale howa ibugua agali  
biaruhondo bi lo pelalu lalu, Tigua tihondo o  
biyadagoninaga Yarusaleme dai bulenego taga  
nahalimu. Abale ibalu Yarigo tanoha tinaga angari  
lone ibilonaga emene hondo halimu. Mani tinaga  
angari bayale ibidagola nde Yarusaleme dai bil-  
imu, lalu Debidihanda lawia hene.

<sup>6</sup> Ani binigo Amonoali biaru tigua mandabu  
handalu hemiria tigua mana lehe o birimago-  
nime Debidihanda ti baba keba helonaga mo  
tandaga harimadalo manda bu hene. Ani manda  
bialu tigua agali maru Siria dindiha Bedere-  
hobo tanoha bu hearu bababi agali maru Soba  
tanoha hearu bababi bi pongo bo wule pene.  
Tano uruniha hearu tigua ami agali daosini dege  
pira kira (20,000) Amonoaliru biamogo bialu wai  
bule ibilelonaga bi yalu pelene. Ani bialu tigua  
Amonoali uruni tigua Tobo tanoha ami agali  
daosini homberia (12,000) haru anda pene. Ani  
bialu Amonoali tigua dege Maga dindiha kini  
heago baba bi pongo bo wialu ami agali daosini  
mbira (1,000) wai bialu ti biamogo bilonaga haru  
anda ibini. <sup>7</sup> Ogonidagua wai bule agali mialu  
ka layago Debidi ibu hale howa ibugua ami haru  
bamba haga agali haguane Yoaba halu Isaraele-  
naga ami agali bibahende wai bule pudaba lene.  
<sup>8</sup> Ani piyagola Amonoali ami biaru tibi nde Laba

tano wiagonaga pabe kawareni handayaho hene. Ani heagola Sirialirubi Toboalirubi Magalirubi ti nde ibuwa naina dangi wiagoria tidiyu hene. Tigua Isaraele ami agaliru baba dege wai bule-naga ona tidiyu haga haga bini.

<sup>9</sup> Yoaba ibugua handalu hearia Isaraele baba wai bule ami agali tidiyu haga haga biago hondowa wai hama kirani talebuki howa wai bibeheyane hendene. Ani hondowa ibugua Isaraeleali hongohuru maru tale bialu Sirialiru amu dangi wiagoria tidiyu heago baba wai bule handayaho helowa ibunime haru hene.

<sup>10</sup> Ibu hamene Abisaihandabi nde Isaraele ami agali hearu halu mende haru howa ibugua nde Amonoali hearu baba wai bule tidiyu naina handayaho hene.

<sup>11</sup> Ani howa Yoaba ibugua Abisaihondo lalu, Wai bialu howa handalu keria Sirialirume ina bope habeheyane handarimiyagua nde tigua ina mo hongo halu wai bule abale ibalimu. Iname handalu kamaria Amonoalirume ti bope habehe biyagua nde inamebi abale ibalu ti biamogo buleberema.

<sup>12</sup> Ani bimiyago tigua wai bialu howa gi nahe hongo ho halimu. Iname wai bialu howa inanaga wali agali waneigini andaga bu karubi inanaga tano Anduane Homogohanda ina ngini ngamarubi mitangi bialu wai hongo howaore bimiya. Anduane Homogohanda nde ibunime hame ledadagua bilo laro, lene.

<sup>13</sup> Ani lalu Yoaba halu ibunaga ami biaru tigua Siriali bu hearu baba wai bule hapara halu piyagola Sirialiru ti ibida pene. <sup>14</sup> Amonoali biaru tigua handalu hearia Siriali biaru ti ibida piyago

hondowa Amonoali tibi nde Abisai halu ami agali biaru ibiya handala ibida pialu tanonaga wai pabe tamuha ha do hai hene. Ani biya handala Yoaba ibugua Amonoali uruni ani helo wahalu ibunaga ami agali biaru haru halu Yarusaleme dai bini.

<sup>15</sup> Siriali biaru tigua handalu hemiria Isaraele agalirume ti bope hayiyane handalu tinaga ami agali hearu mo mogo bini. <sup>16</sup> Ani buwa Kini Hadadesehanda agali maruhondo, Siria ami agali maru Iba Yuberedisi angeha wai bialu hearu lone damu pudaba, layagola damu pialu bibahende haru daibu howa tidiyu hene. Ti bibahende dindi Helama mbira wiagoria íbu ngoaiho heagola Hadadesenaga ami agaliru haru haga agali haguane mbira mini Sobaga heagome ami agali uruni haru hene. <sup>17</sup> Siriali biaru ti Helama dindini tidiyu íbu ka layago hale howa Debidi ibugua ibunaga Isaraele ami agali bu hearu abale olo ngoai hene. Íbu ngoai heagola Iba Yodana abale doma ede halu Helama dindini wai bule pene. Ani piyagola Siriali biaru tigua ho dugu bialu Isaraele baba wai bini. <sup>18</sup> Ani biyagola Isaraele ami agali hearume wai hongo howaore bialu Siriali bo heladai bini. Horo ogoningi Debidi halu ibunaga ami agalidarume Siria ami agali karisini heyu howa wai biaga hearu handari karia (700) bo wahalu nogo hosini biruwa wai biaga daosini dege pira maria (40,000) bo wahene. Ani bialu Sirianaga ami agaliru haru haga agali haguane Sobagabi wai hamani bope hayangiore tongolo mini. <sup>19</sup> Abale kini maru Sirianaga Kini Hadadese andaneha haga henerume han-

dalu hearia Isaraeali ti hongoheore howa Siriali bope hayago hondowa tigua Isaraeali baba gi tigani bialu tini Isaraelenaga andaneha hene. Ani hayagola Siriali biaru tigua Isaraealiru hondowa gi timbuni halu tigua Amonoaliru lone bi-amogo bulene manda nabi wahalu wahene.

## 11

*Kini Debidi ibu Uria one Badasebala mana ko binigo ogo*

<sup>1</sup> Mali bibahendengi dindi uruniha kini hearume dagare biaga horo winigo piai haragola tinaga ami agaliru haru halu puwa tinaga waitigiru baba wai biaga wini. Debidihanda Sirianaga ami agali biaru baba wai biai howa mali mbira howa dagare biaga horo winigo piai hayagola ibugua ami haru haga agali haguane Yoababi ibunaga haru haga agali hearubi Isaraeali agali haguane maru hearubi ti bibahende Amonoali ami agali hearu baba wai bule pudaba lene. Tigua puwa wai bialu bo podama piaho wialu uyura Laba tanoni podahana hene. Anigo ogoningi Debidi ibuni wai nape Yarusaleme tanoni hondo hene.✧

<sup>2</sup> Ani hondo hearia horo mbirungi Debidi ibu palenego ai alendoore hayagola heyalu tagira pene. Ibuni anda ogoninaga daligaha wá handape hagabu biraga mbira wini. Ani wiagoria Debidi ibu iraga halu puwa ogoriani ibagabu hene. Ani ibagabu howa wá handa amunana bialu hearia wali baya mangabiore mbira amuna wayawayaya balu hearia hendene. <sup>3</sup> Ani hondowa

---

✧ 11:1: 1 Bit 20.1

Debidihanda agali mbirahondo lalu, Wali ogoni aidabe hondole baya hangu goaru hondole pu, lene. Ani laya handala agali biagome puwa goaru handalu hearia wali biago ibu Eliama wane mini Badaseba Hidiali ami agali Uria mbira henego one bereneyane hondowa Debidi lamini. <sup>4</sup> Ani lamiyagola Debidi ibugua agali maruhondo lalu, Wali ogoni ibu i kororia haru ibule pudaba, lene. Horo ogoningi Badaseba ibunaga ege bolangua halu bayale dodo mbira para nahe birule lowa tinaga mana winidagua bialu berearia damu pene. Haru halu ibiyagola Debidi ibu haru pialalu mani Badaseba ibu nde andaga dai bini. <sup>5</sup> Emene biruwa Badaseba ibugua handalu hearia ibuni ege habo lalu waneigini gali tombeha bere biraruyane hondowa Kini Debidi hearia bi lawia hene.

<sup>6</sup> Ani biniyane handalu Debidihanda ami haguane Yoabahondo bi lawia halu lalu, Hidiali Uria biago i kororia abale pu labe, lene. Ani layago hale halu Yoabahanda Uria Debidi hearia dai bia lene. <sup>7</sup> Uria ibu Debidi hearia abale ibiyagola Debidihanda ibuhondo hale halu lalu, Yoaba halu ibunaga ami biaru bayale kabe. Wai agua bialu kabe. Iname bo podahana habehebe be agua bialu kabe, lene. Ani layagola Uriahanda bibahende wai hamaha biyaru Debidi lamiai hene. <sup>8</sup> Ani lamiai hayagola Debidihanda Uriahondo lalu, Ai te bayale hale harugonigo áyu ini andaga puabo halu wayawaya balu emene halo hole pu, lene. Ani laya handala Uria ibu kini berea handala tagira pialu pene. Emene biruwa Debidihanda Uria mo turu hole mbirale

bayale wiaru maru agali mbirame yalu pu lene. <sup>9</sup> Anigo Uria ibu andaga nape kininaga mamage haga agali maru kini andaga harabani palearu heba mandagi palu hene. <sup>10</sup> Agali marume Kini Debidihanda lamialu lalu, Uria ibu andaga nape ka, lene. Ani laya handala Debidihanda Uria hearia puwa lalu, Bambaore í andaga yu wahalu tagira pu harigodago ai áyu andaga nape aginaga haribe, lene.

<sup>11</sup> Ani layagola Uriahanda ladai bialu lalu, Isaraelenaga amirubi Yudanaga amirubi bibahende amu wai hamaha hai lalu Anduane Homogonaga Habo Nalolene Bi lo winigonaga Mbogoyi biagobi ti heba wai hamaha yu ka. Inanaga ami haru haga agali haguane Yoababi agali haguane marubi ti bibahende wai hamaha hai kago ti ani helowa í tomo ibabi nalu í one heba mandagi palialu ani bulene nakarulape manda bido. Heneneore larogo anidagua nabuleore, lene. <sup>12</sup> Ani layagola Debidihanda lalu, Karulapego áyu ona lalu paliabe. Yawi wai hama dai biloliya, lene. Ani laya handala Uria ibu Yarusalemeni ho paluwa horo mendengi alendo <sup>13</sup> Debidihanda Uria ibu andaga íbu lowa tomo ibabi nalu biruwa lulu iba Uria dewa nelu miyagola nowa luluyu helene. Ani biyagola Uria ibu ibuni andaga palima pu nabi ibuninaga balangiya heneneoyagome yi howa ami agali maru kini mamage howa paliaga palearu heba mandagi palene.

<sup>14</sup> Palialu egerebalene Debidihanda beba mbira Yoabanaga gilibu wia lalu Uria ibugua mo yalu wai hamaha dai bialu beba ogoni Yoaba mibe



lene. <sup>15</sup> Beba ogoniha Debidihanda bi ogodagua gilibu wini. Ibugua lalu, Uria ibu ami agali maru heba wai hongohe biragoria timu deneni minu bamba habe. Ani pu kagola Uria waitigime belo ami agali maru ti emene hadai bilimu, lene. <sup>16</sup> Yoaba halu ibunaga ami agali biaru Laba tano bo podama anda pialu tano ti karulole wai bialu hene. Ani howa Yoaba ibu Debidihanda beba gilibu wia hayiyago mialu hondowa Uria Amonoalirume wai hongo howa bialu heagoha minu bamba helene. <sup>17</sup> Ani minu bamba ho helegola Amonoali ami hearume tano pabe yu wahalu tagira ibuwa Yoabanaga ami agali biaru baba wai bini. Wai ogoni biyadangi Debidinaga ami agali maru balu Uriabi nde bayagola ti haru homai hene.

<sup>18</sup> Mani howa Yoabahanda wai biyarunaga te Debidu hearia lope hole <sup>19</sup> ibu agali mbira heagome te ogoni lamima pelo ibuhondo lamini. Ani lamialu lalu, Ina kini hearia puwa ibuhondo wai ogodagua birima lalu birimadagua bibahende lamiai habe. <sup>20</sup> Ani lameregola kini ibugua keba halu bi ogodagua lolebira. Tigua wai pabe anda heagoria wai kaware aguanaga anda pirimibe. Kaundiani howa wai bialu ha nabirimidago waitigi hayadarume wai pabe neneni howa timume badali halu ti bolebirago manda bidamigo buwa dege pirimida, lolebira. <sup>21</sup> Bamba Abimelege benegonaga te ti manda nabi henebe. Gideonu igini Abimelege ibu Tebese tano wiagoria wai pabe kaware howa wai bialu hearia wali mbirame ege tole balawa wabule widi dambiaga mbalape timbuni wiagome pabe neneni howa

bape halu Abimelege bene. Ai te ogoni manda buwa agua bule wai kaware anda pirimibe, lalu layagua nde Uria heba bo wahaya lamibe, lene.✧

<sup>22</sup> Ani laya handala agali te yalu abale piyago ibugua Debidi hearia puwa te lamini. <sup>23</sup> Ibugua lalu, Waitigi biarume tano tamuha howa wai hongo howa bima tagira ibalu hama dombe wiagoria hongo howa wai birima. Ani bialu howa inamebi nde wai hongo howa bialu ti tano pabe anda haraba wiagoha tali dai birima. <sup>24</sup> Ani bialu hearia Amonoali maru wai pabe neneni handape ho howa timu badali hayarume inanaga ami agali maru baya. Ami agali homayadaruni aria mbira Uria halu homaya, lalu kini lamini.

<sup>25</sup> Ani layagola Debidihanda agali bi bibi yalu ibiyagohondo lalu, Ina Yoaba karia dai buwa ibu wai bilo mo hongo halu bi ogodagua labe. Agali abogo ibuore homolebira lowa ndo wai biaga. Agali maru homayagonaga ina miniha genda nahabe. Ina wai hongo howa bialu Amonoalirunaga tano ogoni bo podama anda pialu tano ogoniore emene nawuleore bo giala holebu wahai habe, lene. <sup>26</sup> Mani Badaseba ibu agalini Uria waime baya layago hale howa dara timbuni halu dugu bialu berene. <sup>27</sup> Duguanda hai howa dara embeda heagola Debidihanda, Badaseba ibu i andaga haru ibule pudaba, lene. Haru ibiyagola Debidi ibu dabu buwa Badasebahanda Debidinaga igini mbira taba hono berene. Anigo Debidihanda mana ogonidagua biyagonaga Anduane Homogo ibu turu nahe hene.✧

---

✧ 11:21: Hgn 9.53 ✧ 11:27: 1 Sml 12.9, Iba 51.4

# 12

## *Debidihanda ko biyago Nadana ibugua lapani henego ogo*

<sup>1</sup> Anduane Homogohanda ibunaga bi mana latagi haga Nadana Debidi karia pu layagola ibugua puwa ogodagua lamini. Ibugua lalu, Tano mbirani agali kirali heneya. Agali mendego ibu muni mbiraleru dewawi homogo timbuniore halu mendego ibu ko yagibano mbirale emene hangu wu heneya. ✧ <sup>2</sup> Agali homogo ogoni ibunaga nogo bulumaga sibiru dewaore hinu heneya. <sup>3</sup> Anigo yagibano biago ibu nde nogo sibi angibuni mbiraore hangu hinu heneya. Agali biago ibugua sibi ogoni munime yolo biniyago ibunaga waneigini heba mandagi halu ho anda heneya. Agali ogoni ibugua tomo nalu ibunaga sibibi ibuni nayago ale nala ho mialu iba agali biago ibuni gabo beha howa nelo miaga heneya. U palelo ibuni buha palelo palelaga heneya. Ogonidagua biagagome sibi ogoni ibu waneore haradagua biaga heneya.

<sup>4</sup> Anigo horo mbirungi agali mbira agali homogo biago andaga nenege ibiniya. Ani ibiyagola homogo biago ibugua ibu nenege ibiyagonaga ibuni sibi hayaruni aria mbira bo dawa nahe helo wahowa agali yagibano biagonaga sibi mbiraore hangu hene biago bo puwa ibu nenege biagonaga nelo bo dawa heneya, lene.

<sup>5</sup> Nadanahanda bi ogoni layago Debidi ibu hale howa agali homogo biagohondo keba timbuniore

---

✧ 12:1: Iba 51

ho wia halu lalu, Anduane Homogo haluhe kagoga minini howa heneneore larogo agali mana ko ogonidagua biagago ibu homelo bo waholene nga. <sup>6</sup> Agali homogo ogoni ibuha mendeali kago mitangi halu dara holene nawi howa bialu hayadagonaga ibugua ibuninaga sibi mariame dano hongolene nga, lalu Debidihanda ladai bini.

<sup>7</sup> Ani layagola Nadanahanda Debidihondo lalu, Agali haguane ogoni ini o kegoni ndobe. Anduane Homogo Isaraele wali agalinaga Ngode Datagaliwabe kago ibugua ihondo bi mbira ogodagua lara. Ina i Isaraele wali agalirunaga kini habelo dabo helaru. Ani helowa ina i biamogo bialu hewagola Solohanda i ba nabi bayale hari. <sup>8</sup> Ogonidagua helowa Solo andagabi ibu one berearubi ibunaga mbirale wiarubi bibahende ihondo ngiai harugo. Ani bialu ina Isaraelenagabi Yudanagabi kini i hangu helarugoni. Uruni birugo bibahende nakarulapedale nde dewa dege ngiatago halu bidole. <sup>9</sup> Ani birugo irane aginaga ina inaga bi mo wahalu inaga deni mana ko ogoni biribe. Ina Amonoali waitigi biarume Uria bo wahelo tinaga giha minu ya halu ibu one i aribia hariyago. <sup>10</sup> Ai baya hangu hale ha. Ina i mo yondowa Hidiali Uria ibu one i halu ibuni homelo bo wahariyago. Anidagua biriyagome maniore i waneigini aguaneru mbira homelo bo waholene wiaabo holebira, lalu Anduane Homogo ibugua bi ogoni ihondo lara, lalu Nadanahanda Debidilamini.

<sup>11</sup> Nadanahanda Debidihondo lone lalu, Anduane Homogo kagome ihondo bi ogodagua larago hale habe. Ina ini igini bu karuni mbiragome

genda timbuni yu anda ibilolebero. Ani bialu í one bedaru agali mende hado merogo ína de hondolebere. Ani berogola ibugua wali uruni hama dombeni kayu yalu holebira.☆ 12 Mana ko ína bialu haridago ohowa bialu harigoni. Ína mana ko ogoni biridagonaga pani ína biadai buleberogo Isaraele wali agali karu bibahendenaga deni howa horombe hama dombeni mo bia holebero, laya lene.

13 Nadanahanda bi ogoni layago hale howa Debidi ibugua Nadanahondo lalu, Ina Anduane Homogonaga deni howa ibuhondo mana koore biru, lene.

Ani layagola Nadanahanda ibuhondo ladai bialu lalu, Anduane Homogohanda ína mana ko birigo domo wahayago í nahomolebere. 14 Ai ína ani birigome Anduane Homogonaga waitigi karume ibunihondo mine helonaga birida. Ani birigonaga ínaga igini Badasebahanda taba honolebirago ibu homolebira, lene.

15 Nadana ibugua Debidihondo bi uruni lai halu ibu andaga pene.

### *Debidi igini homenego ogo*

Mani Debidi igini Uria one ibu kayu bini Badasebahanda taba hanayago Anduane Homogohanda warago ko timbuni ibuha anda ibilene. 16 Igiri dabi helo Debidi ibugua igiri mo dabi helonaga Ngode Datagaliwabehondo bi la haabo halu hene. Ani lalu howa ibu iba hinaru nane wahalu aga balangiyaru mbira dunga nabi tamuni bame paliaga bini. 17 Ibumaga agali biabe biahaga ala

---

☆ 12:11: 2 Sml 16.22

hene wahe hearume Debidi palearia puwa mo heya hole bialu hearia nabibehe ibu mangaore hene. Agali uruni baba mandagi biruwa tomo nolenebi manga dege hene. <sup>18</sup> Ani howa sarere mbira peagola igiri gali biago homayagola agali biarume igiri homaya lalu Debidi lamulene giho hene. Tigua lo manda bialu lalu, Abale igiri warago hangu bo wiagola iname ibu mo bila agua hoabe tobahe wiagodago. Ai áyu igiri homaya aguaore lamimabe. Ibuni mo ko holene mbira buligo agua bimabe, lene.

<sup>19</sup> Debidi ibunime handalu hearia tigua bi ohowa tini hangu la la bialu hemigo hondowa ibugua manda bialu ai igiri biago homayadalo manda bini. Ani manda buwa ibugua tihondo lalu, Igiri homayabe, lalu hale hene. Ani layagola tigua ladai bialu lalu, E ibu homaya, lene.

<sup>20</sup> Debidi ibu tamu dindi wiagoria bame palenego ai igiri homaya layago hale howa abale heyalu ibaha wayawaya bole pene. Bo puwa manda kumu bialu weli ngabi mini sanda wiago ibuni tinginini hai<sub>1</sub> halu aga bayale wiaru mo karulene. Ani bialu Debidi ibu Anduane Homogonaga andaha lotu lole pene. Lotu lalu dai buwa ibunaga tomo dawaga igiri hearuhondo tomo noliya dugu talebu ngidaba lowa tomo dugu miyagola nene. <sup>21</sup> Debidinaga biabe biahaga agali hearume ibugua ogonidagua biyago hondowa ibuhondo lalu, Mana agigo ina beregonibe. Igiri homa nabi ngelowa ina ibunaga dugu biaabo halu tomo nane harigo. Áyu ibu homayagola ina heyalu tomo nalu kegoni mana agigo o beregonibe, lene.

<sup>22</sup> Ani layagola Debidihanda tihondo ladai bialu lalu, I igini nahomeha ina dugu bialu tomo nane harugoni irane Anduane Homogohanda i dara howa i igini mo dabi helonaga biru. <sup>23</sup> Ai áyu ibu homayadago tomo nane waholene aginaga. Tomo waharogola i igini lone heyulebirabe. Ani ndoyago. Inibi nde mani ibu piyagoha dege pole kogoni ndobe. Anigo ibugua dege ini koria dai nabulebira, lene.

*Badasebahanda Solomono taba henene go*

<sup>24</sup> Debidihanda ibu one Badaseba miniha gendaho biruligonaga mo palia halu bi bayale laga bialu hene. Mani Debidi ibu one heba mandagi palu howa Badasebahanda Debidi igini mbira taba henene. Debidi ibugua igiri gali ogoni mini Solomono wini. Anduane Homogohanda igiri gali ogoni gubalini timbuni ho hene. <sup>25</sup> Ani howa Anduane Homogohanda ibunaga bi mana latagi haga agali Nadanahondo lalu, Debidi karia puwa igiri gali ogoni mini Yadidia wibe lalu lamibe, lene.\*

*Debidihanda wai bialu Laba tano karulene go*

*(1 Bi Te 20.1-3)*

<sup>26</sup> Horo ogoningi ami haru haga agali haguane Yoabahanda ami haru howa Amonoalirunaga tano timbuni Laba wiagoria wai hongo howa bialu hene. Ani bialu howa lene mbirahayagi bo podama anda pialu karulene. <sup>27</sup> Anidagua bialu howa ibugua Debidihondo bi lo pelalu lalu, Ina

---

\* **12:25:** Mini Yadidia ogoni inanaga bi lalu, Anduane Homogohanda ibu gubalini timbuni ho ka, laga.

Labaliru baba wai hongo howa bialu tinaga iba hambiaga wiago karularu. <sup>28</sup> Ani birugo ai ina ami maru andaga Isaraele dindiha yu wahayaru mo mogo bialu haru halu abale ibalimu. Wai bialu Laba tano anda pialu karulai hamiyago abaleore ibalimu. Ami agali ina haru kogome hangu anda pialu karularimayagua nde wali agalime tano ogoni mini wialu inaga mini lalu wulebira, lene.

<sup>29</sup> Bi ogonidagua lama ibiyago Debidi ibu hale howa ibunaga ami agali mo mogo bialu haru halu puwa Laba tanoha wai bialu podama pialu anda puwa tano karulene. <sup>30</sup> Ani anda puwa Amonoali kini heagonaga manda ngolome wabini karulo bereago Debidi ibunioreme anda pialu golene. Kininaga manda ogoni ngolome wabini ibunaga genda magi manda pira tebirani duria agima (35) kilogarama wini. Manda ogoni tole baya tara tara muni dewaoreme yolo biaga wiarume mo yaribia heneyago Isaraeleali ami agali biarume Debidi-naga hagianeni mo karula hene. Ani bialu Debidi ibugua tano ogoniha muni mbiraleru dewaore winiru mo yalu pene. <sup>31</sup> Ani buwa ibugua wali agali Laba tano ogoniha heneyaru bibahende minalu biabe tara tara dindi aluenerubi ayume bulene wiarubi some podolene wiarubi biai helo mo ta hai hene. Marume anda bulenaga ege timeni ale mbirigi wabilo helene. Amono dindiha tano wiaru bibahendeni wali agali bu hearu anidagua dege biai hene. Ani biai halu mani emene howa Debidi halu ibunaga ami agali biaru ti Yarusaleme dai bini.



# 13

## *Amanono Tamalanaga te ogo*

<sup>1</sup> Debidi igini Amanono henego ibugua Debidi igini mende Abasalomo mbalini baya taraore mbira mini Tama bereago ibu dimagoli ho haga hene. <sup>2</sup> Anigo Tama ibu agali mbirali baba mandagi palia nabini berene. Ani bereagola Amanono ibugua Tama berearia puwa ibu minu yania holene henge nawiyagola hame lowa ibunaga miniha mini burugu lalu dimagoli warago bo wini.

<sup>3</sup> Anigo Amanono ibu nenege mbira Debidi hamene Sama igini Yonadaba ibu mini ohewi henego ogoni ibugua biabe ohowa bulene hariga tara tara taya biaga hene. <sup>4</sup> Ani biaga henego horo mbirungi Yonadaba ibugua Amanonohondo lalu, Kini igini-o horo bibahendengi í mini burugu lowa gendaho dege heria handarugo agua biyadabe, lene.

Ani hale hayagola Amanonohanda ladai bialu lalu, Iore í hamene Abasalomo mbalini Tamaore hame timbuni lo kogoni, lene.

<sup>5</sup> Ani layagola Yonadabahanda lalu, Ai í ke howa warago bo wini tingi halu dagiaha palue pu. Ani paderia í abahanda hondo ibiyagua ibuhondo au labe. I mbalini Tama ogoria tomo dawale ibilo hameledo. Ani bialu inaga deni howa ibunime dawalu ibunaga gime yu ibalu í noliya ngilo hameledo lalu lamibe. Ina kinihondo ke howa bi ogonidagua lamiriyagua ibugua Tama í bederia pu lolebirago ani labe, lene.

<sup>6</sup> Ani layagola Amanono ibugua Yonadabahanda o layadagua bialu ibu warago bo ngo lalu ibuni dagiaha palene. Ani paleagola Kini Debidi ibu igini Amanono warago bo nga layago hale howa ibu Amanono andaga hondo pene. Ani piyagola Amanonohanda lalu, I warago bo ngogo ai i mbalini Tama inaga tomo kegiru mbira hira halu ibunime yu ibalu ngilo i andaga pu labe, lene.

<sup>7</sup> Ani layagola Kini Debidi ibugua Tama andaga berearia bi lawia halu lalu, I mbalini Amanono andaga puwa ibunaga tomoru dawa hole pobe, lene. <sup>8</sup> Ani layagola hale halu Tama ibu mbalini Amanono andaga puwa Amanono ibuni dagiani palearia hendene. Ani paleagola Tamahanda balawa maru wabuwa parabane wiagoria hiralu berearia Amanono ibu handayaho berene. <sup>9</sup> Ani hirai howa Amanono ibuninaga beledi wiagoria dugu miyagola ibu nabe manga hene. Manga howa ibugua lalu, Agali tamuha hearu bibahende tagira piai hadaba, lene. Agali tamuha hearu bibahende bi ogoni hale halu tagira piai hene.

<sup>10</sup> Tagira piai heagola Amanonohanda Tamahondo lalu, Kegi uruni noliya inime i paliaga tamu ogoria mo yalu ibu, lene. Ani laya handala Tamahanda kegi biaru ibuni palearia yalu anda pene.

<sup>11</sup> Ani yalu anda piyagola Amanonohanda minu yania howa lalu, Mbalini-o dagiani palibiya ibu, lene.

<sup>12</sup> Ani layagola Tama ibugua turu nahe howa hongo howa lalu, I mbalini-o ani nabuleore ina ihondo mana ko ogonidagua biba lolene nawi. Ina Isaraele wali agalime mana ko ogoniale nabiaga

ngagoni. <sup>13</sup> Ína mana ko ogoni biriyagua iha taga timbuni halu wali agali bu karunaga deni ibagabu habe nahe holeberogo nabuleore. Íbi nde Isaraele wali agali bu karume í mo ko halu mo ngubia holebirago nabule. Áyu bulene nawigo ína kinihondo ala hale holene nga. Ani hale haregola ína í nadabubibe nalolebirago hale holene nga, lene. <sup>14</sup> Ani layago lelowa Amanono ibugua Tamahanda bi layago hale nahe tingi howa íbu hongo timbunihe heagome Tama minupe halu kayu yini.

<sup>15</sup> Amanono ibugua ogonidagua biai howa mani Tama handabe manga hene. Abale howa ibugua Tama hame timbuni lo hayago áyu íbu hame nale howa handabe manga timbuniore ho hene. Ani manga howa ibugua bi hongo howa Tamahondo lalu, í abale ogoria nabere heyalu tagira pu, lene.

<sup>16</sup> Ani layagola Tamahanda ladai bialu lalu, Ani ndo. Ína ihondo áyu birigo emene ale lowa í pu lariyagua mana ko ogoni ko timbuniore bulebere, lene. Ani layagoyu Amanono ibugua Tamanaga bi uruni hale habe manga hene. <sup>17</sup> Ani howa ibugua ibunaga biabe biahaga agali heago olalu íbu lowa lalu, Wali o bedago abaleore minu batagi ha. Í íbuore nahondolego minu batagi howa panga payatagi habe, lene. <sup>18</sup> Ani layagola biabe biahaga agali biagome Tama minu batagi halu panga payatagi hene. Kini wanerunaga mana ti agali nape biruwa aga baya tara mbira gi lu biagimbu biaga winigo karulo haga wini. Ainde Tama íbu Amanono andaga pole howa aga ogoniale buyalu pene. <sup>19</sup> Anigo Amanono íbu andagaha howa minu batagi hayagola Tama íbu dara timbuniore

ho berenego walia halu ibunaga aga bayale bi-ago minu budalu ibunaga haguani bebi dugu wialu bini. Ani bialu ibunaga gi haguani paga howa dugu hongo howa bima pene. <sup>20</sup> Ani dugu bima pialu hearia hondowa Abasalomohanda ibu mbalini Tamahondo hale halu lalu, Dugu bima eberego agi. I mbalini Amanonohanda ihondo mana ko biyabe. Ani biyagua i genda nahe ibu i mbalini ndoyabe. Anigo ogoale biya lalu wali agali maru karu hale holani handabe, lene. Ani laya handala Tama ibu Abasalomo andaga puwa ogoniha berene. Ani biruwa ibunaga miniha genda yu biraabo hene.

<sup>21</sup> Debidi ibugua Amanonohanda mana ko ogoni biya layago hale howa ibu keba timbuni hene. <sup>22</sup> Amanonohanda Abasalomo mbalini Tamahondo mana ko biyiyagola Abasalomo ibugua keba timbuniore howa ibu Amanonohondo bi bayalebi kobi mbira naleore hene.

*Abasalomo ibugua Amanono bo wahole hariga taya binigo ogo*

<sup>23</sup> Mali kira piyagola Abasalomonaga biabe biahaga agaliru Balahaso dindi wiagoria nogo sibi irini podalu hene. Dindi Balahaso ogoni Eberaimi tano kawareni dege wini. Ani podalu howa Abasalomohanda kini iginiru bibahende ibai halimu lene. <sup>24</sup> Abasalomo ibugua Kini Debidi hearia puwa lalu, Kini-o inaga biabe biahaga agali karume inaga nogo sibi irini podalu kago ainde ina tomo timbuni dawale manda bido. Anigo

ínaga agali haguane bu karu tomo namiya ínì heba ibulene karulapebe, lene.

<sup>25</sup> Ani layagola kini ibugua ladai bialu lalu, Ì igini-o ina bibahende dewalidago ibai harimayagua iname í mo genda holigo naibuleberema, lene. Anidagua layago lelowa Abasalomo ibugua harugo ibalimu lalu hongo howa laabo hayagolabi kini ibugua nde naibuleberema la dege bialu hene. Ani lowa lalu, Abasalomo-o í turu halu pamia, lene.

<sup>26</sup> Ani layagola Abasalomohanda lalu, Aniyagua nde ì hamene Amanono ibu dege ibilo wahabe, lene. Anidagua layagola kini ibugua lalu, Ibu hangu aginaga ibilobe, lene.

<sup>27</sup> Ani layagola Abasalomohanda bi hongo halu ibilooze layagola nde kini ibugua Amanono halu kini igini maru hearubi pudaba lene.

<sup>28</sup> Ani laya handala Abasalomo ibu Debidi helalu Balahaso dai buwaibunaga biabe biahaga agali bu hearuhondo lalu, Tomo nalu bedamangi tigua Amanono baya hanguore mamage ho halimu. Ani howa ibu lulu iba dewa no bedago hondowa ìna badaba laruyagua abale balimu. Tigua ibu bolene gi nahe howa balimu. Inime balimu lalu langerogoni ndobe. Ani manda bialu ibu bolene mogo nale hongo ho howa balu home lalimu, lene. <sup>29</sup> Abasalomohanda ani bilimu lamiyadagua agali biabe biahaga hearu ti tomo nalu Amanono ma yu biruwa Amanono ibu lulu iba dewa nalu luluyu bereago hondowa tigua gi nahe howa ibu homelo bo wahene. Ani biya handala kini igini maru biru hearu tigua tininaga nogo dongi heagoria iragaho biralu ibida pugu pugu bini.

<sup>30</sup> Kini igini biaru ti wene harigani ibalu heaore dege agali maru kini hearia abale puwa ibuhondo lalu, Abasalomohanda í igini biaruni bibahende mbiraoreli hangubi mbira pora bialu nape bibahendeore homelo bo wahai haya, lalu lamini. <sup>31</sup> Bi uruni layago hale howa kini ibugua mogo timbuni laluibunaga aga biago minu lerelaki bialu dindini paliape hene. Ani biyagolaibunaga biabe biahaga bu hearu tigua nde tinaga aga bu hearuni minu lerelai hene.

<sup>32</sup> Ani heagola Debidi hamene Sama igini Yonadaba ibugua Debidihondo lalu, Inaga haguane-o ína bi o layagoni mo henene nahabe. Tigua í igini bibahende bai nahe mbiraore Amanono hangu baya. Amanono hangu bo wahayadagoni irane bamba ibugua Abasalomo mbalini Tama kayu biyagonaga keba ho haabo henego ani howa áyu bayadagoni. Abasalomoibunaga denguini aruma howa keba ho haga biane hondowa ibugua ogoniore bule kalo manda binigobi áyu Amanono bo wahaya. <sup>33</sup> Ai kini-o bi o layaruni bame layalaya hangu layago henene layabe toba holeni. Í igini bibahende hai ka. Amanono hangu homaya, lene.

<sup>34</sup> Ani lalu heatambu Abasalomo ibu ibida pu hene.

Yonadaba ibu Debidila bi lalu heagola ami agali wai pabeha mamage haga heago amu Horonaimi tanohayagi handa amu halu hearia agali dewaore hari nene wiagoria daliapebe biyane hendene. Ani handalu ibugua kini berearia abale puwa lalu, Agali dewaore amu Horonaimi hariga

wiadagua hari nene wiagoria daliapebe bialu ibiragoni, lene.

<sup>35</sup> Ani layagola Yonadabahanda Debidi lamialu lalu, O ibaruagoore ina langirugonidagua hene-neore í igini biaruni o ibaruagoni, lene.

<sup>36</sup> Yonadabahanda bi ogoni lai hayagola Debidi igini biaru abale anda ibalu yiya lalu dugu bigibigi bini. Debidi halu agali ibunaga biabe biahaga bu hearu tiguabi nde dugu biamaga hene.

<sup>37-38</sup> Abasalomohanda Amanono bo wahalu Gesua dindiha ibida puwa Amihudu igini Talamai hearia pu hene. Talamai ogoni ibu Gesuanaga kini heagola Abasalomo ibu ogoniha Talamai baba mali tebira hene. Kini Debidi ibu nde horo de-waore ibu igini Amanono homayagonaga dara ho haabo hene. <sup>39</sup> Mani Debidi ibu Amanononaga dara embeda howa ibu igini Abasalomobi nde dai bilo hamelo hene.

## 14

### *Abasalomo ibu Yarusaleme dai binigo ogo*

<sup>1</sup> Seruia igini Yoaba ibugua manda bu handalu hearia Kini Debidihanda ibu igini Abasalomo hondoa howa bereago hendene. <sup>2</sup> Ani hondowa ibugua mbiralihondo, Dindi emene mbira Tegoa wiagoha wali mbira maru bedali ale ndo mini ohewi bogabi bereago haru ibule pu, lene. Ani laya handala ibugua puwa haru dai biyagola Yoabahanda wali ogonihondo lalu, í bu miniha dara hetingi halu mbirali homedagola genda yu biragadagua birabelo hameledo. Ani biruwa dara ho ko lowa walia halu aga karulaga ale karulalu mandari kumu nabibe. Mbirali homenegonaga

dara howa horo dewa halu berene biragadagua birabe. <sup>3</sup> Ani bialu kini bedaria puwa bi ina ogodagua labe lalu langerogo labe, lene. Ani lowa Yoaba ibugua wali biagome kinihondo bi lamiloru ogodagua labe lalu lamiai hene.

<sup>4</sup> Wali biago ibugua Yoabahanda bibe lalu lamiyaru bialu ibu kini berearia pene. Puwa ibugua kininaga mini yaraga halu dindini kininaga wanakuihayagi bulu paluwa lalu, Kini-o ina i biamogo bibelonaga ibu bedogoni, lene.

<sup>5</sup> Ani layagola kini ibugua wali biagohondo hale halu lalu, Iha genda agi ngabe, lene. Ani layagola wali biagome ladai bialu lalu, Kini-o i agalini homayagola i hanguore dalo bedogoni. <sup>6</sup> I igini kirali henego ainde horo mbirungi libu mabuha howa libuni keba haga buwa gungu biribiya. Ani bialu hebigola mbirali libu mo hadaki bia holene naheyagola mendeali hongo bolangua hayagome ibu hamene biago bo tongolo milayiya. <sup>7</sup> Ani binigo ainde áyu i agalini damene bu karume ihondo keba timbuni halu lalu, Inanaga mana biaga wini ngadagua bialu i igini ibu hamene bo wahayago ogoni ibunibi homelo bo waholomaya ibilabe, lalu ka. Ani larago ina tinaga bi hale halu igiri ogoni pelaruyagua nde i biamogo bialu handayaho holene igiri mbira naholobada. Inaga ira dene emene dedago bo hundiaore holobada. Tigua ogonidagua biyagua nde i agalini ibu damenego biba halu amolope holobada, lene.

<sup>8</sup> Anidagua layago hale howa kini ibugua wali biago lamialu lalu, Emene ogoninaga mini burugu



nale inaga genda ogoni ina mo tiga buli ya dai bule áyu andaga pu, lene.

<sup>9</sup> Anidagua layago lelowa wali biago ibugua lalu, Anigo inaga agali haguane kini-o inaga genda ngogo mo tiga bule hariga tara maru taya bu- lenego wahalu ina bulebererunaga pani nolene uruni inibi i dameneruhabi anda ibilo waha. Anigo inibi i one waneiginiruhabi genda nawi habelo, lene.

<sup>10</sup> Ani layagola kini ibugua wali biagohondo lalu, Mbiralime i mo ko holene bi mbira layagua nde ogoni ibuni i koria haru ibabe. Haru ibiriyagua nde iha mo genda holene mani nawulebira, lene.

<sup>11</sup> Ani layago hale howa wali biago ibugua laabo halu lalu, Kini-o Anduane Homogo inaga Ngode Datagaliwabenaga minini howa ina bi henene larogoni lalu i igini mende ogoni nabe- lonaga lahabe. Mana lowini ngagome agali ibuni hamene bo wahenego ibu dameneme ogoni ibuni bo wahaga ngagonigoyu harugo lowa i iginiore bo wanahelo laro, lene.

Ani layagola Debidihanda wali biagohondo lalu, Ina heneneore Anduane Homogo haluhe kagonaga minini howa i langerogo tigua i igini- hondo mbirale mbira nabulebiraore, lene.

<sup>12</sup> Ani layagola wali biago ibugua lalu, Inaga agali haguane kini-o ina inaga biabe biahaga bedogome ihondo bi mbiraore hangu loabe, lene. Ani layagola Kini Debidihanda ladai bialu lalu, Karulapego ladege bia, lene.

13 Ani layagola wali biagome Debidihondo bi tigatiga lamialu lalu, Ína Ngode Datagaliwabenaga wali agali bu karuhondo mana ogonidagua biriyago agua biyane biribe. Ína í iginiore biago waratagi halu talu pelowa haru dai nabi dege kegoni. Anidagua bu kegome bi ína áyu íhondo langirigoni podene íniha o dai biragoni ndobe. 14 Iba hambu yinigo dindini odope hayagua lone mo yu dai bibe nahe wiralidagua ina homarimayagua lone heyabe nahe holeberemago mandabu kamagoni ndobe. Ai Ngode Datagaliwabehanda ina wali agalinaga holene bame mo wanahaga ka. Wali agali mbirago kaundiaha heagua ibugua uruni ibuni kagoria kaware haru halu dai bulene hame laga ka.

15 Anigo ínaga agali haguane kini-o wali agali bu hearu tigua í mo ko holeberema layagola gi halu í heria ibiru. Inime mandabu handalu hewaria íhondo hale harogola ína hariga taya bialu í biamogo bulebere lo manda bialu ibiru.

16 Ina manda birugola íhondo hale haruyagua agali larugome í igini iya mo ko naholobada lo manda bialu ibiru. Ibugua iya mo ko hayagua nde dindi Ngode Datagaliwabehanda ina ibunaga wali agali kamaruhondo ngini o ngagoria naholeberabada lo manda bido.

17 Ani manda buwa ína ínaga biabe biahaga bedogo bayale holiya biamogo bule lalu bi honghe lolebere lo manda bialuore ibiru. Inaga agali haguane kini-o í Ngode Datagaliwabenaga dahuliyali ale kego ína mana bayale tigabi ogoore nga mana lehe ogoore nga lowa tale bialu baya

hangu manda biai ho kegoni. Anduane Homogo ínaga Ngode Datagaliwabe ibu í heba mandagi haabo helo laro, lene.✧

<sup>18</sup> Wali biagome bi layaruni hale howa kini ibugua lalu, Bayale larigo ainde ina ihondo bi mbira hale harogo tigatigaore ladai bibe, lene. Ani layagola wali biagome lalu, Inaga agali haguane kini-o karulapego ihondo bi hale harene, lene.

<sup>19</sup> Ani layagola Debidi ibugua hale halu lalu, Ína bi áyu o lareruni Yoabahanda ani lole pu laya handala lole ibiribe, lene.

Ani hale hayagola wali biago ibugua ladai bialu lalu, Inaga agali haguane kini-o ina heneneore gi dolalu larogo ina ihondo hale haregoni habo naleorego ina ogoni ndo lalu mo kebi naholebero. Ína bi larigoni heneneore. Inaga ami agaliru haru haga haguane Yoabahanda anidagua lole pu laya. Ibunime bi ogodaguaore labe lalu bibahendeore endeho ngiya handala ihondo langule ibinigo larugoni. <sup>20</sup> Anigo ínaga ami haru haga Yoaba ibugua bi ogoni bame ndo Abasalomonaga genda ngago mo waholenaga laya. Anigo ínaga agali haguane-o í Ngode Datagaliwabenaga dahuliyali ale mini mandala bogabiore howa ina dindini bialu karu ogoale bira lalu manda biaihe kegoni, lalu wali biagome lai lene.

*Debidihanda Abasalomo andaga dai bilo karulape lenego ogo*

<sup>21</sup> Mani wali biago ibu tagira peaha Debidi-handa Yoaba íbu lowa lalu, Ína manda biridagoni

---

✧ 14:17: 2 Sml 19.27

karulape laro. Ai Abasalomo damu pialu haru daibule pu, lene.

<sup>22</sup> Ani layagola Yoabahanda kini wanakuini bulu palialu denguime dindi ela halu kininaga mini yaraga halu lalu, Inaga agali haguane kini-o Ngode Datagaliwabehanda í mo bayale helo hameledo. Ina íhondo bi hale harugo e laridago nde inaga biabe biahaga j kogohondo turu ho kedalo manda bido, lene.

<sup>23</sup> Ani lalu Yoaba ibu heyalu abale Gesua tano puwa Abasalomo haru halu Yarusaleme dai bini. <sup>24</sup> Ani haru dai biyagola kini ibugua lalu, Abasalomo ibu kini andaga naibilo ibuni andaga hayadagoha holene nga, lene. Ani layagola nde Abasalomo ibu kininaga dengui hondole ibu heagoha nape ibuni andaga haabo hene.

*Debidi ibugua Abasalomohanda ko biyago la nabi henego ogo*

<sup>25</sup> Abasalomo ibu huliya igiri baya dege lalu do mbaraleni ibuha dere motudubi mbira nawi hene. Isaraele dindiha huliya igiri baya ibu ale mende naheyagola Isaraele wali agali tigua Abasalomo hondole turu timbuni haga hene.

<sup>26</sup> Ibugua mandari lu timbuni palango toheore hene. Mali mbira poragola ibugua mandari ogoni podaganego genda magi handalu karia kilogarama kira ale wiaga. <sup>27</sup> Abasalomo ibu wali dabu binigo ibu igini tebira wane mbira berenego wanedago ogoni mini Tama berene. Wandari ogoni agali wanela tabetabe nabi baya taraore berene.

<sup>28</sup> Abasalomo ibu dai buwa mali kira Yarusalemeni daibu howa ibu kininaga dengui nahende

haabo hene. <sup>29</sup> Ani howa ibugua Yoabahanda kini hondole pelonaga ibu andaga ibabe lalu lawia hayagola Yoaba ibu naibi haabo hene. Ani biyagola Abasalomo ibugua Yoaba ibabe lalu bi halu mende lawia hayagobi Yoaba ibu naibi dege hene. <sup>30</sup> Naibu dege biyagola Abasalomo ibugua keba timbuniore howa ibunaga biabe biahaga agali hearuhondo, Yoabanaga balawa wabiaga mini bali mabu mbira ibuni mabu wiagoria dege mandagi handa ai nai winigo ogoni delo bo heda hole pudaba, lene. Ani layagola agali biabe biahaga hearume hale halu Yoaba mabuha bali heago delo bo heda hene.

<sup>31</sup> Anidagua biya layago hale halu Yoaba ibu Abasalomo andaga puwa lalu, Ínaga biabe biahaga agali hearume i mabuha bame bali hengewago dai helayadago irane aginagabe, lene.

<sup>32</sup> Ani layagola Abasalomohanda ladai bialu lalu, Ina í ibabelo hondo pudaba larugola í naibiriyago ai inaga bi ogo kini bedaria yalu pobelo hameledo. Pialu howa i Gesua dindiha pu hewago haru dai birimigo agi bulenaga Yarusaleme haru dai birimibe. I Gesua dindiha henedale nde bayale kolego áyu ogoni kini abale hondole pu. Ibugua handalu karia iha ko mbira ngane hondo heagua nde i homoliya bo wahelo laro, lene.

<sup>33</sup> Ani laya handala Yoaba ibugua kini berearia abale puwa Abasalomohanda bi layaruni bibahende kinihondo lamiai hene. Ani lamiai hayagola kini ibugua agali bu hearuhondo, Abasalomo haru ibule pudaba, lene. Tigua

haru ibiyagola Abasalomohanda kininaga mini yaraga halu kininaga wanakuihayagi bulu palialu dindini palipe hene. Ani biyagola kini ibugua ibu nunu lene.

## 15

*Abasalomohanda Kini Debidi bo batagi hole manda binigo ogo*

<sup>1</sup> Anigo mani howa Abasalomohanda nogo hosime gili laga garo ale karisi mbirabi nogo hosi marubi agali pira duria (50) agima karisidago mani ibilo tigua ala bamba halu hariga ibu polebiragoha pelobi mo manda manda biai hene.

<sup>2</sup> Horo bibahendengi egerebagiore Abasalomo ibu heyalu puwa tano anda ibaga panga haraba timbuni wiagoria pu haga bini. Ani kagola agali mbira ibu damene baba keba howa kinime mo tiga bilo kini bedaria pole ibiyagua Abasalomohanda agali ogoni ibu lowa lalu, I dindi agoa howa eberebe, lalu hale haga bini. Ani hale haragola agali ibiragome ibu ladai bialu lalu, I Isaraele dindiha howa Isaraeleali hameigini ogo aria ko, lalu lamigi biaga. <sup>3</sup> Lamiragola Abasalomo ibugua agali ibiragohondo hale haga bialu lalu, Genda agile wiyagola ibiribe, laga bialu howa lalu, Ai hale habe. Inaga bi laregoni hene neoredago kini ibugua agali inaga bi ogoni hale howa tale bilo mbirali dabo hela nabira, laga bialu hene. <sup>4</sup> Ani laga bialu howa Abasalomo ibugua agali ibiragohondo laabo halu lalu, Inimeore bi ogoniale hale howa tigabi dabolene ngadagua dabaga bialu holene hamelo ko. I ani haruyagua

nde agali genda ogoni ale yalu ibiragola abale baya hanguore mo tiga bulebero, laga bialu hene.

<sup>5</sup> Agali mbiralime ibunaga mini yaraga halu ibuha ge duli hanga hole ibiyagua Abasalomo ibugua agali ogoni gini mialu abale mo heya howa nūnū laga bini. <sup>6</sup> Isaraeleali bibahende kini hearia tinaga godi hale helo ibiyaruni ti-hondo anidagua dege biai halu hene. Abasalomo ibugua mana ogonibi bialu hayagome Isaraeleali dewaore hearunaga bu mini bamiai hayagola tigua Abasalomo gubalini timbuni ho hene.

<sup>7</sup> Mali maria peagola Abasalomohanda kini berearia puwa Kini Debidihondo lalu, Ina bamba Anduane Homogohondo bi mbira buleore lalu lo wirugo bua kogo i Heberono poabe. <sup>8</sup> Inaga biabe biahaga kogo ina bamba Siria dindiha Gesua tano wiagoria hewangi howa Anduane Homogohondo bi mbira ogodagua lowialu laru. Anduane Homogohanda i Yarusaleme haru dai biyagua nde ina Heberono puwa Anduane Homogo mitangi bialu ibunaga mini yaraga halu lotu lolebero lalu lo wirugonaga poa ko, lene.

<sup>9</sup> Ani layagola kini ibugua Abasalomohondo lalu, Karulapego mo palia holene i heba kago pamia, lene. Ani laya handala Abasalomo ibu Yarusaleme wahalu Heberono pole pene.

<sup>10</sup> Anigo ibu pole howa ibugua agali maruhondo lalu, Ti Isaraele hameigini palearu bibahendeha ndilalu bi lama purogo lalu bi ogodagua lalimu, Tigua biguli pu laruane hale harimiyagua hongo howa ga ladaga haga haga bialu lalu, Abasalomo ibu Heberono tanoha howa kini ka, lalu hoaro ladaga halimu lalu lamiai hole pudaba, lene.

<sup>11</sup> Ani pudaba lalu Abasalomo ibu Heberono tano pialu howa agali handari kira (200) Yarusaleme yu wahalu ibu heba ma laga buwa haru halu pene. Anigo agali ibu heba pole ma laga biyadaruni ti irane aginaga ma larabe manda nabi Abasalomo ibunaga mini wiagobi manda nabi howa bame pupe halu pene.

<sup>12</sup> Ti Heberono anda pu howa Abasalomohanda Anduane Homogohondo nogo mbirale loma binigo bo delalu howa ibugua Kini Debidinaga mini mandaru talebu miaga agali mbira mini Ahidobele ibu Gilo tanoha haga henego ibilo agali marume damu pudaba lene. Ani layagola tigua agali biago Gilo tano yu wahalu Abasalomo hearia haru ibini. Agali mbira mbira ibugu bialu dewaore ibu tago hayagola Abasalomo heba agali dewa halu hongopheore tagira ibu hene.

*Debidi ibu Yarusaleme yu wahalu ibida penego ogo*

<sup>13</sup> Agali mbirame Debidi hearia gerai ibuwa ibuhondo lalu, Isaraeleali bibahende Abasalomohayagi anda ibu hai haya, lene. <sup>14</sup> Bi ogoni layagola hale howa Debidihanda agali haguane Yarusalemeha hearu olo mogo buwa lalu, Abasalomohanda ibalu ina bibahende bai holigo Yarusaleme yu wahalu áyu ogoni ibida ma. Abale napirimayagua Abasalomo halu ibunaga agali haru haruarume ibalu ina wali agali bibahende tano ogoha kamaruni bo wahi holebirago ina áyu ogoniore abale ma, lene.

<sup>15</sup> Ani layagola Debidinaga agali haguane biarume ibunihondo lalu, Inanaga Kini Timbunio inaga biabe biahaga kamaru iname mbira



bidabalo hameledego bibahende biai hole kama, lene.

<sup>16</sup> Ani laya handala kinibi ibunaga agali haguane biarubi ibu one waneiginirubi ti Yarusaleme yu wahalu piai hene. Ani pialu howa kini ibu one wabuni halu mende berearu aria piralime ti dege kini andaga handaya howa mamage berelo berelalu pene. <sup>17</sup> Ani berelalu ibida pole pialu howa kini ibu dameneru ti bibahende Yarusaleme yu wahalu puwa emene kaware tano gibuniha anda mbira hegoria hondo hene. <sup>18</sup> Ani hondo howa handalu hearia kini ibugua ibunaga agali haguane biarubi tidi yalu bamba hayagola ami agali kini mamage haga hearubi mani tidi yalu piyadagua pu dege bialu hearia de hendene. Ami agali uruni ti Kerede howabi Pelede howabi ami agali handari waragaria (600) abale Gede tano howa Kini Debiti heba ibu hene hearu tibi nde mandagi o piyaruni heba bamba halu pumaga halu pu dege bini.

<sup>19</sup> Ani piyagola Kini Debidihanda ami agali Gede tano howa ibini biarunaga agali haguane Idai ibuhondo hale halu lalu, Tí ina haruru agibule eberemibe. Tí naga kini gahenge Abasalomo heba hole dai bidaba. Tí dindi tara kaundiaha howa ibirimigo nde lone aginaga ina haru mandagi ibagabu hamiyabe, lene. <sup>20</sup> Tí dindi ogoha lu ndo harimidago ai ina tí horo lu haru ibagabu holene hame naledogoni. Ina dindi anda mbi-rani baya hangu birule ndo bibahendengi ibaga dege bialu haabo holeberemago. Ina amiru í dameneru haru halu tını andaga dai birimiyagua karulapedalo manda bido. Ani dai bialu kamigola

Anduane Homogohanda tí biamogo bialu baya hangu handayaho haabo helo hameledo, lene.

<sup>21</sup> Ani layago lelo howa Idaihanda Debidihondo lalu, Inaga Kini timbuni-o í kedagua Anduane Homogo haluhe kagonaga minini howa ina hene-neore larogo í baba haabo hole kogoni. Ani howa í dindi mbiraha piriyauguabi mbiralime í bo wahayaguabi nde ibi iya haru bo wahelo laro, lene.

<sup>22</sup> Ani layagola Debidihanda lalu, Karulapedago ina haru maibidaba, lene. Ani layagola Idaibi ibunaga ami agali biarubi ti one waneiginirubi bibahende maru piyadagua ti haru pole pene.

<sup>23</sup> Debidibi ibu one waneiginirubi ibunaga agali haguane biarubi ti Yarusaleme tano yu wahalu pialu hemiria hondowa wali agali maru hearume dara howa dugu timbuniore bialu hene. Ani dugu bialu hea handala kinibi ibunaga wali agali biarubi ti iba mbira mini Kidirono peago domalu ederayagi dindi ko wali agali nahaga wiagoha be abalu titaule wiagoria pialu hene.

<sup>24</sup> Ani pialu howa Debidi ibugua wali agali piyaru deme hondo hearia loma binigo mo miaga agali Sadogobi Abiadabi Libaiali bibahendebi piyaria hendene. Libaiali uruni tigua Habo Nalolene Bi lowini biagonaga Mbogoyi biago mo yalu ibuwa naina dindini mo ngelene. Ani ngelowa Abaiada ibugua loma o biagoria howa bo delalu heaore dege wali agali bibahende tano wahalu tagira ibai hene.

<sup>25</sup> Ani tagira ibai heagola kini ibugua Sadogohondo lamialu lalu, Habo Nalolenenaga Mbogoyi ogoni tanoha ngelole lone yu dai bidaba. Anduane Homogohanda ihondo turuho heneyagua nde

mani ini lone tanoha haru dai bialu ibunaga Habo Nalolene Bi lo winigonaga Mbogoyi ogoni tanoha ibunaga Balai Anda biagoha wiraligo ngaria de hondoliya haru dai bulebirago yu dai bidaba. <sup>26</sup> Anigoyu Anduane Homogohanda ihondo turu nahe heagua nde ihondo ibunime bule hame layadago ale biai helo, lene.

<sup>27</sup> Debidihanda Sadogohondo laabo halu lalu, Ina ihondo bi larugoni miniha wá layabe be wá nale dege kebe. Ina bi ogodagua larogo inibi í igini Ahimasabi Abaiada igini Yonadanabi tí bibahende Anduane Homogonaga mo palia holene heba tanoha dai bilimu. <sup>28</sup> Ina dindi ko yobi wali agali nahaga ogo yu wahalu puwa amu iba domade haga biagoria holebero. Tígua Yarusaleme tanoha ogoale mbira bira lalu bi lo yalu dai beramigola hale hole iba doma edeyagi hondo hole porogo, lene. <sup>29</sup> Ani laya handala Sadogo Abaiadalame Habo Nalolene Bi lo winigonaga Mbogoyi biago yu dai bialu tini Yarusalemeni hene.

<sup>30</sup> Kini Debidi ibunaga bu miniha genda timbuni howa ibunaga ge su nabi ibunaga haguane dambi ho yalu pialu dugu bima Hari Olibe heago iraga halu hariga peadagua pialu Yodana iba peagoha ubadali halu pene. Wali agali ibu heba piyarume ibugua biyadagua dege tinaga haguane dambi ho yalu dugu bima pialu hene. <sup>31</sup> Ti ani bima pialu howa Debidi ibugua hale halu hearia agali mbira mini Ahidobehe henego ibu Abasalomo halu ibunaga agali haru hayadaru biamogo bule piya layane hale hene. Ani piya layago hale howa Debidihanda Anduane Homogohondo bi ogodagua lene. Anduane Homogo-o Ahidobehe-

handa bi larago damene bibahende la ko hai helo ína ibunaga bi lolebirago mo nagalone hai helabe, lene.

<sup>32</sup> Ani lalu puwa hari nene wiagoha iraga halu Anduane Homogo mitangi bialu lotu laga mbira winigoria tagira pene. Ogoriani pu heagola Debidinaga nenege agali mbira mini Husai ibu dindi mini Aga tano howa Debidi hearia lola hole ibini. Ibu Debidi dara timbuni ho ko lowa walia halu ibunaga aga biaru minu lerelalu yayai dindi dugu hira bialu ibini. <sup>33</sup> Debidihanda agali biago hondowa lalu, Í ina poramadagua ibulene manda biriyagua ina mo genda timbuni holebere. Iname í handayaho habe nahe holeberema. <sup>34</sup> Anigo ína i biamogo bule hamelo keyagua Yarusaleme tanoha dai buwa Abasalomo biamogo bialu howa bi ogodagua labe. Kini-o abale howa ína í aba mini manda bayale ngaru talebu mialu ibu biamogo biaga harugonigo ai áyu i ínaga biabe biahaga mbira holebero, labe. Ína ogonidagua biriyagua Ahidobelehanda mini ko ngaru talebu migi bialu karia ína mo habo laga bulebere. <sup>35</sup> Agali kirali loma binigo mo miaga Sadogola Abaiadalabi nde Yarusaleme tanoha holebirago ína kini andagaha howa bi hale hareruni ogoale laya lalu agali kirali ogonilabohondo lamigi bibe. <sup>36</sup> Igiri kirali Sadogo igini Ahimasabi Abaiada igini Yonadanabi libu aba heba mandagi holebirago ína bi hale harego damene bibahende libuhondo lameregola libugua ini koria abaleore langule ibilo, lene.

<sup>37</sup> Debidihanda bi layago hale halu ibunaga nenege Husai ibu lone Yarusaleme dai bialu pialu

hearia Abasalomobi nde Yarusalememe tanoha anda ibini.

## 16

### *Siba ibu Debidi harigani lola henego ogo*

<sup>1</sup> Debidi ibu Husaila bi lalu henego lai lalu ibu hari nene wiago yu wahalu emene daliape lalu ulini mbira wiagoria pialu hene. Ani pialu hearia Mebibosedenaga biabe biaga agali mbira Siba henego ibu Debidi lola hole ibini. Sibahanda beredi handari kirabi (200) gerebi lini do gembe bini kabu bigi buwa kabuni dege handari mbirabi (100) poge lini anidagua dege do gembebu winigo kabu buwa kabuni handari mbirabi (100) nogo meme dongoneme be wabini mbiraha waini iba hambu tolo berelo ya bialu nogo dongi kiranaga erekunini mo paga howa Debidinaga ya lalu ibini.✧

<sup>2</sup> Ani ya lalu ibiyagola Debidihanda ibuhondo hale lalu, Mbirale uruni i hewaria aginaga yalu ibiribe, layagola Sibahanda bi ladai bialu lalu, Nogo dongi kira ogonilabo i one waneiginiru bialu pelonaga haru ibiru. Tomobi ira linibi yidoruni inaga agaliru ti nelonaga yidogoni. Waini iba hambu berelo yidogobi inaga agaliru ti dindi ko wali agali nahaga ngagoria pialu kamigola ti kembobe lebola lalu tingini ngoe laragola nelo hambu berelo yido, lene.

<sup>3</sup> Ani layagola kini ibugua lalu, Bayaleore biridago ai inaga agali haguane Solo aguane Mebibosede ibu agua kabe manda bule hame ledogo ayu ibu agoha kabe, lene.✧

Ani layagola Siba ibugua kinihondo ladai bialu lalu, Ibu Yarusaleme tanoni ka. Abale ibu aguane Solo kini hayadagua Isaraele wali agalirume ibu tinaga kini helaragola ibugua Isaraele wali agali haru hole manda buwa ka, lene.

<sup>4</sup> Sibahanda anidagua layagola hale howa kini ibugua lalu, Henenebe. Anidagua biyadagonaga ina Mebibosedenaga mbirale wiyadaruni bibahende í mo ngerogoni, lene.

Ani layagola Sibahanda Kini Debidihondo lalu, Inaga Kini timbuni-o í agali nagaloneore kogonigo mbira ina ihondo bererume ina ihondo turu habelonaga dege biaabo holebero, lene.

### *Simaihanda Debidihondo bi ko lenego ogo*

<sup>5</sup> Debidi ibu Sibala bi layago lai halu Debidibiibunaga wali agali biarubi ti pialu dindi mbira Bahurimi wiagoria anda pene. Ogoriani anda pirimigola Solo aria agali mbira heneyago ibu tagira ibalu Debidi lola hole ibini. Agali ogoni ibu Gera igini Simai henego ibugua Debidihondo handabe manga howa bi ko lama tagira ibini.

<sup>6</sup> Ani lalu lama ibalu howa ibugua ege toleme Debidibiibunaga ami agali biarubi bama ibini. Debidi bole biyagolaibunaga ami agali hearumebiibuninaga tingini mamage haga hearumebi hapai halu helowa ibugua nde hibu lowa bama ibuore bini. <sup>7</sup> Simaihanda mege bialu bi ko hongo howa laabo halu lalu, Debidi í agali ko ngubiore agali homelo bama ibaga biaga koore o porego í puaboore habe. <sup>8</sup> Í agali koore howa ina Solo bo batagi haluibunaga henge wiago karulalu ini kini ho aribia harigoni. Ani bialu Solonaga agali nenege

bu hearubi bamuore homelo bo wahai harigoni mana bayale biribe. Anidagua birigonaga Anduane Homogohanda í pani áyu ngiragoni ndobe. Ibugua í bo batagi halu í igini Abasalomo ibu kini ho aribia howa Isaraele wali agali handame ho kagoni ndobe. Ína agali homelo bo wahariligonaga í koorene ko kegoni, lalu lene.

<sup>9</sup> Ani layago hale howa Seruia igini Abisai ibugua Debidihondo lalu, Inaga Kini timbuni-oirane aginaga agali ko biango ale ogome íhondo bi ko ngubi uruni lalu helowa kebe. Ina ibunaga ma pugu wahole porogo, lene.

<sup>10</sup> Ani layagola kini ibugua Abisaihondobi ibu hamene Yoabahondobi bi lamialu lalu, Ogoni libunaga biabe ndogo ani lalu helo wahadaba. Anduane Homogo ibugua agali ogonihondo bi ani lolene nga layagua nde agali mendeme bi ogoni ago larebe lalu hale holene nawigo waha, lene.

<sup>11</sup> Ani lowa Debidi ibugua Abisaibi ibunaga agali haguane hearu bibahendehondo lalu, Hale hadaba. Ini igini biagomeore ini bo wahole kagonidago agali mende tara Beniyamini hameigini ogonime bame bi ko lalu kago hondowa iname mogolo handabe nahedago wahadaba, lene. Anduane Homogo ibunime íhondo bi ko uruni lole pu lenedago keba howa bi ko uruni ani lalu helo waha. <sup>12</sup> Anduane Homogohanda inaga ko ngaru bibahende manda biai ho kago ai ibugua bi ko íhondo áyu lalu kagoni mo beregedalu íhondo mana bayale bua biyagua nde anidagua bulebira, lene. <sup>13</sup> Debidi ibugua bi ogoni lai halu ibu damene biaru heba ti heyalu pole piyagoha

pene. Hariga ti pialu henedagoni hari kaware hapara howa pialu hemigola Simai ibugua emene uyura bare bareni pialu howa bi ko lama Debidi piyagoha ege tole bape haga bima pialu dindi himu wiarubi dugu pelama ti piyadagua haruru pene. <sup>14</sup> Anigo kinibi ibu agali biarubi ti pialu tini pole piyagoria anda pene. Ti piyago pu dege bialu erekui biyagola dindi ogoriani halo berene.

*Abasalomo ibu Yarusaleme anda ibinigo ogo*

<sup>15</sup> Abasalomobi Isaraeleali maru biarubi ti Yarusaleme anda ibalu Ahidobebebi ti haru ibini. <sup>16</sup> Ani buwa maha Debidi ibunaga nenege Husai Abasalomo lola hole piyago anda ibuwa ibugua Abasalomohondo bi ladaga halu lalu, Kini-o iore lu haho wialu hodagua habelo, lene.

<sup>17</sup> Abasalomo ibugua Husaihandabi bi layago hale howa ladai bialu lalu, Agali-o i Debidinaga nenege heneneore mbira harigodago ibu heba pu nabi hadai biridago agua biribe. Agali i nenege heneneore henegonaga mana ogonidagua biaga ngabe, lene.

<sup>18</sup> Ani layagola Husai ibugua Abasalomohondo lalu, Ani ndogo Anduane Homogohandabi Isaraele wali agalimebi wali agali ayu o mo ngoaiho karubi bibahendeme tinaga kini gahenge mbira dabayagua nde i kini ogoni ibula halu ibunaga andaneha holene nga. <sup>19</sup> I inaga biabe biahaga naharuyagua nde agali mende ai kagonaga biabe biahaga hole haleho poliyadabe. Abale i abanaga biabe biahaga harugo ayu ibu igini ininaga biabe biahaga hole kogoni ndobe, lene.



20 Ani layagola Abasalomohanda beregedalu Ahidobelehondo lalu, Áyu ogoale bulene nga lalu ina buliyago langi, lene.

21 Ani hale hayagola Ahidobele ibugua ladai bialu lalu, Í abahanda ibu one wabuni halu mende kini andaga handayaho berelonaga berelo wahu piyadaruni íni haru paliai hole pu. Ína ogonidagua biriyagua Isaraele wali agali bibahendeme í aba ínila libu mo waitigi haridane handai holebira. Ani handai howa wali agali áyu íhayagi bu karuni tiguabi í hangu talima ibule hongo ho holebira, lene. 22 Ahidobele ibugua bi ogoni lai hayagola agali marume kini anda heagonaga dangini wiagoria balai anda mbira bia hene. Anda bia heagola wali agali bibahende bu hearunaga deni howa ti de hendeaore Abasalomo ibu balai anda daliga bia hayagoha anda pene. Anda pu bereagola tigua ibu aba one wabuni halu mende kini andaga handayaho berelo berelene biaru Abasalomo berearia mbira haru ibugu biyagola Abasalomo ibu haru paligi bini.✧

23 Horo ogonangi agali maru hearume Ahidobele ibugua bi layaruni Ngode Datagaliwabehanda la lene bi henene layabe toba howa ibugua bidaba layaru bibahende talialu biaiore hene. Abale Debidi ibu Ahidobelenaga bi larago bibahende talialu biai hagamaga áyu Abasalomo ibuguabi nde Ahidobelenaga bi laradagua talialu biai holene nga manda bini.

## 17

---

✧ 16:22: 2 Sml 12.11-12

*Husaihanda Abasalomo mo hondo henego ogo*

<sup>1</sup> Mani howa Ahidobele ibugua Abasalomo lamialu lalu, Ina agali daosini homberia (12,000) haru halu áyu mbiraga Debidi piyadadagua haruru talima poliya pu la. <sup>2</sup> Áyu Debidibi ibunaga agalirubi ti hariga dege pialu henego mini burugu lalu ngoe lalu mbirani paluebira. Padaria puwa ina wai berogola ti mogolalu ibunaga ami padaru bibahende ibida piai holebirago. Ani biragola ina kini ibuni hangu minalu bo waholiya. <sup>3</sup> Bo wahalulu wali agali maru karu bibahende wandari mbirago áyu dege agali penego ibu agalinila manga halu ibida pu puwa nde lone ibu agalini karia dai biagadagua ina ibunaga wali agali uruni ini keria haru dai buliya. Wali agali bibahende ini keria dai bilo agali mbiraore hangu bolene hame ledegoni ndobe. Aniyagua wali agali maru ini keria dai biai helo Debidi dege homelo bo waharegola maru ti bayale karulape hai holebira, lene. <sup>4</sup> Abasalomo halu Israaelenaga agali haguane hearume mandabu handalu hearia bi ogoni bayale tigabioreyane manda bini.

<sup>5</sup> Ani manda buwa Abasalomo ibugua lalu, Aga tanoali Husai ibugua nde agua larabe hale hamiya ibu ibilo oladaba, lene. Ani layagola tigua Husai olowa ibu lene. <sup>6</sup> Husai anda ibu bereagola Ahi-dobelehanda bi layaruni bibahende Abasalomo ibugua Husaihondo lamiai hene. Abasalomo ibugua bi uruni lai howa Husaihondo hale lalu lalu, Iname ogonidagua bulene karulapedabe be nakarulapedabe. Ina mandabu handalu keria nakarulapeyagua nde iname bimiyago ina manda

biridago ogo bulene nga lalu latagi ha, lene.

<sup>7</sup> Husai ibugua Abasalomohondo ladai bialu lalu, Áyu ogoningi Ahidobelehanda ogobi bibeheda lalu mo walia hayadagoni tigabi ndodane hendedo. <sup>8</sup> Í aba Debidi ibunaga ami agalirubi ti pari wayali agali wai biaga hongohe hayago íni manda bide. Áyu ogoni ibu keba timbuni howa biango dudu ale timbuni mini beame ibu igini agalime page minu yalu piai kagola keba howa tandaga timbuni ho hagamagua ka. Í aba ibu wai biaga mana manda timbunibi kago ibu mbiraga wali agali heba mandagi napaliaga ka. <sup>9</sup> Áyu ibu egeanda ngaruhabi dindi tara ngarunaga lene mbirahayagibi puwa ha do ka. Áyu iname puwa wai bule pialu kamaria inanaga ami agali karu aria maru ibugua bayagua wali agali bu karume hale howa lalu, Abasalomo aria biaru mo ko howa baya lolebiaru. <sup>10</sup> Ani biyagua ínaga ami agali maru karume bi ogoni hale howa nde tigua gi timbuni holobada. Tigua hongo taraore howa wai bule laiono hagamagua hagayaguabi áyu gi holebira. Isaraele wali agali bibahendeme í aba ibu ami agali wai biaga haguane halu ibunaga ami biaruni ti wai biaga pari wayali hayagoni manda biai ka.

<sup>11</sup> Áyu ina ogodagua bulene hameledo. Ína Isaraele dindi Dana howa olama pialu Beaseba anda pialu dindi uruni bibahendeha agali bu karu bibahendeore olomogo buwa agali dewaore ibamu ale daga labe nahe ala helolene nga. Ani íbu mogobu kagola bibahende tidu yalu waibu pole ínime bamba howa agali mo yalu Debidi baba wai

bule polene nga. <sup>12</sup> Ani puwa Debidi taya bima pialu kamaria mbirani lola hayagua ibunaga wali agali karu mo ko howa bamiya. Anidagua beremagola iba dalu mbiraga ibiraligobi ibalu agalime hapai habe nahe pialu Debidibi ibunaga wali agali bu karubi bibahendeore bo wahai hole-beremago ani bimiya.

<sup>13</sup> Ani beremagola ti tano mbiraha ibida anda piyagua Isaraeleali inanaga ami dewa karunime bu yalu puwa wai pabe hongohe kago pume hende howa dindi ulini ngagohayagi gialo yameremagola tano ogoni giala hole bialu mo ko hai hene wulebira. Ani beremagola tano ogoninaga ege pabe henedago aria emene gindu lenebi mbira ibira naholebiraore, lalu Husaihanda Abasalomo lamini.

<sup>14</sup> Husai ibugua bi ogoni lai hayagola Abasalomo halu Isaraeleali hearu bibahendeme lalu, Bi abale Ahidobele ibugua layago bagi hene lowa bi galone áyu Husaihanda laragoni, lalu hene. Anduane Homogo ibunime Abasalomo bo wahole manda bu howa ti Husaihanda bi layago talialu bilo mo hongo hene. Ahidobele ibugua bi layago nde bayale degegoyu Anduane Homogohanda tigua bi ogoni talialu bilo hame nalene.

*Debidi ibu Iba Yodana doma edeyagi penego ogo*

<sup>15</sup> Emene howa Husai ibugua Abasalomo halu ibunaga agali haguane biaruhondo bi lamiyago ogodagua larima lalu loma binigo mo miaga Sadogo Abaiadala libu hearia lamule pene. Ani lamialu ibugua Ahidobele ibu bi lene biagobi nde libuhondo lamia dege bini. <sup>16</sup> Ani lamialu lalu, Bi

ogoni mbiralime Debidi ibuni karia abale lama pu lalibu. Bi ogodagua lawia halibu. Kini-o áyu ogoni Iba Yodana doma deḷe biaga ngagoria napalibe. Tigua ibalu ínibi ínaga wali agali bibahendebi bo wahai holigo abale pobe laro, lalu lawia hene.

<sup>17</sup> Yonadana Ahimasala libu Yarusaleme tano tagirahayagi iba Enerogele peagoria hondo hene. Libu loma binigo mo miaga igini howa wali agalime libu tanoha anda porago hondolino ohowa ani ha do howa hene. Libu ani heagola biabe biahaga wandari mbirame tanoha ogoale bira lalu libu ohalu ibuwa mbirale bialu karunaga te lamiragola libugua Kini Debidi karia abale lamule polene wini. <sup>18</sup> Ani biaga henegoyu horo ogoningi igiri mbirame libu handa walía howa ibugua Abasalomo lamule pene. Ogonidagua biya handala igiri kirali biagolabo abale ibida pialu Bahurimi dindi agali mbira andaga heagoha pene. Anda mbira ogoniha anda piribidagoria iba biraga uli tombo wini mbira winiyagoha Yonadana Ahimasala libu ogoniha anda puwa bira do hene. <sup>19</sup> Libu anda puwa bira do heagola agali anda anduanedago one bereneyagome labolabo yalu ibalu iba uli biago bu yi hene. Ani buwa labolabo biagoria widi lini wiaru haeala payabu ngelene. Anidagua biagola agali ibirarume libu ogoniha bira do harualo manda bibe nahe hene.

<sup>20</sup> Mani howa Abasalomonaga agali maru libu talima ibiniru wali biago berearia ibuwa ibuhondo lalu, Yonadana Ahimasala agoaha piyabe, lene.

Ani layagola wali biago ibugua ladai bialu lalu, Libu abale iba domade halu piya, lene. Ani

laya handala agali biaru tigua Yonadana Ahimasala taya bialu hemiria handa walia nahole degeyagola wahalu Yarusaleme dai bini. <sup>21</sup> Ami agali biaru ti dai biyagola Yonadana Ahimasala iba biraga uli biagoha howa tagira ibalu Debidi hearia puabo hene. Puwa libugua Debidihondo lamialu lalu, Í dindi ogoria habe naheorego ínibi ínaga wali agali bu karubi bibahende iba abale domade halu ederayagi piai hadaba, lene. Ani lowa libugua Ahidobelehanda Debidi mo ko halu bolene bi lalu heneyaru bibahende Debidi lamiai hene. <sup>22</sup> Debidi ibugua bi uruni hale howa ibunaga wali agali biaru haru halu Iba Yodana domade hene. Gao layagola agali mbiraorebi mbira yu wanahe bibahendeore iba domade halu mendehayagi pu hai hene.

<sup>23</sup> Ahidobele ibunaga bi layago Abasalomohanda talialu bia nabi mo wahayago hondowa ibuninaga nogo dongi heagoria biralu ibuninaga tanoha dai bini. Dai bialu ibunaga mbirale wiaru bibahende mo tigabu ngelai howa ibuni eanogo dalu homene. Homayagola ibu damenerume ibunaga tingini mo yalu puwa ibu aba hora hene homali wiagoha dege hora hene.✧

<sup>24</sup> Abasalomo halu ibunaga ami Isaraeleali biarume heyalu abale pialu Iba Yodana doma edeyagi peagola Debidi ibu ibunaga wali agali biaru heba ti pialu Mahanaimi tano abale anda pene. <sup>25</sup> Abasalomo ibugua agali Amasa ibu ami haru haga haguane henegoria Yoaba ho aribia howa ami haru helo dabo helene. Amasa

---

✧ 17:23: 2 Sml 15.12, 2 Kin 20.1, Md 27.5

ibu Isimaeleali Yade igini hene. Yade ibugua Nahasa wane Abigele berenego ogoni dabu bini. Abigele ibu hagibuni Nahasa wane mende Seruia berenego ogoni ibu igini Yoaba hene. <sup>26</sup> Abasalomo halu ibunaga Isaraele ami agali biaru ti Iba Yodana doma edeyagi piyagola howa ti Gileada anda puwa balai anda bu hene.

<sup>27</sup> Debidi ibu Mahanaimi anda pu heagola Amono dindi Laba tano wiagoha haga Nahasa igini Sobi ibubi Lodeba tano wiagoha howa Amiele igini Magiribi Gileada dindi Logelimi tanoha howa ibini Basilaibi ti tebirali uruni Debidi lola hole ibini. <sup>28-29</sup> Tigua todobene beru belediru dindime wabini wiarubi dagia paliaga wiarubi uruni Debidi halu ibunaga agali biaru ti mule yalu ibini. Ani bialu tomo maru widiru baliru balawaru widi irani hiriniru mule yalu ibini. Ani bialu paboro tara tara ale kiranagabi mone ibanebi bulumaga andu ibabi bulumaga andu ibame wabini mini sisibi yalu ibalu nogo sibirubi haru halu Debidi mule haru ibini. Tigua Debidi halu ibunaga wali agaliru hariga dindi ko lebolahe wali agali nahaga iba dalu naibaga wiagoha lu ibiyagola ti iba noa howa kembobe lebola halu tomo garime homabeheore howa hongo erebahai halu gamaea bu nga manda bialu ani bini. Tomo uruni nowa Debidi halu ibunaga wali agali ibuni heba piyadaruni hongoheore holobada manda buwa tomo uruni yalu ibu mini.

## 18

*Abasalomo baba wai bialu Yoabahanda Abasalomo benego ogo*

<sup>1</sup> Debidihanda ibunaga ami agali hearu daosini mbira (1,000) naina tidiyu hela handari mbira (100) ona tidiyu hela bigi bialu tinaga haru haga agali haguane dabo helaga bini. <sup>2</sup> Dabo helalu ibugua agali hearuni wabuni timbuniore halu tebira tidiyu helene. Ani helowa ibugua ami agali tidi mbirago Yoaba ibugua haru helo helalu tidi mendego Yoaba hamene Abisai ibugua haru helo helalu tidi tebonego Gedeali Idai ibugua haru helo helene. Ani helowa Debidihanda ibunaga ami biaruhondo lamialu lalu, Inibi nde ina haru wai bimiya ma, lene.

<sup>3</sup> Ani layagola tigua ibuhondo lalu, Ani ndo ina baba nape í wahalu hondo habe. Ina wai bialu howa ibida piai harimayaguabi tigua ina maru bo wahayaguabi uruni mo dunubia naholebira. Uruni bame nagalone dege holebira. Anigo í ina haru mandagi wai pialu kamaria í bayagua nde tigua ami agali daosini pira (10,000) bene ale holebirago í wahalu tano ogoha hondo habe. Ani hondo howa inaha agali tubagi hayaguabi maru ale tubagi hayaguabi nde ina inahondo tubagi hara alego ina mo hongo helo ibilabe, lene.

<sup>4</sup> Ani layagola kini ibugua ladai bialu lalu, Karulapedago tigua laramidagua bialu ina wahalu hondo kogo tí karulapego pudaba, lene.

Ani lalu Debidi ibu wai pabe timbuni tano bu mabu bini ege pabe heagonaga panga haraba wiagoria handa tagiho heagola ibunaga ami biaru wai bu pole tidi yalu tagira piyaru hondo hene. Ami uruni tini hayadagua pugu bialu daosini mbira (1,000) pialu handari mbira (100) pialu buwa tini henedagua pugu bini. <sup>5</sup> Ani



pugu biyagola Debidihanda Yoaba Abisai Idai imaruhondo lamialu lalu, Tígua ini mitangi bialu igiri dalihahe Abasalomo nde dara halimu, lene. Debidihandaibunaga ami agali haguane biaruhondo bi ogonidagua lamiyago ami agali hearu maru ti bibahende hale hene.

<sup>6</sup> Ani biyagola howa Debidinaga ami biarume Isaraeali Abasalomonaga ami biaru baba wai bule puwa Eberaimi dindini irabu timbuni wiagoha wai bialu hene. <sup>7-8</sup> Tigua wai biaho wialu Debidinaga ami biarume Isaraele ami hearu dewaore bai hene. Wai bia timbu halu dindi hobane ogoni bibahendeha wai biame hene. Ami agali maru irabu timbuni wiagoha pu luluya halu homai hene. Anidagua biyagola agali maru waime bene homayaru emene degego irabuha pu luluya halu dewaore homene. Horo wai biyadagoningi ami agali daosini dege pira kira (20,000) homene.

<sup>9</sup> Abasalomo ibu pialu heagola ibugua Debidinaga ami agali maru biaru ibalu hearia hondowa tigua ibu babeheyagolaibunaga nogo dongini biralu gerai lalu ibida pole pene. Ani pialu hearia nogo dongi biagome ira mbira timbuni heneyago andaneha genge lalu pole pialu hearia Abasalomonaga mandari lu timbuni heago ira biagonaga magane gebaga biagoha hana hene. Ani hanaho wia handala nogo dongi biago ibu gerai lalu pu wahene.

<sup>10</sup> Debidinaga ami agali mbirame Abasalomo ani hana howa iraha do wiago hondowa ibu ami haru haga haguane Yoaba lamule pene. Ani puwa ibugua Yoabahondo lalu, Áyu ogoniore Abasa-

lomo ibu ira timbuni heagonaga magane mbiraha hana howa do wiaria handalu eberogoni, lene.

<sup>11</sup> Ani layagola Yoaba ibugua ladai bialu lalu, Ína heneneore de handaribe. Ani hondowa agi bule ibu bo wanaharibe. Ína ibu homelo bo wakele nde ina muni kina handari mbira (100) ngialu nogo dongone mandibu bayaleore wai bialu wayali kagonaga mbira ngialu bidolea, lene.

<sup>12</sup> Ani layagola agali biagome Yoabahondo lalu, Ína muni siliba daosini kina pira (10,000) inaga ngela kelesi ina kini iginihondo mbirale mbira nabidoleore. Ani larogoni irane kini ibugua ihondobi Abisai Idaila libuhondobi bi langiyag-  
oni ina bibahendeme hale hai harimagoni ndobe. Ibugua ogodagua laya. Tigua i mitangi bialu igiri daliahe Abasalomo dara halimu, laya. <sup>13</sup> Anigo ina ibunaga bi ogoni mo wahalu Abasalomo bedole nde kini ibunime te bibahende hale hai hagago ina ogonidagua biya lene hale howa kini ibugua i manani heledale. Ína nde ogoni hondowa i biamogo nabideledalo manda bido, lene.

<sup>14</sup> Ani layagola Yoabahanda lalu, Ina íla bi dewa labe mangabago waha, lene. Ani lalu Yoaba ibugua yandare lu tebira mo yalu Abasalomo do wiagoria puwa homa nabi dege winiyago yandare tebira yiarume Abasalomonaga gubalinini nogoba hene. <sup>15</sup> Ani biyagola ami agali pirali Yoabanaga danda timu yandareru wai bilonaga yahaga heneyago uruni tigua ibalu Abasalomo lone ba dege bialu bo tongolo milene.

<sup>16</sup> Abasalomo homeagola Yoabahanda ami agali

mbira heagohondo, Debidinaga ami wai bialu hayaru wahalu ibai helo biguli pula, lene. Ani pulayagola Debidinaga ami biaru ti hale halu Isaraele ami biaru talia nabi wahalu abale ibu ngoai hene. <sup>17</sup> Tigua Abasalomonaga tingini mo yalu puwa irabuha gundu uli timbuni mbira wiagoha bape hene. Ani buwa ege tole dewa dugualu gundu uli biagoha wua tolene. Ani bialu Isaraele ami biaru ti ibida purogo laya handala Debidinaga ami biaru ti tini andaga pugu pugu bini.

<sup>18</sup> Abale Abasalomo ibu homa nabi howa dindi tigabi bayale mbira mini Kininaga Dindi laga winigoria ege tole luni mbira ibuninaga mini mo wule dindi ogoriani mo hengene. Ani hongowa lalu, Isaraele wali agalirume ini mitangi biaabo holenege nde i igini mbira ini pani ho aribia holene nahonowi harudago, lene. Ani lowa Abasalomohanda ege tole ogoni ibuninaga mini Abasalomo wini. Ege tole ogoni wali agalime Abasalomonaga Ege Tole laga winigo áyu wiaabo ka.\*

*Debidihanda Abasalomo homayagonaga dara henego ogo*

<sup>19</sup> Mani Abasalomo homeagola Sadogo igini Ahimashanda Yoabahondo lalu, Anduane Homogohanda Kini Debidinaga waitigi biarunaga hongo bo podaya lalu bi galone bayale ogoni ibuni lamule porogo, lene.

<sup>20</sup> Ani layagola Yoabahanda lalu, O ndo áyu ogoni ina kini karia bi galone bayale lo

---

\* **18:18:** Ege tole áyu wiaabo ka layadagoni ina áyu kamangi manda bialu ndo abale agali mbuga ogo pigane gili biyadangi manda bialu lene.

yalu napoleberegò waha. Mani mbirungi lama piriyagua karulape. Ibu igini biagoore homayagodago áyu napole laro, lene.

<sup>21</sup> Ani lowa Sudanali mbira ona hearia Yoabahanda ibuhondo lalu, Áyu ogoni gerai lalu kini karia puwa mbirale bibahende íni handaridaruni kinihondo lamiai hole pu, lene. Ani laya handala Sudana agali biago ibugua bulu paluwa Yoabanaga mini yaraga halu kini lamule gerai lalu pene.

<sup>22</sup> Ani piyago pelowa Sadogo igini Ahimashanda hongo howa Yoabahondo lalu, Harugo kini ibugua íhondo bua birago ale bilo íbi kini hale helo bi ogoni lamule Sudanali ogoni piyadagua poro, lene.

Ani layagola Yoabahanda lalu, Iginio aguanaga ína pole hame ledebe. Ína bi lamule poregonaga mbirale bayale íhondo mbira nangulebira ndobe, lene.

<sup>23</sup> Ahimashanda ladai bialu lalu, Iha bulubadaruni waha í polebero, lene. Ani layagola Yoaba ibugua lalu, Aniyagua nde pu, lene. Pu laya handala Ahimasa ibugua gerai lalu Yodana ibahayagi yu dindi tigabi wiagoha pialu Sudanali biago naibi wiaore dege ibu ala anda pene.

<sup>24</sup> Horo ogonigi Debidi ibu tanonaga ege pabe biagonaga uba andatagi biaga panga haraba wiagoria handatagiho berene. Ani bereagola agali tano mamage haga mbira heagome ege pabe biagonaga nene wiagoria iraga howa handa amu halu hearia agali mbiraore hangu gerai lalu ibiyaria hendene. <sup>25</sup> Ani ibiyaria hondowa ibugua

kini olowa lalu, Agali mbira ibuni hangu gerai lalu ibira, lene.

Ani layagola kini ibugua lalu. Agali mbi-raoreli hangu ibiyagua ibu bi bayale galone yalu ibulebira, lene. Tano mamage haga biagome handalu hearia agali biago tanoha kaware dege ibiyane hendene.

<sup>26</sup> Agali mamage haga biago ibugua lone handa amu halu hearia agali mendebi gerai lalu ibiyaria hondowa pabe panga handayaho haga heago-hondo lalu, Agali mendebi ibuni hangu dege maha gerai lalu ibira, lene. Ani layago hale howa kini ibugua lalu, Agali mendebi ibugua bi galone bayale dege yalu ibulebira, lene.

<sup>27</sup> Tano mamage haga biago ibugua lone lalu, Agali bamba halu ibirago Sadogo igini Ahimasahanda gerai lalu ibagadagua ibirago ogoni ibunibe be mendealibe tobaneda, lene. Ani layagola kini ibugua lalu, Ahimasa ibu agali bayaleorego ibugua bi galone bayale mbira yalu ibaruabe tobaneda, lene.

<sup>28</sup> Ani lalu heaore Ahimasa ibu kaware ibuwa kinihondo bi laamu halu lalu, Ina bayale hole-berema, lene. Ani lalu ibuwa dindini bulu palialu kininaga mini yaraga hene. Ibugua lalu, Inaga agali haguane kini-o áyu ogoni Anduane Homogo inaga Ngode Datagaliwabehanda í baba hongo howa wai bule hayaruni inanaga giha minu ya hayagonaga iname ibunaga mini yaraga hamiya. Ibugua ani biyagome ina wayali harima, lene.

<sup>29</sup> Ani layagola kini ibugua Ahimasahondo hale halu lalu, I igini Abasalomo ibuni karulape kabe

be agua biyabe, lene. Ani hale hayagola Ahimasa-handa ladai bialu lalu, Kini-o Yoabahanda agali ínaga biabe biahaga amu ibirago iyame í keria bi ogoni yalu pu layadangi agali dewalime bi hongo howa pu dagadaga biayuago hale harugo agua bidabe tobara, lene.

<sup>30</sup> Ani layagola kini ibugua lalu, Í amugoria habagi ha, layagola Ahimasa ibu habagiho hene.

<sup>31</sup> Ani habagiho hayaore dege Sudanali biago ibu abaleore anda ibuwa ibugua kinihondo lalu, Inaga agali haguane kini-o ina bi bayale mbira langule yalu ibirugo í hale habe. Agali í bo batagi hole hongo halu hayaruni ai áyu dege Anduane Homogohanda í biamogo biyagola tigua í lone bo batagi holene henge nawulebira, lalu lamini.

<sup>32</sup> Bi ogoni lamiyagola kini ibu hale howa lalu, I igini Abasalomo ibu bayale kabe be agua biyabe, lene. Sudanali biagome ladai bialu lalu, Kini-o agali ínaga waitigi hayaruni bibahende igiri ogonihondo biyadagua tihondobi ani biai kale nde ina karulapedale manda bido, lene.

<sup>33</sup> Bi ogoni hale howa kini ibunaga miniha genda timbuni howa pabe heagoha anda hobane mbira daligahayagi heagoha iraga halu puwa dugu bialu hene. Ibugua dugu timbuniore bialu howa lalu, I igini Abasalomo-o Abasalomo-o í homaridago wahalu ini homedole nde karulapedale. I igini Abasalomo-o i igini-o, laga bialu dugu timbuniore bialu hene.

## 19

*Yoabahanda Debidihondo bi hongo howa lenego ogo*

<sup>1</sup> Agali marume Yoabahondo lalu, Debidi ibu igini Abasalomo dara howa dugu timbuni bialu ka, lalu lamini. <sup>2</sup> Ani lamiyago hale howa Debidinaga ami agali bu hearu bibahendeme tigua wai bialu wayali harimago bayale ndo birimadalo manda buwa tini turu nahe miniha genda haiho hene. <sup>3</sup> Ani howa ami agali biaru tanoha dai bialu howa tigua tinaga waitigirume ti mo ko howa baragola ibida purogo lenego andaga dai bialu taga hama dai biagadagua ti taga hama dai bini. <sup>4</sup> Odagoningi kini ibugua ibunaga de ngui bu yi howa dugu timbuni bialu, Ae i igini Abasalomo-o i igini-o, lalu dugu bia dege bialu hene.

<sup>5</sup> Ani dugu bialu heagola Yoaba ibugua kini andaga puwa ibuhondo lalu, Bi larogo hale harene. Inaga ami agali biarume horo ayu dege howa i timbuniore pelengidagola inime ti mo taga halu kegoni. Inibi i one waneiginirubi i one wabuni halu mende bedarubi ti bibahendeore homai kamile ndobe. <sup>6</sup> Anigo agali maru i handabe manga hagaru ina tihondo gubalini halu ihondo gubaliniho hagaru handabe manga haga kegonida. Mana ina bialu kegonime inaga ami agali bu karubi ami agali haguane bu kamarubi bibahende mo nagalone harida. Abasalomo ibu nahome halu ina bibahende homai heneyagua ogonime i mo turu kaledabe. <sup>7</sup> Ai hale habe. Ayu ogoni inime pialu inaga ami agali bu karunaga mini mo palia hole pu nabere. Ina Anduane Homogonaga minini howa heneneore larogo. Ina anidagua nabiriyagua ayu mbiraga i yu wahalu ibida piai haragola ini genda timbuniore yu

holebere. Genda abale íni igiri emeneni howa yu hama ibalu genda yu haridaruni goyane lowa áyu genda timbuniore yu holebere, lene.

<sup>8</sup> Yoaba ibugua bi uruni lai heagola kini ibuni abale heyalu puwa tanonaga ege pabe panga haraba ubaanda tagi biaga wiagoria birule pene. Ami agali biaru ti kini tagira ibuwa tanonaga panga haraba biagoria beda layago hale halu ti ibuwa ibu heba mandagi hene.

*Debidi ibu Yarusaleme dai binigo ogo*

Odagoningi dege Isaraele agali biaru ti ibida pugu pugu bialu tini andaga dai bigi bigi bialu purogo lene. <sup>9</sup> Dindi bibahendeha Isaraele wali agali hearu tini degedege lai lagalaga bialu hene. Ani lalu howa marume lalu, Kini Debidihanda ina biamogo biyagome Pilidialibi inanaga waitigi maru hearubi tigua ina bolene winigo mo wahene. Áyu ibuni Abasalomo handalu ibunaga dindi andaru yu wahalu ibida piyada. <sup>10</sup> Iname Abasalomo ibunaga hagianeni weli odo wialu inanaga kini helarimago ai waime bayagola homaya. Anigo agali marume Kini Debidi lone haru dai nabibehedabe, lene.

<sup>11</sup> Agali marume bi ogodagua laya lama Kini Debidi hearia lo yalu ibini. Ani layagola Debidi ibugua hale howa loma binigo mo miaga Sadogobi Abaiadabi libu haru puwa lalu, Libugua Yudali hagianeru karia inaga bi ogo yalu puwa ogodagua laya lalibu. I oali howa hale halu hewaria Isaraele wali agali hearume ogodagua layuane hale harugo ai Yuda wali agali tigua i abale dai bia labehegyu dai bia nale hemigola



Isaraele wali agali tigua ala latagi halu i ini andagani birule daibia lelo kamigo irane agibe. <sup>12</sup> Ina nde darama mbiraore yabulene-ore harimagodago tigua lolenedagua mendeali kagome lelo kamigo agibe, lene. <sup>13</sup> Ani lowa Debidihanda loma binigo mo miaga agali kirali biago labohondo lalu, Amasahondo ogodagua lalibu. Iyaore darama mbiraore yabulene haribagonidago ina heneneore larogo. Yoaba ibu ami agali karu haru haga hayadagua ina ho aribia habelo heloliya laro. Henene ogonidagua nabiruyagua Ngode Datagaliwabe ibunime i bo wahelo laro laya lalu lamibe, lene.

<sup>14</sup> Debidinaga bi lama pudaba layagome Yudali hearunaga bu miniha kika hayagola tigua Debidihondo bi yalu dai bilo ogodagua ladai bini. Tigua lalu, Inibi i one waneiginirubi i damenerubi bibahende Yarusaleme dai bilimu larama, lalu lawia hene. <sup>15</sup> Ani layiyago hale howa Debidi ibu damene biaru heba ti Yarusaleme dai bule pialu Iba Yodana angeni pialu hene.

Yudaliru tigua Debidi halu ibu dameneru Iba Yodana domaragola lola hole lowa ti pialu Yodana iba kaware dege Giligala tanoni pu hene. <sup>16</sup> Ani pu howa Gera igini Simai ibu Beniyamini hameigini howa dindi emene Bahurimiali henego ibugua Yudaliru halu Kini Debidi lola hole abale ibini. <sup>17</sup> Ibu heba Beniyamini hameigini daosini mbira (1,000) tibi Solonaga biabe biahaga agali mbira Siba henego ibubi nde ibu igini nguira (15) henerubi ibunaga biabe biahaga agali pira kira

---

☆ 19:16: 2 Sml 16.5-13

(20) henerubi ti haru abale Kini Debidi ibu Iba Yodana heaore dege hondo pene. <sup>18</sup> Ani ibu howa tigua kini damenerubi kini one waneiginirubi bibahende ibani gi yalu haru doma ede halubi kini ibugua bidaba lalu hame layadaguabi biai halu hene.

*Debidihanda Simaihondo bayale binigo ogo*

Kini ibu iba domalu ubaede hole pialu hearia agali mbira mini Simai henegome kininaga wanakuihayagi ibalu dindini bulu palu ibira hene. <sup>19</sup> Ani buwa Simaihanda kinihondo lalu, Inaga agali haguane timbuni-o í Yarusaleme wahalu tagira ibiringi ina íhondo mana bayale ndo birugonaga mo wiaho ha nabi ini dara halu o birudagoni mo embeda habe. Iha anidagua bini lalu miniha manda bu wiaabo nahabe. <sup>20</sup> Kini-o inaga biabe biahaga i kogo ina ko timbuniore birudane manda bialu wali agali hameigini i aria uyurayagi padarunaga agali mbiraoreali ina ala bamba halu inaga kini í ala lola hole ibirudagoni, lene.

<sup>21</sup> Ani layagola Seruia igini Abisaihanda ladaga halu lalu, Anduane Homogoibunime kini helo mbirali dabaluhelene biagohondo bi ko lagayago agali ogoni ibuni homelo bolene ngago ai Simai ibugua ani biyagonaga ibuni homelo, lene.

<sup>22</sup> Ani layagola Debidi ibugua Abisaibi ibu hamene Yoabahondobi lamialu lalu, Seruia igini-o mbirale uruni libunaga biabe ndogo libugua irane aginaga ila mo waitigi harabibe. Áyu i hangu Isaraele wali agalinaga kini kogonigo agali ogoni ibu áyu mbiralime ela halu bolene nawi, lene. <sup>23</sup> Ani lowa ibugua Simaihondo lamialu lalu,

Inaore bi larogonigo mbiralime í homabelo bo wa naholebiraore laro, lene.

*Debidihanda Mebibosedehondo bayale binigo ogo*

<sup>24</sup> Ogoningi dege Solo aguane Mebibosede ibu Kini Debidi lola hole ibini. Mebibosede ibugua Kini Debidi Yarusaleme wahalu tagira piyangi howaibunaga gebi agabi wayawaya nabe haho wialu angaribi nami dege haho winiyago ai ibu Debidi lola hole ibini.☆ <sup>25</sup> Mebibosede ibu Yarusaleme yu wahalu kini heagoria anda ibiyagola kini ibugua ibuhondo hale halu lalu, Mebibosede-o iya haru ibida mba nalarigo aginaga biribe, lene.

<sup>26</sup> Ani layagola Mebibosedehanda ladai bialu lalu, Inaga agali haguane kini-o inaga biabe bihaga kogo í agali ge kohe harugoni í manda bide. Horo í tagira piringi ina inaga biabe bihaga agali Siba heagohondo ibi ti poradagua kini heba poliya inaga nogo dongini bialu polenaga mo manda manda bia habe larugo lelalu ibugua í mo hondo halu piyiya. <sup>27</sup> Ani pialu ibu í hearia ibuwa ke halu inaga mini mo ko howa bi dewa langiyiya. Anigo inaga agali haguane kini-o í handalu koría í Anduane Homogonaga dahuliyali ale kegoni. Anigo ihondo mbirale mbira bule hame lededagua biai habe. <sup>28</sup> Ina í aba waneigini dameneru ina bibahende bai holene winigo ai ina í dara howa í andagaha tomo mandagi nabiya ibu larigola nalu haruligoni. Ani biruligo manda bialu áyu ihondo

---

☆ 19:24: 2 Sml 9.1-13, 16.1-4

lone mbirale mbira ngi lolene nawi manda bido, lene.

<sup>29</sup> Ani layagola kini ibugua ladai bialu lalu, Solonaga dindi andaru mbirale ngelalu homene paluniru Siba libu mo talebia holene manda bidogo ina bi mbira lolene nawigo waha, lene.

<sup>30</sup> Ani layagola Mebibosedehanda lalu, Mbirale uruni Siba ibu hai helo waha. Inaga kiniore homa nabi bayale halu dai biridagoninaga karulape ogoni, lene.

*Debidihanda Basilaihondo kai lenego ogo*

<sup>31</sup> Gileada dindiha howa agali mbira mini Basilai henego ibu Logelimi tano howa dalipe halu kini Iba Yodana domade hayagola ibu kini heba mandagi iba domade hole ibini. ✧ <sup>32</sup> Basilai ogoni ibu agali bambaore hene ibunaga mali pira halira (80) heneyago ibini. Agali ogoni ibu mbirale dewawi howa muniru dewawi halu Kini Debidi ibida puwa Mahanaimi pu heagola ibugua Debidi halu ibunaga damene piyaru ti tomo de- waore nelo mialu ti baya hangu handayaho hene.

<sup>33</sup> Basilai ogoni ibiyagola hondowa kini ibugua ibuhondo lalu, Ina i baya hangu handayaho holiya Yarusaleme ina haru ma, lene.

<sup>34</sup> Ani layagola Basilaihanda ladai bialu lalu, Kini-o i mali lu halu homole ndodago ina haru mandagi Yarusaleme hama polene nakarulapedago wahalu waharo. <sup>35</sup> Bi larogo hale habe. I hama ibinigo mali áyu pira halira (80) kogonigo ani howa ai ina mbirale ngaru kobi bayalebi lalu mbira minime tale bibe nahe

---

✧ 19:31: 2 Sml 17.27-29

ko. Tomo ibabi bayale ngaru nalu howabi nde dendevida magubida lalubi dababe nahe dege ko. Wali agalirume iba gana lalu karu bayale larabe be ko larabe baya hangu hale holeneho hale tuluhe ko. Ainde ogonibigome inaga agali haguane kini-o ina í erekuibi mo ngule agi bule mbaliyadabe. <sup>36</sup> Kini-o irane agonaga ina ihondo mana bayale urunidagua buleberebe. Ani nabibe. Iyane haru Iba Yodana domalu emeneore tigimandi hangu pialu nde ti porami handala i andaga dai bulebero. <sup>37</sup> Ani buwa ini andaga dai bialu emene hangu howa homalu nde ininaga homali i aba mamaru hora hene ngagoha mandagi hora helo dai buliya waha. I igini Kimihama o kago ibu dege inaga agali haguane kini íla hole pilibulo laro. Ina ibu biamogo bule hame lederu bibahende biai habe, lene.

<sup>38</sup> Ani layagola kini ibugua ibuhondo ladai bialu lalu, Bayale larigo Kimihama ibu ina haru puwa ina ibuhondo buliya hame lederu bibahende biai holiya. Ina inihondo buliya hame lederubi biai holebero, lene.

<sup>39</sup> Uruni lai howa Debidibi wali agali biarubi bibahende Iba Yodana doma ede hai hene. Ani buwa Debidi ibu Basilai nunu lalu ibu mo bayale helonaga bi la halu biya handala Basilai ibu ibuni andaga dai bini.

### *Yudali Isaraealila bi wai binigo ogo*

<sup>40</sup> Kini Debidi ibu Yudali bibahendebi Isarae-leali marubi ti haru Iba Yodana domalu pialu agali Kimihama mbira henegobi ti heba puwa Giligala dindi pene. <sup>41</sup> Debidi ibu Giligala dindi anda pu

heagola Isaraealeali bibahende ibu hearia ibuwa tigua ibuhondo lalu, Agali haguane-o irane aginaga ina hamene Yuda tigua kini haru eberema lalu ina nde hale holomaya langia nabi ohowa ibi í one waneiginirubi inaga ami agalirubi haru lalu abale Iba Yodana domalu ibiyabe, lalu hale hene.

<sup>42</sup> Ani hale hayagola Yudali hearume ladai bialu lalu, Kini ibu ina Yudali kago manda bialu iname henemane haru ibirimago ai tí inahondo irane agome tandaga lalu kamibe. Ani birimagola kini ibugua inanaga tomo yolo bialubi mbirale marubi mbira inahondo ngia nabi ka, lene.

<sup>43</sup> Ani layagola Isaraealeali biarume lalu, Agali mbira kini hayagua nde ogoni ibu ina dindinaga ka. Ina Isaraele hameigini pira dindi mbiraoreha kamagola tí Yuda mbiraore hangu kamigoni. Heneneore Debidi ibu Yudalime kini kagoyu ibu ina bibahendenaga kini ka. Ina Isaraele hameigini pira howa ina wali agali dewaore bolanguahe kamago ai irane aginaga tigua ina Isaraele hameigini mo nagalone harimibe. Kini ibu dai bilonaga te ala ina Isaraealeali kamagome lene manda bulene nga, lalu hene.

Ani layago lalu helowa Yudali biarume hongoore howa Isaraealeali biaru bime bo hangedalu hene.

## 20

*Sebahanda Kini Debidi bope hole manda binigo ogo*

<sup>1</sup> Horo ogoninaga Isaraele dindiha agali ko mbira mini Seba hene. Ibu Beniyamini hameigini howa agali Bigiri henego igini hene. Seba

ibugua pilipe ale biguli pu lalu hongo howa galalu ogodagua lalu, Debidi ogoni nahelo waha. Ina Debidi talima napole kama. Ina agali Yasi igini Debidi ibu aria ndo kama. Ina Isaraele wali agali kamaruni Debidi ogoni wahalu inane daluha dai bima, lene.✧

<sup>2</sup> Ani layago hale halu Isaraele wali agali tigua Debidi yu wahalu Bigiri igini Seba talima pialu tini daluha dai bini. Ani piya handala Yudaliru tini Debidi andaneha howa tigua Debidi ibiyadagua talima ibalu Yodana angeha howa hariga wiadagua ibalu Yarusaleme anda ibini.

<sup>3</sup> Ti Yarusaleme tano anda ibalu Debidi ibu ibuni kini andaga biagotha anda pialu ibu one pira wabuni mende berene biaru ti kini andaga mamage berelalu piyaru haru dai buwa anda mbiraha berelowa agali marume ti mamage helo helene. Ani bialu ti tomo nelo mialu mamage helo helowa kini ibuni wali uruni baba abale paliaga winidagua napale ti bame ani biralu homelo bere-lene. Ani bereleagola ti agalini homene wali dalo biragadagua berene.✧

<sup>4</sup> Mani kini ibugua Amasahondo lamialu lalu, Ina puwa Yudali bibahende olo mogo bialu yawi lumayaguabi ibi ti heba i koria ibule lamule pobe, lene. <sup>5</sup> Ani laya handala Amasa ibugua pialu agali olo mogo buwa horo ibabe layangi dai nabi hene.

<sup>6</sup> Amasa ibu abale dai nabiyagola kini ibugua Abisaihondo lalu, Abasalomohanda ina genda timbuni mo ngiyago goyane lowa Bigiri igini

---

✧ 20:1: 1 Kin 12.16, 2 Bit 10.16 ✧ 20:3: 2 Sml 16.22

Sebahanda ina genda tara timbuniore mo ngulubadago. Ina inaga ami agali bu karuni haru halu puwa minu yania halimu. Ibunaga agali haru hayadago haru halu puwa tano pabe hongoho kagoha hayagua iname ibu minabe nahe holebirago abale minule pudaba, lene. <sup>7</sup> Ani laya handala Abisai ibugua Yoabanaga ami agali hearubi ami maru kini ibu mamage haga Kere-deali Peledeali hearubi ami agali maru wai hongo howa biaga hearubi bibahende Yarusaleme tano yu wahalu Seba minule taya bima pole pene.

<sup>8</sup> Tigua pialu Gibeononi ege tole timbuni wiagoria tagira pialu hemigola Amasa ibalu hearia lola hene. Yoaba ibu wai bule aga karulaga wiago karulo howa wai biaga ayu tibu nogo dongone mandibuha dahene. Ayu tibu ogoni andanaha yuwa mandibuha dahenego Yoaba ibu Amasa lola hole uba amu hayagola ayu tibu biago golowa ibira hene.

<sup>9</sup> Ani biyagola Yoaba ibugua Amasahondo lalu, Hamene-o í karulape kebe, lene. Ani lowa ibugua Amasa nunu lola biatingi howa angarini gi tigame yania hene. <sup>10</sup> Ani yania howa Yoaba ibugua ayu tibu nene gadele tubagi mbira gi lehayagi yiago Amasa ibu nahende hene. Ani heagola Yoabahanda Amasanaga tombeneni nogoba hayagola Amasanaga tini dindini haeala paya bialu ogoingiore halu mende nogoba naheaore abale tongolo mini. Tongolo miyago hondowa Yoababi ibu hamene Abisaibi libugua Bigiri igini Seba taya bima pole piyagoha pene.

<sup>11</sup> Ani piyagola Yoabanaga ami agali mbiragome Amasa tingini harigani ibiraho wiagoria howa



ibugua bi ladaga halu lalu, Agali Yoaba Debidi-lahondo turuho kamiru tí Yoaba poradagua pud-aba, lene. <sup>12</sup> Anigo daramame Amasanaga tingini gobahego harigani wiaabo hene. Ani wiagola ami agali maha ibiyaru ti ogoni handalu ogoriani hondo hene. Ani hondo heago hondowa Yoabanaga ami agali biagome Amasa tingini harigani wiago gililo yalu pubagi howa tani heagoria wialu agame bu dambi ho ngelene. <sup>13</sup> Amasanaga tingini harigani howa mo bagi heagola ami agali bibahende biaru ti Yoaba piyadagua talima pialu Bigiri igini Seba taya bima pole pene.

<sup>14</sup> Seba ibu nde Isaraele hameigini dindi wiaruha piai halu Abele Bedemaga tano kaware ngelowa dindi lene wiagohayagi anda pene. Ani piyagola Beri hameigini hearume ibu piyadagua ti haruru pialu tanoha anda pene. <sup>15</sup> Ti anda pu heagola Yoaba halu ibunaga ami agali hearu ti hale halu hearia Seba ibu tano ogoniha ka layane hale hene. Ani ka layago hale howa tigua tano ogoni ho hagira bialu tanonaga ege pabe heago iraga holenaga dindi dugu hanama iraga hene. Ani bialu marume ege pabe heago podo ibira helonaga dindiha tombe lalu hene. <sup>16</sup> Ani bialu heagola wali mini bayalewi mbira tano ogoniha bereneyagome ege pabe biagoria handapeho howa lalu, Uru-o hale hadaba laro. Ina Yoabahondo bi mbira lamuleberogo ibu ogoria ibilo lamidaba, lene.

<sup>17</sup> Ani layagola Yoaba ibu wali biago heagoria kaware pu heagola wali biagome lalu, Í Yoababe, lene. Ani layagola Yoabahanda ladai bialu, E i

Yoaba kogoni, layagola wali biagome Yoabahondo lalu, Agali haguane-o ina bi lole yidoru loleberogo baya hangu hale habe, lene. Ani layagola Yoaba ibugua lalu, Karulape. Inaga bi uruni ina hale holiya la, lene.

<sup>18</sup> Ani layagola wali biagome Yoabahondo lami-alu lalu, Bamba bi mbira laganego ogo lalu, I mini tumutumu ho keyagua Abele tano ngagoha pobe, laga. Ani laragola pialu karia wali agali Abele tano ha bu karume tinaga mini mo wala halu mo tiga bia haga. <sup>19</sup> Ai bi larogo hale habe. Inanaga tano ogo Isaraele dindiha tano mini lene mbira wiyagoni nga. Inanaga tano ogoha keba ha wai bia gungu biaru mbira nabiagaore tano mini lene bayale mbira o ngamagoni. Iname inanaga kini kago hangu talima piaga henego kama. Ani hene kamagoyu ayu ina inanaga tano bo gialo wahole bialu kegoni. Mbirale Anduane Homogo ibunaga ngago irane aginaga bo gialo waharebe, lene.

<sup>20</sup> Ani layagola Yoaba ibugua ladai bialu lalu, Ina tano ogo bo gialo bagabu waholene hame nale ko. <sup>21</sup> Anigo iname agali mbiraoreli hangu Bigiri igini Seba hangu taya berema. Ibu Eberaimi hameigini dindiha amu hari bare wiagoha howa ibini kago. Agali ogoni ibugua agali maru hearume Kini Debidi bo wahelo ndelalu hayiyago ai Seba ogoni minu ngilimulo hame ledama. Ani minu ngeremigola iname tinaga tano ngelo wahalalu poleberema, lene.

Ani layagola wali biagome lalu, Heneneore buleberemago larogo hale habe. Iname agali ogoni balu ibunaga haguane tano pabeha howa

batagi haramagola tí hondoleberemi, lene. <sup>22</sup> Anidagua lalu wali biago tanoha puwa ibugua wali agali tanoha bu hearuhondo ibunaga mini wiago tihondo lamiai hene. Ani lamiai hayagola tigua ibunaga mini wiago talialu Seba bole pene. Balu tigua Sebanaga haguane pugu yalu ibuwa Yoaba halu ibunaga ami agaliru bu hearia batagi hene. Anidagua biya handala Yoaba ibugua pilipe biguli pu layagola ami agali biaru ti tano ogoni wahalu tini dalu dai bini. Yoaba ibu nde Kini Debidi hearia Yarusaleme dai bini.

*Debidi ibunaga agali haguane helenedarume biabe bialu henego ogo*

<sup>23</sup> Isaraelenaga ami agaliru handame howa haru haga haguane Yoaba ibu hene. Yahoiada igini Benaia ibugua ami agali kini ibuni mamage haga Kerediali Pelediali biaru haru haga hene. <sup>24</sup> Adonirama ibugua agali maru kini ibunime ibunaga biabe bia helo dabo helaga birago haru haga hene. Ahiludu igini Yahosabada ibugua mbi-rاله bibahendeore Debidihanda birago damene gilibu wiai haga hene. <sup>25</sup> Ani bialu Seheba ibu kininaga beba gili bia dagala biaga hene. Sadogola Abaiadala libu loma binigo mo miaga agali hene. <sup>26</sup> Ani bialu Yairi hameigini agali mbira mini Ira henego ibubi nde Debidinaga loma binigo mo miaga helo dabo helalu bini.

## 21

*Gibeonoalirume Kini Solohanda tihondo ko biyagonaga pani biadai binigo ogo*

<sup>1</sup> Debidi ibu kini heangi gaea timbuni biyagola Isaraele wali agalibi Yuda wali agalibi ti mali tebirani tomo garilo hene. Ani biyagola irane aginaga tomo gari ogoni tagira porabe lalu Debidi ibugua Anduane Homogohondo hale hene. Hale hayagola Anduane Homogo ibugua ladai bialu lalu, Tomo gari timbuni o poragoni irane bamba Kini Solohanda Gibeono wali agali bo wahayagonaga pani áyu ibu waneigini bu karume nalu kagoni ndobe, lene. <sup>2</sup> Ani layago hale howa Debidihanda, Gibeono wali agali olalu ibidaba, lene. Gibeono wali agali uruni ti Isaraele wali agali ndo ti Amono wali agali hene. Amono wali agali maru ereba hai halu yu wahene emene uruni ti hangu hene. Bamba Isaraele wali agali tigua Amono wali agalihondo, Tí mo ko naholeore, lalu habo nalolene bi hongohore lowini. Ani lowini wiago mo wahalu Solohanda Gibeono dindiha Isaraele wali agali Yuda wali agaliru hangu hai helo lowa ibugua Gibeono wali agali bibahende bo mburi lai hole biyagola emene mbira ti hangu yo pialu pene. <sup>3</sup> Gibeono wali agali olayagola uruni ti Kini Debidi berearia ibiyagola ibugua tihondo lamialu lalu, Ina Anduane Homogo ibunaga wali agali bu kamaru biamogo bilo tigua ibuhondo inanaga bi la halimulo áyu iname mana ko mbira tihondo bini ngago mo tiga buleberema. Ani buleberemago ai iname mana ko birimadago mo tiga bialu agileore bulumaya hamelo kamibe, lene. <sup>4</sup> Ani layagola Gibeonoali biarume Debidihondo ladai bialu lalu, Ina muni ngolo silibaru inahondo ngia ngiriyaguabi urunime Solobi ibu damene bu karubi ti baba ina baba genda wu kamaruni

mo ereba naholebira. Iname ihondo Isaraele wali agali bu karu aria maru homelo bo wahabi naloleberema, lene. Ani layagola Debidihanda lalu, Aniyagua nde ina tihondo agile buliya hamelo kamibe, lene.

<sup>5</sup> Ani hale hayagola tigua ibuhondo lalu, Bamba Solohanda ina aria lenego mbira Isaraele dindini naholomaya bibahendeore bo wahai holene hamelo hene. <sup>6</sup> Ibugua ani binigo manda bialu ina ibu igini aguaneru aria kariali ina ngibelo hamelo kama. Ani ngeregola iname Gibea tano haru poleberema. Gibea tano haru poledagoni irane agali kini helo Anduane Homogohanda Gibeali Solo dabo helene manda bialu ani haru poleberema. Ani haru pialu tano ogoriani Anduane Homogo ibuninaga deni agali uruni homelo irani bo derela holeberema, lene.

Ani layagola Debidihanda lalu, Karulapego ina agali kariali uruni ti nguliya, lene.

<sup>7</sup> Anduane Homogonaga minini howa Debidi ibugua Solo igini Yonadanala habo nalolene bi mbira lowinigo ogoni lone mitangi bu dai bini. Ani mitangi bialu ibugua Solo aguane Yonadana igini Mebibosede ibu Gibeonoali biaru minu mia nabi wahene. <sup>8</sup> Ibugua Solo igini Amonila Mebibosede mendela libu Aia wane Lisibahanda taba henene henego minu mialu bini. Lisiba ogoni ibu Solo one wali wabuni halu mende berearu aria berene. Solo wane mini Meraba mbira berenego ibu igini duria henego minu mialu bini. Meraba ibu Meholali Basilai mbira henego igini Adarielela pu biruwa igiri duria uruni hono winigo minu

mini.☆ <sup>9</sup> Debidihanda agali karia uruni Gibeonoali biaru minu miya handala tigua agali uruni haru halu puwa hari nene wiagoria Anduane Homogonaga deni howa agali biaruni ira dibu hongowa bo derela hayagola bibahendeore homai hene. O biyadagoni mabuha bali lini boga biyagola wali agali hearume lini do wulenengi hayagola ani bini.

<sup>10</sup> Ainde agali homayadaruni aria igini kiraligo aija mini Lisiba berenego ibugua aga labolabo ko haragaya wiaru mo yalu agali bo derela hene hari nene biagoha irigi halu pene. Puwa ibugua aga ko biarunime pingi pongo buwa balai anda emene mbira ege tole wiagoria bia howa ibuni ogoniha berene. Ani bialu ibuni agali bo derela heago mamage biraabo heane ege dewa dege peagola iba dalu ibalu agali kariali bo derela hayarunaga kuni wiago damini. Lisiba ibugua agali kuni uruni ega biango nogo gabuarume nolino mbi- raga horombebi mamage baya hangu haabo haga hene.

<sup>11</sup> Mani howa Aia wane Lisiba ibu mamage ani beda layago hale howa <sup>12</sup> Debidi ibu Yabese tano wali agaliru Gileada dindini bu hearia puwa Solonaga kunibi Solo igini Yonadanana kuni mo pene. Abale ogolabo Pilidialirume Hari Giliboa wiagoha bo wahalu libunaga tingini Bedesana tano wiagoha mo yalu puwa wali agali mo ngoai haga hama wiagoria mo paga ho ngelene. Ani wiagola Yabeseali marume Bedesana tano puwa ogolabonaga kuni mo page yalu pene.

---

☆ 21:8: 1 Sml 18.19

<sup>13</sup> Ani bini winigo ai Debidihanda agali biabe biaga hearuhondo lalu, Libunaga kunibi mo yu pialu agali kariali Gibeonoalirume bo derela hayarunaga kunibi mo yu pu dege bilimu. <sup>14</sup> Ani bialu Beniyamini hameigini daluha Sela tano ngagoria Solo aba Kisinaga homali kagoha Solo Yonadanalanaga kunibi ogoniha hora halimu, lene. Agali biaru tigua puwa Debidihanda bilimu lalu lamiyadagua biai hene. Ani biai howa tigua Ngode Datagaliwabhondo tinaga dindi mo bayaleha lalu bi layagola Ngode Datagaliwabe ibugua tinaga bi hale halu biamogo bialu hene.

*Isaraealime Pilidiali lu timbuni hearu baba wai binigo ogo*

<sup>15</sup> Mani Pilidiali Isaraealila wai lone bialu howa Debidi halu ibunaga ami agaliru Pilidialiru baba wai bule tidiyu pene. Ti wai bialu ha dege binigo Debidi ibu tingini hongo ereba halu gamaea biyagola wai bibe nahe hene. <sup>16</sup> Ani biyagola Pilidiali lu timbuni mbira mini Isibibenobo henegome Debidi bole ibini. Isibibenobo ogoni ibu Pilidiali agali lu timbuni dege dege hayadaruni aria mbirago ibu hene. Ibunaga yandare yiagonaga dene boronosime wabini. Boronosi ogoninaga genda magi kilogarama tebira howa bolanguahe yu hene. Ani buwa Isibibenobo ibunaga wai biaga ayu tibu gahengeore andane ho yu hene. <sup>17</sup> Anigo Seruia igini Abisai ibugua agali ogoni ibiyago handalu Debidi mo wule ibini. Ani ibuwa Abisai ibugua Pilidiali timbuni ogonila wai bialu bo homelene. Ani biyagola Debidinaga ami agali biarume ibuwa Debidihondo hongo howa lalu,

Ina wai bule poramagoha í lone naibabe. Í ina Isaraele wali agalinaga wá hagane hale ale kego ai í bayagua inanaga hale ogoni mo hundia haradagua bulubadago naibabe, lene.\*

18 Mani Isaraeleali tigua Pilidialiru baba wai lone bini. Horo ogoningi dindi mbira mini Gobo wiagoria wai bialu hene. Ani bialu howa ogoningi Isaraele dindi mbira Husa wiagoha howa ibini agali mbira mini Sibegai henegome Pilidiali agali timbuni biaru aria mbira mini Saba heago bene.

19 Halu mendengi Isaraelealiru tigua Pilidialiru baba Gobo dindini wai bialu hene. Ani bialu howa Bedelehemeali Yairi igini Elehanana ibugua Pilidia ami agali mbira Gede tanoali mini Golaidi heago balu homelene. Golaidi ibunaga yandare endene timbuniore kuluba ale mbira yu henego agali ogoni bene.\*

20 Gede tanoha dege wai mendebi bialu hene. Horo ogoningi agali timbuni gibi mbira luoreni ibunaga gi hondone waragaria labolabo halu ge hondonebi waragaria degehe hene. Gi hondonebi ge hondonebi lamaga halu pira kirani mariahe (24) hene. 21 Agali ogoni ibugua Isaraele wali agali mege bialu heagola Debidi hamene Sama igini Yonadanahanda agali ogoni balu homelene.

22 Agali timbuni mariali uruni Pilidiali Gede dindiha abale bamba heneru aria hearia Debidi halu ibunaga agali uruni tigua bo wahene.

## 22

### *Debidi ibu Anduane Homogohanda biamogo*

---

☆ 21:17: 1 Kin 11.36, Iba 132.17

\* 21:19: 1 Bi Te 20.5 de

handabe.



*biyagonaga iba gana lenego ogo*  
*(Iba Gana 18)*

<sup>1</sup> Debidi ibu Solohanda bo waholene wiyangibi ibunaga waitigi maru hearume bo waholene wiyangibi Anduane Homogohanda mo wahaga biyagonaga turu howa ibugua Anduane Homogohondo iba gana ogodagua lene.

<sup>2</sup> Anduane Homogo ibuni inaga wai pabe hongohore kagoni.

Ibu ege tole ale howa i ho gehalu

waitigirunaga giha howa i mo wiaga ka.

<sup>3</sup> Inaga Ngode Datagaliwabe ibu inaga ha do haga.

Ibu hari nene ngaligobi kagoaha i pialu ibuha ha do haruli.

Anduane Homogo ibu inaga humbi howa i hapai haga ka.

Ibugua i mo wialu handayaho holene hongokarulapeore kagoni.

Ibu inaga wai pabebi inaga ha do andabi ibuni hangu ka.

Inaga waitigirume i minalu bolebiragola

i biamogo bialu mo wiaga ibuniore kagoni.

<sup>4</sup> Anduane Homogonaga mini yaraga hamiya.

Ina ibu olalu haruli.

Ibugua hale halu i biamogo bialu

inaga waitigirunaga giha howa i mo wiagakagonaga

iname ibunaga mini yaraga holene nga.

<sup>5</sup> Iba solowarame yaribu timbuni tanguialu titala amu nana biagadagua bialu<sup>☆</sup>

---

<sup>☆</sup> 22:5: Yna 2.5-7

homolene pume dariba haradagua i dariba hayagoni.

<sup>6</sup> Homolene dameneme i mabu bupe howa pume dariba haradagua biyagoni.

Homalime i minule mandabu hayagoni.

<sup>7</sup> Inaga miniha genda ho howa Anduane Homogo olalu harugoni.

Inaga Ngode Datagaliwabehondo i biamogo bia lalu harugoni.

Ibuni andaga howa inaga bi hale haya.

Ibuhondo i biamogo bia larugo hale hayagoni.

<sup>8</sup> Ngode Datagaliwabe ibugua keba timbuni howa dindi mo dumbirumbi bilaya.

Dindi hari timbuni wearu mo ema bia hayagola ema bia gimbu biya.

<sup>9</sup> Anduane Homogonaga ngui harigaha howa ira hagua tagira ibalu

ne harigaha howa ira hungu datagitagi biyagome

mbirale wiaru bibahende do mundu laya.

<sup>10</sup> Ibugua hari daliga buda edene bialu daliape haya.

Daliape hayagola hari beraliba mindibi ibu geha hai haya.

<sup>11</sup> Ibunaga dahuliyali mbiranaga erekunini biralu yagalalu dalipe haya.

Puyabu ega babagane aleheme ibu yalu abaleore daliape haya.

<sup>12</sup> Aruma holeneme ibu dambi hai haya.

Hari beraliba mindibigome ibuni ho ge hayagoni.

- 13 Ibuha howa wá timbuni wá hatagi halu  
hari daba ira hungu dalu heaore ba tagitagi  
biya.
- 14 Anduane Homogo ibuni hari daligaha howa  
bi hongo howa hari kilikulu laradagua bi-  
ayua.  
Ngode Datagaliwabe Hongo Haiheore  
kagome bi layuago hale hene.
- 15 Ibugua ibunaga timu edalu ba amunana  
biyagome waitigi purogo laya.  
Hari dabame bayagola ti ibida bilibulu piai  
haya.
- 16 Anduane Homogohanda ibunaga waitigi  
hearuhondo keba hayagome  
puyabu hongohe ale howa ti puloyu purogo  
laradagua biya.
- Iba solowara timbuni bereago hundiai hayagola  
dindi andaneha gene wiyago bame ha pana  
ho haya.
- 17 Anduane Homogo ibu daligaha howa gi yupe  
halu i minu yania haya.  
Iba solowara timbuni bereagome i dambi  
hearia ibugua i gini miya.
- 18 Inaga waitigi hongoheore hearunaga giha  
hewaria ibugua ibuninaga gime i mo wiya.  
Agali marume i handabe manga ho hearu ina ti bo  
podabe nahe hewariabi  
ibugua i mo wialu haru dai biya.
- 19 Bamba iha genda ngelo hewangi tigua ila wai  
bule ibiya.

Ani ibiyagoyu Anduane Homogohanda i han-  
dayaho haabo hayagoni.

20 I homolene wiagoha kaware hewaria ibugua i  
biamogo biya.

Ibugua i gubaliniore ho kagome i gini minigo  
ko.

21 Ina mana bayale tigabi wiaru talialu bialu  
hewago hondowa

Anduane Homogohanda ihondo bayaleore  
biaga.

Ina mana ko mbira nabi hewago hondowa ibugua  
ihondo mana bayale biaabo haga ka.

22 Anduane Homogonaga mana tigabi ngaru ina  
talulu bialu harugoni.

Ina inaga Ngode Datagaliwabe erembira mi-  
alu mana ko wiaru nabi harugoni.

23 Ibunaga bi mana lo ngaru ina baya hangu tal-  
ialu bialu haru.

Ibugua bia layadagua ina mo wa nahe biaabo  
haruli.

24 Ina ibu deni howa ko mbira nabiorego ibu  
manda bu ka.

Ina mana ko mbira buli lowa ini ibagabu  
harugoha mamage haluore haruli.

25 Ibugua ina mana bayale tigabi wiaru talialu  
bialu hewago hondowa

ina mana ko mbira nabi hewago hondowabi

Anduane Homogohanda ihondo bayaleore biaga.

26 Anduane Homogo-o mbiralime i wahalu nape  
talima ibalu heagua

inabi nde ogoni ibu yu wahalu napiaga ke.

Mbiralime ko mbira nabiaga howa ibuha ko  
nawi heagua nde  
ínabi ogoni ibuhondo mana bayale biadai bi-  
aga kegoni.

27 Mbiralime mana tigabi dege biaga heagua  
ínabi nde ogoni ibuhondo mana tigabi dege  
biadai biaga ke.

Anigo mbiralime mana ko biaabo haga  
heagua ína ibuhondo handabe manga  
haga kegoni.

28 Wali agali tini mo dindiha haga karu  
ína ti biamogo bialu haru dai biaga ke.  
Wali agali maru tini mo dunini howa mine  
haga karu  
ína ti mo dindiha haga kegoni.

29 Anduane Homogo ínaga wá hagane haleore í  
kegoni.

Í arumaha kogola ína aruma holene mo wa-  
haga kegoni.

30 Ina waitigi bu karu bope halu wayali holiya ína  
í hongo ngiaga ke.

Ina waitiginaga tano ngaruha ege pabe hongohe  
timbuni karu pogola anda poliya  
ína í hongo timbuniore ngiaga kegoni.

31 Ngode Datagaliwabe ogoni ibunaga mana baya  
buruguleore biai haga ka.

Ibugua bi laragobi heneneore dege laga ka.

Ibunime wali agali waitigi handalu ibida po-  
rarunaga humbi kago  
ti bibahende ibuha ha ge hai haga ka.

- 32 Anduane Homogo ibuni hangu Ngode Datagaliwabeore kagoni.  
Inanaga ha do holene anda ege tole ale hongohe Ngode Datagaliwabe ibuni hanguore ka.
- 33 Ibugua inaga ha do anda hongoheore kagonigo i ibaga bu koria ibugua hariga bayale mo tiga biaga ka.
- 34 Ibugua i nogo gabua mini dia ibagabu poralidagua pialu holiya i handayaho haga ka.\*  
Hari nene ngaruha pialu koria ibugua handayaho kagome i pi nalaga ko.
- 35 Ibugua i wai bulene biawai haragome danda boronosime wabini hongoheore hibuhe ngago ina edalu babehe kogoni.
- 36 Anduane Homogo-o inaga waitigi hearunaga giha hewaria inaga humbi ihondo ngirigola i wayali harugoni.  
Ina i biamogo birigome i wali agali karunaga deni agali mini leneore kogoni.
- 37 Ina hariga bayale mo wirigome i porogoha inaga ge gondo lalu pi nale bayale kogoni.
- 38 Ina waitigi hearu talima pialu minu yania hai haruli.  
Ina ti talima pugu pugu bialu ti baiore hole wahalu dai nabi haruligoni.
- 39 Ina ti bogaiore hewagola homo ibira hai haga.

---

\* 22:34: Hi 3.19

- Ibira halu ina geha wiai howa lone heyabe  
nahe wiaga.
- 40 Ina waitigi baba wai buliya inime hongo  
ngirigoni.  
Ina i biamogo birigome ina waitigi hearu  
ina ti bo podahana hai harugoni.
- 41 I waitigi biaru i handalu ibida purogo lelo ina  
mo bia hari.  
Ina i handabe manga haga hayaru bo waihai  
harugoni.
- 42 Uruni ti mbiralime pele milo agali maru taya  
biyagoyu ti biamogo bulene mbira handa  
walia naheya.
- Tigua ti biamogo bilo Anduane Homogo  
olayagoyu  
ibugua tinaga bi hale nahaya.
- 43 Ina ti bo tagadabaga biwagola ti be abalu ale  
howa dindini wini.  
Ba dege bialu bo hengeda halu hariga teneni  
waru wiraligobi haya.
- 44 Wali agali ko hearume i bo waholilono ina abale  
ibalu i biamogo biri.  
Ina wali agali hameigini tara tara bu hearu  
handayaho holiya ina i dabo helarida.  
Wali agali tara tara ina nahendene hearu áyu  
i andaneha íbu hai ka.
- 45 Wali agali dindi taraha íbu hene karume ina  
wanakuiha ibalu ge duli hanga haga ka.  
Tigua ina bi larugola abale hale halu i talima  
ibaga.
- 46 Tinaga hongo ibira howa  
tigua tano wai pabe hongohe hearu wahalu

tini duru lagalaga bima i hewaria ibaga.

47 Anduane Homogo ibu haluheore kagoni.

Ibu inaga ege tole ale hongohe kago  
ibunaga mini yaraga hamiya.

Ngode Datagaliwabe hongoheore ogoni ibu i pele  
ngiaga kagonigo  
ibunaga mini timbuni yaraga haabo hamiya.

48 Ibugua i biamogo bialu waitigi hearu bope halu  
i mo wayali haga ka.

Wali agali hameigini dindi tara tarani hearu i  
andaneha helai haga ka.

49 Ibugua inaga waitigiru giha hewaria  
i biamogo bialu i mo wiaga ka.

Anduane Homogo-o ina i pele ngialu inaga waiti-  
guru mo dindiha helalu  
i mo wayali helarigoni.

Ina agali bo wahaga bu hearume i bo wahole  
biyaria i biamogo birigoni.

50 Anidagua birigonaga ina wali agali hameigini  
tara tara karunaga deni howa  
inaga mini yaraga holebero.\*

Ina inaga mini yaraga halu iba gana lolebero.

51 Anduane Homogohanda Debidi i kini dabo  
helayago

inaga waitigiru bope holiya i mo wayali  
helaga ka.

Ibugua iniore kini dabo helene kogohondo  
gubaliniore haabo haga kagoni.

---

\* 22:50: Lm 15.9



Inaga waneigini aguanene mani holebiraru  
 tihondobi ibugua gubalini ho haabo  
 holebira,  
 lalu Kini Debidihanda iba gana ogoni lene.

## 23

### *Debidihanda paluni bi lamaro binigo ogo*

<sup>1</sup> Debidi ibugua bi lamaro bialu lalu, I Yasi igini  
 Debidi kogome bi ogo laro. Anduane Homogo  
 Daligaorene Daliga kago ibugua wali agali dewa  
 bu hearunaga deni howa i mini lene helaya. Yaga-  
 banaga Ngode Datagaliwabehanda i kini holiya  
 dabo helayago kogo. Ina Isaraeleali howa iba  
 gana dewa laga kogoni. <sup>2</sup> Anduane Homogonaga  
 Dinini ibugua inaga ne harigaha howa bi latagi  
 haya. Ibugua bi uruni ti languliya ihondo langiaga  
 ka. <sup>3</sup> Isaraele wali agalinaga Ngode Datagaliwabe  
 ibugua ihondo bi laya. Ibugua inanaga ha do  
 haga ege tole pabe ale kagome ihondo ogodagua  
 laya. Kini kagome Ngode Datagaliwabe andaneha  
 howa ibunaga wali agali haru halu mana tigabi  
 bialu baya hangu handayaho hayagua <sup>4</sup> egerebagi  
 ginu haguame ni ge nahe ni baya taraore dar-  
 aligobi kini ibugua biabe birago wali agalinaga  
 deni wale bayale biragola tigua turu hai hene  
 bulebira. Iba dalu ibalu henego bo daragola ni  
 daba haragome dataniru ngiringara lalu bayale  
 haraligobi ibu holebira.

<sup>5</sup> Ogonidagua Ngode Datagaliwabe ibugua  
 inaga waneigini aguaneneru mo hongo holebero  
 lalu habo nalolene bi mbira hongohela lo winigo  
 nga. Ibugua bi lo winidagoni mo habo lalubi

mo iriaribi nabulebiraore. Bi lo winidagoni wiaaboore holebira. Mbirale iha tubagiho koru Ngode Datagaliwabe ibugua ngilo hamelo kogoni. Ani ngiragola i wayali haabo howa bolangua hene holebero. <sup>6</sup> Wali agali maru Ngode Datagaliwabe mitangi nabiaga karu uruni ti pu anihe ale kagola bo batagi haga biaga winigo nga. Pu ani ngaru wali agalime giha nayuhaga ndobe. <sup>7</sup> Wali agalime anihe ngaru mo wahole manda biyagua tigua gime ndo kanogo hongohe ngarume mo ilu mogo biaga. Mbirani ngelowa irame dai helo delolebira, lalu Debidihanda lamaro binigo ogoni.

*Debidinaga ami agali hongohe mini lenebi henegonaga mini uru  
(1 Bi Te 11.10-41)*

<sup>8</sup> Debidinaga ami agali hongohe mini lene heneru mini uru hene. Mbirago Tagemono hameigini Yosebe Basebede ibu ami agali hongohe mini lene tebira henego aria mbira haguane ibu hene. Horo mbirungi Yosebe Basebede ibugua yandare hangume agali handari halira (800) baba wai bialu agali uruni bibahende bo wahai halu wayali hene.

<sup>9</sup> Agali Ahohi hameigini Dodo igini Eleasa ibu agali mini lene tebira henedaruni aria haguane mendego ibu hene. Horo mbirungi ibu Debidihaba Isaraealirubi ti hemiria Pilidialirume wai bule amuna tidiyu hearia hendene. Ani hearia hondowa Isaraealeali uruni tigua wai bule tingi howa de buyu howa bi lalu henego ai Pilidialirume wai hapara haya handala Isaraealeali ti gi halu ibida piai hene. <sup>10</sup> Maru ibida piyagola

Eleasa ibu hangu hongo ho howa ibugua Pilidiali dewaore bo wahai hene. Ani ba dege bialu henego ibunaga gi amburi bialu hiribula hayagola wai bialu hene ayu tibu yu hayago yupe habe nahe hayagola giha yaho hene. Horo ogoningi Anduane Homogohanda Pilidiali hearunaga hongo bopeore hene. Ani biyagola Isaraeleali biaru tigua Eleasa hearia lone dai buwa handalu hemiria Eleasahanda Pilidiali biaru balu bai hayiyane handalu tinaga biabe bulene mbira dege wiaria hendene. Tinaga biabe bulene ogoni Pilidiali bo paya biarunaga wai pole karulaga agaru dabudabu damene karulearuni ti golo yai hene.

<sup>11</sup> Agali hongohe tebira uruni aria tebonego Hara dindiha howa ibinigo Age igini mini Sama hene. Horo mbirungi Pilidialiru ti ibuwa dindi mini Lehi mbira wiagoria agali mbiranaga paboro gama wiagoria tidiyu hene. Ani tidiyu ibu heago handalu Isaraeleali hearu ti ibida piai hene. <sup>12</sup> Ani piai hayagola Sama ibu gi nahe Pilidiali urunime tinaga dindi karu nalelo mabu dombeni howa wai hongoore howa bialu hene. Wai bialu ibugua Pilidiali uruni bibahendeore balu homelai hene. Anidagua biyadagonime Anduane Homogohanda Pilidiali waitigiru bope haiore howa wayaliore hene.

<sup>13</sup> Debidinaga ami agaliru haru haga ami agali hongohe pira tebira (30) laga hene. Horo mbirungi Debidu ibu Adulama dindiha egeanda mbira heagoha hearia ami agali hongohe pira tebira (30) uruni aria tebiralime Debidu hondo pene. Horo ogoni mabuha tomo hengearu boga biyagola bu wulene tu hene. Ogoningi

dege Pilidialirume Lebaimi dindi ulini wiagoha ibu howa balai anda bu hene. <sup>14</sup> Tigua Debidi minabe nahe wiagoha ha do heagola Pilidiali uruni tigua Bedeleheme tano bo podama anda ibalu ti karulo hene. <sup>15</sup> Ani karulo heagola Debidi ibugua Bedelehemeha iba bayale nagane winiru mitangibu dai buwa lalu, Daraore nde biaruago ainde Bedeleheme tanonaga uba andatagi biaga harabani iba hambiaga uli biagoha iba bayale biago hambu nedole nde i turuho koleda, lene. <sup>16</sup> Ani layagola hale howa ami agali hongohe hearu aria tebirali biaru ti heyalu pene. Pialu ti Bedeleheme anda puwa Pilidiali iba hambiaga biagoria bu hearuni helowa Debidi ibu iba noaba layagohaore bereago hambu yalu dai bialu Debidi nelo mini. Ani miyagola ibugua iba ogoni nane wahalu Anduane Homogohondo lomabu mialu dindini odo wahene. <sup>17</sup> Ani buwa ibugua lalu, Anduane Homogo-o ina iba ogoni nanolebero. Ani larogoni irane agali o karu ti iba ogo hambu piyagola bo wa kaleda. Ani bo wa kagola ina tinaga darama porago naradagua buledago nane waharogoni, lene. Ani lalu Debidi ibugua iba ogoni nane waore hene. Ami agali tebirali uruni tigua gibi bibe nahe mbira o binidagoni.

<sup>18</sup> Abisai ibu ami agali hongohe pira tebira (30) henedarunaga haru haga haguane hene. Ibu Yoaba hamene howa libu aija Seruia mbira berene. Horo mbirungi Abisai ibugua yandare hangume waitigi agali handari tebira (300) bo homelai hene. <sup>19</sup> Ani henego maniale ibu mini le-neore timbuni pudaga halu ibugua agali mini lene hongohe tebirali uruninaga haru haga haguane

hene. Anigo ibu agali tebirali dabene mini lene aria mbira ndo howa ti mini lene henegobi dege hene.

<sup>20</sup> Kabasele tanoali Yahoiada igini Benaia mbira henego ibubi nde ami agali hongohe uruni aria dege mbirago hene. Ibugua wai biraha wai hongo howa taraore mbira biaga howa ibugua horo mbirungi Moabali ami agali hongohe kira bo palu bini. Horo mbirungi nde Benaia ibugua dege Isaraele dindiha dindi guni ibira halu dagare biaga wiangi egeandaha gundu uli mbira wiagoha anda puwa gabua mbira budi ale timbuni mini laiono hearia handa walia halu bo wahene. <sup>21</sup> Horo mbirungi nde ibugua dege Iyibiali timbuni mbira balu homelene. Iyibiali ogoni ibu yandare timbuni mbira yu heagola Benaia ibu kango hangu yu henego ogoni yalu hapara howa libu bagabaga bialu howa ogoni Benaia ibugua agali biago ibuninaga yandare yiago gingila muwa ibuni yandare ogonime nogoba hayagola homene. <sup>22</sup> Benaia ibugua nabibehe maru urunidagua bigi binigome ibubi nde agali hongohe mini lene tebirali hearu aria ale dege hene. <sup>23</sup> Ani howa ibu pudaga dege halu ai ami agali hongohe mini lene pira tebira (30) hayarunibi yu wahalu ibu bolanguahe hene. Anigo ibu agali tebirali hongoheore mini lene gibi biarubi aria ndo howa dege hene. Ani heagola Debidihanda Benaia ibugua ami agali kini mamage haga hearu haru haga helo dabo helene.

<sup>24</sup> Ami agali hongohe henedaruni tinaga mini uru hene. Asahele Yoaba hamene biago halu Dodo igini Elehanana Bedeleheme tanoali biago hene.

<sup>25</sup> Ani bialu Harodo dindiha howa ibini Sama Eli-

gala halu <sup>26</sup> Pelede tano ha howa ibini Helese halu Tegoa tano howa ibini Igese igini Ira imaru hene. <sup>27</sup> Anadodo tanoali Abiesebi Husa dindiha howa ibini Mebunaibi <sup>28</sup> Aho hameigini aria mbira Salamonobi Maharai <sup>29</sup> Helebela libu Nedoba tano ha howa ibinigo libubi hene. Helebe ogoni ibu Bana igini hene. Ani bialu Beniyamini hameiginiru daluha Gibe a tano wiagoha howa ibini Libai igini Idaibi <sup>30</sup> Piradono tanoali Benaiabi hari Gasa wiagoha kaware dege dindi ulini mbira wiagoha howa ibini Hidai imarubi hene. <sup>31</sup> Ani bialu Araba tanoali Abialabonobi Bahurimi dindiha howa ibini Asamabedebi <sup>32</sup> Salabono tanoali Eliababi Yasenela Yonadanala igini hearubi <sup>33</sup> Hara dindiha howa ibini Samabi Sara igini Ahiamabi hene. <sup>34</sup> Ani bialu Maga dindiha howa ibini Ahasabai igini Elibeledebi Gilo howa ibini Ahi-dopele igini Eliamabi <sup>35</sup> Kamelo tanoali Hesperobi Araba howa ibini Parai imarubi haga bini. <sup>36</sup> Soba tanoali nde Nadana igini Igala halu Gada hameigini ariabi nde Bani hene. <sup>37</sup> Amonoali dindihayagi howa ibini mbira nde Selege mbira hene-gobi Berodo tanoali Yoabanaga yandare timuru yahaga Naharai mbira henegobi <sup>38</sup> Yadiru hameigini aria kirali Irala Garebela henego labobi hene. <sup>39</sup> Hidiali mbira Uraia henegobi uruni bibahende ami agali hongohe mini lene hene. Ami agali hongohe mini lene uruni bibahende dagalamaga halu pira tebirani karia (37) bibahende hene.

*Debidihanda Isaraele wali agali bibahende dagalai henego ogo*

*(1 Bi Te 21.1-27)*

<sup>1</sup> Anduane Homogohanda Isaraele wali agaliru baba lone keba howa ibugua Debidihanda ti genda mo milonaga mo mini wia hene. Ibugua Debidihondo lalu, Isaraele wali agalibi Yuda wali agalibi bibahende dagalai hole pu, lene. <sup>2</sup> Ani layagola Debidi ibugua agali mbira ibunaga ami haru hagane agali haguane Yoabahondo lamialu lalu, Ina ami agali haguane maru hayaruni lami-  
alu tigua inanaga Isaraele wali agaliore bibahende dagalai hole pudaba. Pigane dindi gibuni uyurayagi Dana tano howa dagalama pialu dindi gibuni unurayagi Beaseba tanoni dagala iri halimu. Wali agali agira agima palirimadabe hondolego anidagua bilimu lalu, lamini.

<sup>3</sup> Ani layagola Yoabahanda Debidihondo ladai bialu lalu, Kini-o ai Anduane Homogo inaga Ngode Datagaliwabe ibugua inanaga wali agali mo dewaore helo. Anidagua birago ini keore dege handabelo hameledo. Anigo iname wali agali daga lolene ogoni inanaga biabe ndo ngagoria ina irane aginaga daga lolene hamelo kebe, lene. <sup>4</sup> Ani layagoyu kini ibugua Yoaba halu ami agali haguane maru biaruhondo bi hongo howa lamialu, Ina o bule pudaba larudaguaore bilimu, lene. Ani layago hale halu ami haru haga biaru tigua kini helalu Isaraele wali agali bibahendeore hearu dagalai hole pene.

<sup>5</sup> Ti Iba Yodana domalu puwa Gada hameigini dindini Aroe tano dindi tigabi yuyu bayale wiagoria puwa tano abene unurayagi balai anda bu

hene. Ani bialu mani puwa Yase tano mbira Aroe tano abene uyurayagi wiagoria anda pene. <sup>6</sup> Mani tigua Yase tano yu wahalu Gileada dindihayagi pialu Hidiali dindi puabo halu Kadese anda pene. Ani pialu mani Dana pu mabu bialu nairia ni paliragohayagi Saidono anda pene. <sup>7</sup> Ani pialu mani dai buwa unurayagi Taia tano ege pabe bu yu mabu bini tano hongohe biagoha anda ibini. Ogoniha howa pialu wali agali Hibi hameigini palaruhabi Kenana hameiginiru tinaga tano wiaruhabi piai hene. Maniore Yuda dindi gibuni unurayagi dindi mbira Beaseba wiagoria anda pene. <sup>8</sup> Tigua Yuda dindi bibahendeha ibaga biai halu Yarusaleme dai bini. Ege dirani horo pira kira (20) bibahendeni biabe ogoni bini. <sup>9</sup> Ti dai buwa Yoaba ibugua bialu henedaru bibahende ogodagua birima lalu kini hale helo lamialu lalu, Isaraealeali agali ami habeheru daosini dege handari halira (800,000) halu Yudali daosini dege handari duria (500,000) hearia daga larima, lene.

<sup>10</sup> Ogoni biai howa mbirale ogoni biyagonaga Debidi ibuni bu miniha genda timbuni yu howa ibugua Anduane Homogohondo bi lalu howa lalu, Ina mini nawiale howa agali daga larudagome ina mana ko timbuniore bu haruda. Ani birudago ai Anduane Homogo-o ina ko birudago mo wahabe, lene.✧

<sup>11-12</sup> Anigo horo ogonongi dege Anduane Homogohanda agali ibunaga bi mana latagi halu mbiwia haga Gadahondo lalu, Ina Deibidihondo bi ogodagua lole pobe. I Anduane Homogo inaore

---

✧ 24:10: 1 Sml 12.13, 13.13



laro. Ina hariga tebira mo ngerogo ínime mbirago ogo karulape lalu dababe. Ínime ogo bia lalu ihondo langerego ina íhondo buliya langibe, lene. Anduane Homogohanda bi ogoni layago <sup>13</sup> Gada ibugua hale halu egerebagi Debidi ibu heyu bere-ria Anduane Homogohanda ogodagua laya lalu lamule pene. Ibugua puwa Debidihondo lamialu lalu, Anduane Homogohanda ina bi tebira uru mbirago bilonaga e labelo hameledago. Ai mali kariani tomo gari timbuniore Isaraele dindini tagira pelo hameledebe be tínaga wai tigrume wai bima lole ibiragola ege tebirani tí ibida pialu ha do holene hameledebe be horo tebirani ínaga dindi bibahendeha warago timbuni tagira ibilo hame ledebe. Bi uruniore baya hangu mandaore buwa mbirago ogo bilo larego Anduane Homogo ibunihondo lamule poliya langibe, lene.✧

<sup>14</sup> Ani layagola Debidi ibugua Gadahondo lami-  
alu lalu, Ina bi áyu langiriruni hale howa genda  
timbuniore yu bedogoni. Ani bidogo ainde An-  
duane Homogoibunime ogoale bule lalu ibugua  
bule hameledadagua o inahondo bilo waha. Irane  
ibunime ina dara hai haga kagodago. Anigo agal-  
ime ina mo ko halu belo hame naledo, lene.✧

<sup>15</sup> Ani layagola Anduane Homogohanda warago  
ko timbuniore horo ogoningi howa Isaraele dindi  
bibahendeha ibilalu maro bulebira layangiore  
ereba hene. Warago timbuni ogonime Isaraele  
dindiha wali agali daosini dege pira karia (70,000)  
bibahende Isaraele dindinaga abene uyurayagi  
Dana tano howa homama pialu abene unura

---

✧ 24:13: 1 Bit 21.12, Ese 14.21 ✧ 24:14: Iba 51.1, 130.4-7

Beaseba tanoni homa iri hene. <sup>16</sup> Ani bialu Anduane Homogonaga dahuliyali mbira wali agali bo wahama ibiyadagoni Yarusaleme tanoha wali agali bo wahole anda ibini. Ani ibalu hearia Anduane Homogohanda wali agali mo ko holene bu hearu hondowa uruniha hearu dara howa dahuliyali biagohondo lalu, Ai karulapego waha, lene. Ani laya handala dahuliyali biago ibu wahowa widi iraneru lini hondo ibira ibira halu aeane puyabume yu pelonaga bo taulalu tale biaga wiagoria ibu hene. Dindi ogoni Yabusu hameigini aria agali Arauna mbira henegonaga wini.

<sup>17</sup> Debidi ibugua dahuliyali ogoni hondowa Anduane Homogohondo lalu, Ina mana koore birugome ai áyu pani nolene ngagonida. Anigo wali agali darabi uruni tigua ko mbira agi biyagonaga ti pani nelu miribe. Inibi i one waneiginiru inanehondo pani ngia nabiridago, lene.

<sup>18</sup> Ani lalu hearia Anduane Homogonaga bi mana latagi haga Gada ibugua Debidi hearia puwa ibuhondo lamialu lalu, Áyu ogoni Yabusuali Araunanaga widi bo taulalu lini aeanela mo tale biaga biagoria puwa Anduane Homogonaga loma biniru bo delaga dabu mbira bia hole pobe, lalu lamini. <sup>19</sup> Ani laya handala Debidi ibu heyalu Anduane Homogohanda bibe laya lalu Gadahanda lamiyadagua bule dindi hobane mbira widi lini do ngelowa lini aeanela mo tale biaga wiagoaha pole pene. <sup>20</sup> Arauna ibu nde biabe bialu haga wiagoria howa handape halu hearia kini halu ibunaga ami haru haga agali hagianerubi heba ibiyane de hendene. Ani ibiyaria handalu ibu ti lola hole

abale puwa ibu ge duli hanga halu kininaga mini yaraga halu ma podope hene. <sup>21</sup> Ani buwa ibugua lalu, Inaga agali haguane-o inaga biabe biahaga agali i hewaria aginaga ibiribe, lene.

Ani layagola Debidi ibugua ladai bialu lalu, Ina inaga dindi podene mbira widi biabe biaga o ngegoni yolo bule ibiru. Wali agali warago hongoheore áyu balu karuni bibahende Anduane Homogohanda mo wahelonaga ina ibunaga loma biniru bo delaga dabu mbira dindi ogoria bu wulene hameledo, lene.

<sup>22</sup> Ani layagola Araunahanda Debidihondo lalu, Kini-o dindi ogoni yolo bibelo hame naledogo bame í habelo ngero. Mbirale mbira lomabu mule hameledego alebi bo delabe. Nogo bulumaga kagobi lomabu mule irani dai helo bo delabe. Ani bialu ira widi bo taulaga ngagobi ira nogo bulumaga dariba ha magamaga biaga ngagobi bibahende gabuwa lomabu mule ira ogonime delo delabe. <sup>23</sup> Kini-o ina mbirale uruni bibahende ihondo ngiai harogoni, lene. Ani lowa Arauna ibugua laabo halu lalu, Anduane Homogo inaga Ngode Datagaliwabehanda loma ogoni ina bo merego turu timbuni helo hameledo, lene.

<sup>24</sup> Ani layagola kinihanda ibuhondo lamialu lalu, Ina mbirale inime erekui biabe bialu mini ndo ngago Anduane Homogohondo lomabu mia nabulebero. Ani buleneore hameledogodago ai inaga mbirale uruni ina yolo buleorebero, lene. Anidagua lalu Debidi ibugua Araunanaga dindibi nogo bulumagabi bibahende muni siliba kina handari duria (500) aleme yolo bini. <sup>25</sup> Ani buwa Debidi ibugua Anduane Homogonaga loma biniru

bo delaga dabu mbira dindi ogoriani bia howa loma biniru irani dai helonaga bo delalu Anduane Homogola ho gimbu bulenaga bo delalu bini. Ani biyagola mani Anduane Homogohanda wali agali biarume tinaga dindi mo bayale habe lalu bi layago hale howa ibugua Isaraele wali agali tinaga dindiha warago ko timbuni íbu wiago mo wahai hene.

**Habo nalolene bi gahenge lo winigo ogo**  
**The Holy Bible with Deuterocanon in the Huli Language**  
**of Papua New Guinea**  
**Buk Baibel long tokples Huli long Niugini**

Copyright © 1983, 1991, 2002 Bible Society of Papua New Guinea

© Faith Comes by Hearing

Language: Huli

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-11

---

PDF generated using Haiola and XeLaTeX on 3 Mar 2023 from source files dated 9 Oct 2020

dbd89e09-6f1d-5903-a411-8b10e4e81fb7